

**NATIONAL ASSEMBLY OF  
SEYCHELLES**

*Tuesday 15<sup>th</sup> March, 2022*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour, tou Manm Onorab. Bonzour nou staff ki avek nou. Bonzour tou piblik ki swiv nou fidelman, dan lakour, dan travay. Byenveni pou zwenn nou dan sa lazournen travay.

Bon, enn de pti remark dan kominikasyon ; Premyerman senpati bann Manm ek zot zabitan distrik, ki'n ganny tape avek inondasyon, gro lapli semenn pase. Mon konnen en kantite Manm in fer gro zefor, pou zwenn zot zabitan.

Onorab Roucou, in ganny piblisite lo televizyon. Me selman mon konnen i annan lezot Manm ki'n enplike. Alor senpati e non kouraz zot tou.

Felisitasyon osi pou group Madanm Lasanble, ki'n organiz seminar *Gender Base Violence*. E mon krwar sa seminar, in fer

bon travay pou met sa size lo latab.

E mon ava ankouraz group madanm, pou letan fer i so annou rode ki *next step* Lasanble i kapab fer pou avanse, sa konba kont sa size vreman sansib pou nou pei.

Mon a pran osi lokazyon pou felisit Onorab Sathya Naidu ki'n ganny, elekte Vis-Prezidan group *Young Leader Elected Officials* dan lorganizasyon *United Cities Local Government Africa*.

E sa ti en rankont ki ti fer semenn pase, e Onorab Naidu ti ganny envite par Biro Mer Lavil pou partisip ladan koman en *elected official*.

So felisitasyon Onorab Naidu.

**(APPLAUSE)**

**MR SPEAKER**

E nou swet ou en bon parkour. Mon annan plezir pou partaz avek zot, mesaz Larenn Elizabeth, lo lokasyon *Commonwealth Day*. E nou partaz, sa mesaz an respe pou nou apartenans dan sa lorganizasyon.

Ki'n nou'n vreman aktiv, pou bokou lannen. Mon mazinen depi ler, Lasanble in komanse.

Mesaz Larenn Elizabeth Commonwealth Day Message 2022. Delivering a common future. Her Majesty Queen Elizabeth Patron of The Commonwealth Parliamentary Association and Head of the Commonwealth.

*In this year of my Platinum Jubilee, it has given me pleasure to renew the promise I made in 1947, that my life will always be devoted in service.*

*Today, it is rewarding to observe a modern, vibrant and connected Commonwealth that combines a wealth of history and tradition with the great social, cultural and technological advances of our time. That the Commonwealth stands ever taller is a credit to all those who have been involved.*

*We are nourished and sustained by our relationships and, throughout my life, I have enjoyed the privilege of hearing what the relationships built across the great reach and diversity of the Commonwealth have meant to people and communities.*

*Our family of nations continues to be a point of connection, cooperation and friendship. It is a place to come together to pursue common goals and the common good,*

*providing everyone with the opportunity to serve and benefit.*

*In these testing times, it is my hope that you can draw strength and inspiration from what we share, as we work together towards a healthy, sustainable and prosperous future for all.*

*And on this special day for our family – in a year that will include the Commonwealth Heads of Government Meeting and the Commonwealth Games, I hope we can deepen our resolve to support and serve one another, and endeavor to ensure the Commonwealth remains an influential force for good in our world for many generations to come.*

*Elizabeth R. Windsor Castle. Lafen mesaz.*

Mersi pou zot latansyon e mon asire zot partaz, nou lwayote anver lorganizasyon Commonwealth. E bann lenstans ki nou partisip ladan.

Mersi. Nou a pas lo Prezantasyon Papye, Madanm Clerk.

### **MADAM CLERK**

Mersi Mr Speaker. Bonzour tou bann Manm, tou dimoun ki a lekout. Bann Papye ki pe ganny Prezante i comme swivan: -

*S.I. 26 of 2022 Education (Teachers Council of Seychelles) (Commencement) Notice, 2022*

*S.I. 27 of 2022 Seychelles National Institute for Culture, Heritage and the Arts Act, 2021 (Commencement) Notice, 2022. And the last one,*

*S.I. 28 of 2022 Notification of proposed reclamation at Cascade under section 6(2) and (3) of Cap 106.*  
Mersi Mr Speaker.

### **MR SPEAKER**

Mersi Madanm Clerk. Nou ava prezan pas lo *Private Notice Question*. E mon a demann madanm reporter, pou apel Vis-Prezidan Ahmed Afif.

Bonzour e byenveni Vis-Prezidan Ahmed Afif, e mon osi plezir *welcome Mr Imtiaz Umarji Chairman Seychelles Trading Company* ki pe akonpanny Vis-Prezidan. Nou a pran *Private Notice Question* Onorab Leader Lopozisyon.

### **HON SEBASTIEN PILLAY**

Mersi Mr Speaker, bonzour Mr Speaker. Premyerman avan mon komans demann mon kestyon, ou ava permet mwan de pti minit pou swet tou bann travayer Servis Sosyal, bann *social workers*.

En *happy Social Workers Day*. *Happy Social workday*.

Mon konnen ki bokou zot in travay dan bann kondisyon parfwa tre difisil, pou ede anmenn en soulazman pou bokou nou ki kapab pe pas dan bann moman difisil.

Oubyen pou asire ki zot fer sir ki bann drwa e dinyite dimoun i ganny garde. E nou apresye travay ki zot fer avek bann fanmir, pou bann zanfan, pou bann madanm an zeneral e pou lasosyete.

E nou swete ki zot a kontinyen fer sa travay ki mwan personnelman lo mon par, e lo lapar tou dimoun lo mon kote latab, nou pa zis swet zot en *happy Social Worker Day*, me nou osi *pledge* nou sipor pou zot, pou travay avek zot e pou ed zot dan zot travay. Pou asire ki nou vin en lavwa pou zot. Mersi Mr Speaker.

Lo en lot pwen Mr Speaker, mon'n note, e mon pou met sa lo rikord ki mon dezapwente, ki dan ou komunikasyon ler ou'n koz lo dezas ki'n arive, ou'n mansyonn bann *MNA*. Me ou'n osi *single out*, en *MNA*. Mon pa krwar i en bon pratik pou *single out* en *MNA*. Akoz tou *MNA*, in devoue e ki-

### **MR SPEAKER**

Onorab *proceed* ek ou kestyon silvouple.

**HON SEBASTIEN PILLAY**

E koman leader parti *LDS*, mon vwar totalman kont letik Lasanble pou ou, koman *Leader LDS* pou swazir pou *single out*, e felisit enn ou *MNA*. Mon oule, met sa lo rikord Lasanble. Lot kote i kapab kontan, zot kapab pa kontan, me mon'n fer li. Prezan mon a vin-

**MR SPEAKER**

Pa komant plis lo la, Onorab ou a prosede silvouple.

**HON SEBASTIEN PILLAY**

Mon a vin lo mon kestyon. Mr Speaker mon kestyon i lir koumsa: -

Avek sityasyon pri lavi ki pe kontinyelman ogmante, in annan plizyer konsern eksprimen par piblik an zeneral ki in annan mankman serye serten komodite esansyel kot STC, tel koman; (I annan en pti *typo* la) lafarin, zonnyon, ponmdeter.

Eski Minis i kapab donn Lasanble en leksplikasyon lo ki son Minister e STC pe fer pou adres sa bann sityasyon?

Lepep Seselwa a note ki Vis-Prezidan en non pa Minis Finans ki pe reponn vin kestyon ozordi dan Lasanble. Mersi Mr Speaker.

**MR SPEAKER**

Onorab, ou sipoze stick to your question. Mersi. Sa komanter pa neseser. Mersi Vis-Prezidan ou a pran repons silvouple.

**THE VICE-PRESIDENT****AHMED AFIF**

Mersi bokou. Mersi bokou Mr Speaker. Bonzour *Leader Lopozisyon*, *Leader Biznes Gouvernman*, tou bann *MNA*, tou pep Seselwa ki a lekout.

Mr Speaker permet mwan, avan mon komanse pou osi, lo lapar Gouvernman swet tou bann *social workers* en bonn fet zot lazournen. Zot pe fer en travay vreman enportan pou sa pei, kot nou ete ozordi. E nou felisit zot. Annefe Mr Speaker, pli tar lazournen, mon pou fer en vizit pou al vwar bann *social workers* kot zot biro.

Pou tourn lo kestyon, les mon a dir tou dabor Mr Speaker, les mon asir pep Seselwa, ki napa okenn mankman komodite de baz dan pei a ler aktyel.

Par kont nou pe viv dan en lemonn tre boulverse, kot dizour a landmen nou pe vwar bann sok dan bann pri tel ki pou karbiran, pri *container* manze ek lezot prodwi, an konsekans bann sekous ki lemonn pe fer fas avek.

Sesel e STC i pa en leksepsyon. Me erezman anba bon zeson, nou'n reisir ozordi pou fer sir ki nou bann komodite, in touzour annan lo letazer pou pep Seselwa a bann pri ki reste abordab.

Les mon dir dabor Mr Speaker ki bann pri sa 13 komodite de baz kot STC pa'n sanze pandan sa dernyen 10an. Malgre tou bann kriz ki lemonn pei e STC in pas ladan.

Avan mon donn plis detay, permet mwan donn en lesplikasyon lo komodite de baz, lozistik pou anmenn zot Sesel e osi kapasite stokaz.

Komodite de baz nou annan nou en lalis 13 komodite de baz ki enkli diri, lantir, zonnyon, ponmdeter margarin, delwil, disik, dile, dile pti baba, disel, ponm, zoranz, e papye twalet.

Par kont STC i donn konsonmater osi en swa ; par egzanp ler ou kapab aste dile ek mark STC ki pli bon marse, ki si ou aste dile avek en mark dizou *Melody*. Pou margarin si ou aste *Nawar*, i pou pli bon, pli bon marse ki si ou aste *Remia*.

Pou ponmdeter ou kapab aste sa ki kout R11.90 par kilo oubyen, i annan lezot *brand* ki R40 per kilo. Souvandfwa bann ki annan en *brand*, menm ki i plizoumwen egzakteman menm

prodwi, i parfwa kout plis akoz fason komersyalizasyon.

Me STC i la pou ofer pep Seselwa bann prodwi ki abordab, e kontinyen fer li. Annou prezan regard lozistik ; sa i konsern prensipalman pri *freight* pou anmenn marsandiz Sesel, ki pou pli grand parti pou STC i vin par bato.

Parey zot konnen *freight* dan lemonn, in ogmant konsiderableman depi *COVID*. En *container* 20 pye sorti *Dubai*, in sorti plis ki \$2200 2an pase, pou vin \$5400 - preski de fwa edmi son pri. Pri *container* sorti Lerop osi in plis ki double. Kargezon par avyon - menm ki pa bokou - sa ki nou apel *airfreight*, i osi in plis ki double an deviz etranzer byensir.

An menm tan bann laliny bato ki servi larezyon, i annan en sistenm *tender* pou kargo ozordi. Alors sak fwa ki annan kargo pou pran dan bann Por kot zot pe al anbarke, bann Lazans fretaz ti bezwen fer konpetisyon, lo pri *freight*.

E byensir, bann pei kot i annan plis volim, zot ganny bann pri preferansyel e bann pti pei tel ki Sesel kot kargo i vin mwens, nou, nou pri i toultan reste o.

Trwazyenm size enportan se nou kapasite stokaz. Mr Speaker pandan sa dernyen

30an, STC pa'n ogmant son kalite e kapasite stokaz. Annefe nou'n annan menm fasilite ki dan lepok *SMB*. Nou konnen ki depandan grander e kalite ou stokaz, sa i permet ou gard marsandiz pou pli lontan.

Par egzant diri, i normalman bezwen reste dan en landrwa sek, lo en tanperatir 21degre. Lafarin 15 a 20 degré. Si ou pa fer sa, ou stok i pou gat bokou pli vitman. Se pou sa rezon ki dan lepase, nou'n souvan vwar kanmiyon pe zet bokou prodwi lo *dumpsite*. Sak fwa ki lozistik ti fel. E alors *SMB* ou *STC*, ti bezwen fer gro pert.

Ozordi *STC* pe fer fas avek en novo sityasyon, kot demann pe ogmante, pa zis akoz popilasyon i demann plis. Me osi akoz *STC* li menm i pe vin en marsan ki tre konpetitiv. Annou pran lafarin par egzant, ti annan plizyer enportater lafarin ziska resaman.

Me ler ti annan problem lozistik, avek bato, Ttu kliyan ti vin kot *STC*, e soudan demann lo *STC* ti plis ki double, dan en zour a lot. Malgre sa ozordi, napa problem lafarin. Annefe, Mr Speaker yer bato fek desarz 6 *container* lafarin pou *STC*.

E zanmen nou'n mank dipen. Vwala alors en pe lenformasyon, lo bann fe e

realite konsernan bann komodite de baz.

Ki nou pou fer alors ki nou resanti mwens sekous par ler lemonn i dan boulvers? Nou, nou bezwen stok plis marsandiz. Me pou fer sa, nou pou bezwen en meyer. En novo fasilite ki alaoter komers ozordi.

E kot dirasyon ki nou kapab gard marsandiz, e i ogmante e kot lozistik i ganny byen planifye avek mouvman kargo. Savedir nou vey mouvman stok pli byen. E nou komann bann marsandiz, tout an prenon kont mouvman bato ki sanze de zour an zour e ki totalman an deor nou kontrol.

Se sa travay difisil, ki nou annan. Me nou bann zofisyé *STC*, e son Chairman ki la o bor mwan pe fer tou sa ki zot kapab pou ede trouv en solisyon. Alor pou fasilite stokaz, *STC* in trouv li neseser pou planifye konstriksyon en novo *cold store* e *warehouse* modern, ki pou kout li environ \$5.5milyon, ki ozordi i environ R80milyon.

I pou rod son prop finansman, e i pou konstrir sa dan pli kourt dele letan an swivan tou bann norm pou *procurement*. Enn fwa sa i ganny fer, *STC* a kapab pli for kan i pe negosye ek fourniser.

Akoz zisteman i pou kapab, aste dan bann pli gran kantite.

Mon anvi finalman asir pep Seselwa, ki STC pe donn tou Seselwa meyer servis e pri posib, pour tou sa bann komodite de baz. Annefe avek sa programm *RRP* ki'n entrodwir depi lannen pase, nou'n vwar bokou Seselwa pe benefisyé akoz zot konnen ki ler zot rod prodwi ki mark (*RRP*), *Recommended Retail Price* zot pe ganny valer pou zot larzan.

E an plis Mr Speaker, sa pe mars tre byen lo Praslin, La Digue kot malgre plis kou pou met marsandiz lo zil, STC i kontinyen gard menm pri pou zot parey lo Mahé.

Se sa bann lakonplisman ki nou fyer, nou'n kapab anmennen dan zis 17 mwan ki nou'n la. E ki nou'n ganny sans fer sa transformasyon dan STC. Mon ti a kontan fer rapel pep Seselwa ki bann stok eksteryer i difisil pou nou fer fas avek.

*COVID* pa'n zanmen ganny prevwar, e Dolar ti mont ziska R22, san okenn lavertisman. Personn menm 6 mwan pase pa ti prevwar en lager dan Lerop, avek sa lanpler kot pri delwil in mont par plis ki 50poursan.

Se pour sa rezon ki mon pe demann avek pep Seselwa, pou zot osi azir dan en fason pridan. Kot nou tou konsonnm

an moderasyon. Annou evit gaspiyaz, oubyen ekstravagans. I enportan pou nou mazin, demen dan lemonn kot personn in nepli kapab prevwar demen.

Nou reste en pei ki enport preski tou sa ki nou konsonmen. Menm si nou annan mwayer, pa pou apes pri kot i sorti pou li monte. Akoz bokou sa bann fakter i an deor kontrol Sesel.

Ler lager ti deklare le 24 Fevriye sa lannen, pri delwil ti arriv par lao \$140 barik. Sorti mwens ki \$100 barik. Apre tonm ziska \$115 pandan lespas en semenn selman. Se bann sok ki nou pe pas ladan ozordi. Sa i parey pou marsandiz tel ki lafarin, delwil pou kwi manze, margarin eksetera.

E nou bezwen toulstan mazinen ki sak sou ki nou depans an mwens i en sou ki nou kapab met de kote. Pou pey sa komodite pli ser depi kot i sorti. E nou pa konnen kan i pou vin pli ser. Sa ki nou konnen se ki nou pa vwar sa bann pri deor desann pou ankor en bon pe letan, si nou mazin dan en fason pridan e realis.

Mon annan mwan ozordi avek mwan, Chairman STC parey mon'n dir Mr *Imtiaz Umarji* ki pare pou osi donn serten detay pou leklersisman

kot i neseser, e avek permision Mr Speaker. Mon espere ki mon'n kapab reponn bann konsern Onorab, e byensir mon la pou mwan reponn lezot kestyon adisyonnelle. Mersi bokou Mr Speaker.

### **MR SPEAKER**

Mersi Vis-Prezidan pou ou repons. Nou pou rezerv bann kestyon siplemanter, *Leader Lopozisyon* nou'n dakor pou, a lafen mon a pran kestyon bann lezot Manm, pour letan ki mon annan disponib.

E mon a pran bann Manm ki'n lev lanmen deza. Onorab Georges, ou kestyon silvouple.

### **HON BERNARD GEORGES**

Mersi Mr Speaker. Bonzour Mr Speaker, bonzour Vis-Prezidan, Mr Umarji tou bann Lasanble. Tou dimoun ki pe ki pe ekout nou dan lakour.

Mr Speaker permet mwan avan ki mon poz mon de kestyon, pou premyerman ozordi i le 15 Mars, e sa laniverser Prezidan Larepublik, e lo non mon Caucus, e lo mon non personnel, mon ti a kontan sezi sa lokazyon, pou swet Prezidan tou le meyer ozordi, e pou sa lannen ki pe vini dan son lavi.

**(APPLAUSE)**

### **HON BERNARD GEORGES**

Dezyenm pti keksoz ki mon ti a kontan fer resorti, Mr Speaker se, ki lefe ki se Vis-Prezidan ki la ozordi pe reponn sa kestyon. Se akoz Minis Finans pa dan pei.

E sa, e sa nou tou nou konnen, akoz Clerk yer anvoy nou, nou tou Manm Lasanble isi *including* Onorab Pillay en mesaz poudir ki Bill ki pe ganny pran, ki ti sipoze ganny pran demen, par Minis Finans pa pou ganny pran akoz Minis Finans pa dan pei sa semenn. Alor mon mazinen, se sa rezon ki Vis-Prezidan i la ozordi.

Trwazyenm keksoz mon ti a kontan, avek ou permision Mr Speaker, se partaz swe, mon swe personnel nou *Caucus* avek bann *social workers* ozordi ki pe fet zot lazournen.

Mr Speaker ou ava rapel ki sak lannen, sak fwa Bidze i vin dan sa Lasanble, e Bidze *social workers* i monte. Mon pran sa lokazyon poudir ki mannyer, sa group dimoun, se en group dimoun ki premyerman pa ganny ase valorize dan nou pei.

E dezyenmman i merit bokou plis latansyon, dan lefitir akoz sa travay ki zot fer se en travay remarkab. Se en travay ki zot lo teren toulezour. E nou lo sa kote latab, parey in ganny

dir lo lot kote latab, nou apresye sa travay ki zot fer. E nou swet zot, en bon lazournen e kouraz dan zot latas, ki pe vini.

**(APPLAUSE)**

**HON BERNARD GEORGES**

Mon de kestyon Mr Speaker i sa de; premyerman Vis-Prezidan eski ou ti a kapab, dir avek sa Lasanble, si in annan serten komodite de baz ki pa'n ogmante dan zot pri pou plizyer lannen ?

E ki annefe sa ki pe arive, se ki STC pe sibvansyon en bon pe komodite pou tou dimoun. E konteks sa kestyon se eski, egzakteman parey sa ladministrasyon pe propoze fer avek sistem *welfare* kot sa bann ki pli bezwen pou ganny ede. E non pa tou dimoun lo en baz egal ki ou bezwen, ki ou pa bezwen. Menm keksoz i kapab ganny egzaminen. E ganny met an pratik par STC, kot bann dimoun ki pa bezwen par egzanp, ganny sibvansyonnen, pou diri, delwil, lafarin bann komodite ki tou dimoun i bezwen, pa pou gannyen. Me bann ki pli bezwen ava kapab gannyen.

Alor mon le konnen si pou annan en, en lide, en laranzman ki fer ki bann ki pli bezwen, kot pri lavi i pli tap zot

i ava ganny favorize e non pa nou tou, *including* bann ki pa osi merite.

E dezyenmman eski an sa ki konsern *storage facilities* ki ou'n koz lo la, Vis-Prezidan, eski dan ou lespri, eski in annan sifizaman lenvestisman par bann ladministrasyon presedan dan fasilité stokaz dan nou pei?

E si non, eski ou kapab dir ozordi avek sa Lasanble, ki se sa enn bann rezon prensipal. Ki i annan touzour serten defayans dan kestyon kontrol pri lavi? Mersi Mr Speaker.

**MR SPEAKER**

Mersi Onorab. Vis-Prezidan ou ava adres bann kestyon silvouple.

**THE VICE-PRESIDENT**  
**AHMED AFIF**

Mersi Mr Speaker. Mersi Onorab Georges pou sa bann kestyon. Ou premye kestyon, konsernan pri e Polisi pri dan STC, i en kestyon enteresan, e Polisi pri dan STC. I en kestyon enteresan, parske i soulev en keksoz ki en pratik ki'n egziste pandan 10an.

Mon krwar sa deba i en deba ki reel, en deba ki annan merit lo la. I annan merit, akoz si nou regard bi prensipal, bi prensipal, sa Polisi lo pri se

pour fer sir bann ki annan mwens mwayen. I annan sa posibilite, pou li ganny bann komodite de baz a en pri abordab.

Me byensir sa i vin ek en kou, i vin avek en kou e petet serten linefikasite ki mon kontan ou'n lev sa size parske set en size pou nou vreman fer en deba lo la. Par egzanp eski, mwan ek ou, oubyen avek *Leader Lopozisyon*, bann Minis bann Egzekitiv dan pei, eski zot, zot devret aste diri ek lezot komodite sibvansyonnen?

Akoz zot pa kapab, zot napa sa mwayen? Eski en lotel ki fer profi ki pe vann en lasanm €400, i pe vann en manze pour €70 i devret aste diri a pri sibvansyonnen? En kestyion ki nou poz la. Oubyen eski, nou anvi ki nou bann dimoun ki napa mwayen, li i kapab annan sa mwayen, pou li kapab aste diri a en pri abordab.

Alor mon krwar nou lobzektiv i komen. E lobzektiv komen se fer sir ki sa ki pli ba, ki i annan mwens mwayen, li nou bezwen toultan protez li. Nou bezwen fer sir li i kapab manze. Pa bezwen mandyan. Nou pa ganny sa bann problem sosyal. Akoz i pa kapab manze, i pa kapab viv.

Sa nou bezwen fer sir, sa i enportan, i primordyal. Me

lafason ki nou fer li, i en kestyion enportan e mon ti a envit ozordi Lasanble pour zot, dan zot prop letan pou soumet bann propozisyon avek Gouvernman.

Parske nou osi nou pou fer refleksyon lo la. Me nou envit zot Lepep Sesselwa, pou fer sa refleksyon ansanm ek nou. Pou nou trouv en fason kot nou pe soutenir sa ki pli bezwen, dan fason pli ekonomik ki posib.

Parske se sa ki nou pe rode. E kot bann ki kapab, pey pli byen, zot pa bezwen resevwar en sibvansyon pour sa. I annan fason ki petet nou devret fer li. Me nou kit sa avek zot pou zot fer zot refleksyon. Nou osi, nou pou fer en refleksyon lo la. Me finalman lentansyon se protez sa ki mwen kapab.

Lo kote lenvestisman dan lepase, Mr Speaker atraver ou, Onorab Georges mon krwar, si ozordi apre 30an, nou trouv nou avek menm fasilité. I kler poudir, in annan mank planifikasyon dan lepase. E sa novo *management* ki la, pandan sa dernyen lannen ki zot in ganny apwente, zot pe travay, zot in vwar sa koman ne gro defayans.

Lefe ki dan lepase anba bann administrasyon oparavan, sa pa'n en priyorite.

Akoz byensir popilasyon pe grandi. Fasilité avek kalite prodwi ki nou annan, i bezwen modernize. Be si sa pa'n ganny fer, nou, nou pran li koman nou responsabilite ozordi pou fer sa ki byen.

Met larzan, dan en fason soutenab, pou fer sir ki sa bann fasilité, i la. Pou fer sir ki nou annan stokaz. Ki pou fer sir ki, si zanmen demen nou ganny bann sekous, son lenpak pou minim lo Sessel.

So se sa vreman ki nou pe fer. E si in annan fot dan lepase, se pou sa rezon ki dimoun pe rod sa transformasyon ozordi. E nou, nou la pou nou anmenn sa transformasyon. E mon kont lo zot sipor, mon kont lo sipor tou pep Seselwa, pou nou fer sa arive dan pli kourt dele letan. Mersi Mr Speaker.

### **MR SPEAKER**

Mersi Vis-Prezidan. Kestyon Onorab Hoareau.

### **HON JOHN HOAREAU**

Mersi Mr Speaker. Bonzour VP. Bonzour Mr Speaker, bonzour tou Manm a lekout e tou dimoun a lekout. Mr Speaker mon annan de pti kestyon, ki mon ti a kontan VP i klarifye pou mwan.

Premye kestyon, se ki an vi ki i annan bokou bann pei

Eropeen pe stock up lo grains pandan sa bann letan i annan lensertitud lo kote, sa lager ki pe arive ant *Ukraine* ek *La Russie*, eski sa i en fakter, ki pe afekte supply chain pou grains pou STC?

Dezyenmman Mr Speaker, mon ti a kontan demann VP anvi ki STC ti konstrir en *hall*, en pe byen lontan, ki apre dan en fason en lot in donn NSC. E sa *hall* mon mazinen in donn li anba en *MOU*. Esaki zot pou revwar sa *MOU* pou gete si zot kapab ganny akse avek sa landrwa, pou zot kapab ogmant zot fason zot lenfrastriktir pou storage?

### **MR SPEAKER**

Mersi Onorab. Vis-Prezidan.

### **THE VICE-PRESIDENT**

#### **AHMED AFIF**

Mersi Mr Speaker. Mersi Onorab Hoareau. Wi premyerman sa, lager ki'n deklare le 24 Fevriye, definitivman in enn bann rezon, ki'n ki fors bokou bann pri pou monte, ki fors dan lemonn antye mankman serten marsandiz. Parske *Ukraine* e *La Russie*, tou le de ti bann gran prodwiser dan bann manze. E sirtou kot i konsern lafarin.

Alors, wi enn faktor definitivman, ki pe pouz nou

pou mazin bokou plis. Nou ti pe deza mazin lo la, me in pou s nou dan en fason in met sa lanfaz, pli devan pou nou kapab pouse, pou annan en sistenm stokaz.

An sa ki konsern fasilité, kot *STC Hall* i ete, i sertennman en landrwa ki gran, me selon sa ki mon'n koz avek *Chairman*, E li byensir i an kontak ek tou bann dimoun teknik, dan sa domenn.

Zot krwar poudir sa fasilité, ki zot bezwen i bezwen ganny konstrir dan en fason spesyal. Parske ler, ou pou gard keksoz avek serten tanperatir, i vin avek tou son spesyalite, e pou lemoman zot pa idantifye sa landrwa, presizeman pou zot fer sa.

Me zot pou idantifye lezot landrwa ki zot annan, pou zot kapab met an plas sa *warehouse*. Me i toulstan en lide kot ou kapab fer serten stokaz petet. E si nou bezwen revwar sa *MOU*, sa i en keksoz ki mon mazinen *Management* a kapab, konsidere.

Me pou lemoman, i annan en plan definitif, en landrwa spesifik kot zot ti a kontan etablir sa *warehouse*. Avek ou permision Mr Speaker, si mon ti kapab permet *Chairman STC* donn en pe plis detay.

### **MR SPEAKER**

Wi Chairman. Ou a kapab azout en keksoz.

### **CHAIRMAN    STC    IMTIAZ UMARJI**

Bonzour a tous, *Leader Lopozisyon. Leader of Government Business*, atraver ou Mr Speaker. Sa ki konsern stokaz, nou stokaz i relman limite.

Nou demann in ogmant en kantite. Pou donn zot en pti detay, annou pran lafarin li menm. Lafarin nou bezwen stokaz li, on *average* 20 degré Celsius. E a sa tanperatir i kapab al ou 4 mwan a 5 mwan. Nou, napa sa fasilité, e dan lepase mannyer nou'n stokaz lafarin, nou'n bezwen zet en kantite. E sa i en pert pou STC, nou bezwen rekolte sa larzan lo en lot keksoz.

E pou stokaz pou 6 mwan, oubyen 5 mwan lafarin, an se moman sa fasilité ki nou annan, i kapab zis stokaz pou en mwan. Nou pe sey nou mye pou nou, ganny bato ki vin isi o pli vit posib.

I pou pran en pe letan pou konstrir. Sa i zis kote lafarin. Lo *fruit and veg*, i annan zonnyon ponmdeter. In ganny en kantite arive la. E nou napa landrwa pou stokaz zot. I pou gate avek nou tou.

So nou dan en *Catch-22 situation*. I tre difisil pou, apre sa mankman bato, ou pa ganny bato i vin par rafal. Tou nou bann *container* i reste dizon, *Salalah*, ki nou devret gannyen tou le de semenn, trwa semenn ou pa gannyen pou en mwan. Apre tou i vin ansam.

In arive en peryod lannen pase kot nou'n ganny 82 *container* lo en *shipment*. Zanmen nou'n deza gannyen sa kantite. Mon apel sa *feast or famine*. Letan ou gannyen, ou ganny gran kantite, letan ou pa gannyen ou pa gannyen pou en pe letan.

Me sa i an deor nou kontrol. E sa fasilité stokaz, ou pa pou kapab fer li, dizour ou landmen. So sa bann *challenges* ki nou annan, e nou pe sey nou mye pou nou kapab *manage* sa bann *challenges*.

Alor zot pou bezwen pasyante avek nou. Mersi.

### **MR SPEAKER**

Mersi Chairman. Nou pran kestyon Onorab Lemiel.

### **HON SYLVANNE LEMIEL**

Mersi Mr Speaker. Bonzour tou dimoun a lekout. Mr Speaker mon note ki VP in koz lo sa size komodite lo pri *RRP*. Kot bokou dimoun i kapab ganny sa bann komodite ki annan sa label *RRP*

lo la, a en pri abordab dan bann distrik dan bann laboutik.

Me problem tou dernyerman ki pe arive, mwan menm mwan serten marsan in apros mwan, dan distrik in koz ek mwan lo la, i se ki, zot pe ganny en pe problem pou zot akse sa bann komodite ki mark *RRP*, pou zot vann dan zot magazen pou soulaz konsonmater.

So mon ti a kontan konnen petet, akoz sa pe arive, e ki zot pe fer pou zot kapab remedye sa problem? Mersi Mr Speaker.

### **MR SPEAKER**

Mersi. VP ou le pran sa repons.

### **THE VICE-PRESIDENT AHMED AFIF**

Mersi bokou Mr Speaker avek ou permision mon ti a demann *Chairman* pou kapab reponn sa. I teknik. Mersi.

### **MR SPEAKER**

Tre byen *Chairman*, ou annan laparol.

### **CHAIRMAN STC IMTIAZ UMARJI**

Ok mersi bokou pou sa kestyon. Mon ava, donn leksplikasyon lo la. Wi nou'n annan en pe mankman, sa bann prodwi

*RRP.* Parey ponmdeter ki'n ganny leve dan sa kestyon.

Letan nou'n *run out of* sa bann ki pri abese. Nou'n annan bann ki nou'n fer vini par *air freight*. Sa pou enn pti pe letan, e i relye avek stokaz ankor. Si nou ti annan sa stokaz, si ti nou annan sa bato, pe vini tre souvan. Nou pa ti pou annan sa bann problemm. Nou volim in mont enormeman.

I paret bann lezot enportater, pa pe enporte ouswa zot pe ganny sa bann problemm. Alor lebra i tonbe, zot les tou lo STC. Nou volim in mont en kantite. Lafarin nou volim in plis ki double.

Ponmdeter, zonnyon in ogmante, selman nou napa sa stokaz. So ki mannyer nou pou kapab remedye sa? Se ogmant nou stokaz, ogmant nou kantite ki nou fer vini, pou anpes sa bann mankman. Ouswa si bann pti marsan, si i annan landrwa pou zot stokaz, letan i vini zot pran avek nou, zot stokaz li dan zot *cold store*.

Si zot annan *cold room*, selman mon krwar pa si sa bann marsan in envestir ladan *over the years*. E i pe vin en problemm pou Nasyon. So sa mon leksplikasyon. Nou pou sey nou mye pou nou pa manke pou en gran peryod letan.

Selman bato, pa dan nou kontrol. Mersi.

### **MR SPEAKER**

Mersi Chairman. Mon a pran kestyon Onorab Gabriel. Onorab Gabriel ou ti annan kestyon? Eski mwan bann Manm ki pe lev lanmen, mon pe pran zot nou. Me selman mon krwar pa si mon pou ariv dan sa kantite letan. Selman mon pe note toudmenm.

### **HON CONRAD GABRIEL**

Mersi Mr Speaker. *Welcome VP* ek ou delegasyon. Mon dir, bonzour tou dimoun a lekout. Spesyalman zabitan la Pointe Larue. Dabor, mon note ki ozordi i osi lazournen *Consumer Rights Protection*. E mon krwar i tonm byen avek *PNQ LOTO*.

Mr Speaker, dabor mon ti a zis kontan fer remark zeneral, mon'n ekout *Reply SONA*, mazorite Manm prezan dan sa Lasamble. I kler ki lo nou kote latab, bann Manm in tous tre fortman, sa size pri lavi dan Sesel.

Sa in fors Gouvernman sorti, kot nou'n vvar *Cabinet* in zwenn resaman pou reakte. Sa i demonstre klerman, ki Lopozisyon pe zwe son rol. Nou la pou fer lavwa Seselwa ganny tande parey ou ti fer pou Oktob, ler ou ti lo sa kote latab.

**MR SPEAKER**

Ale pa fer *long speech* Onorab.  
Nou napa letan. Ale.

**HON CONRAD GABRIEL**

Mr Speaker, demann pou lasistans i bokou la deor. VP i okouran sa. Mon krwar ou'n dir dan ou lentervansyon. Bann MNA osi i kapab konfirm sa. Mon enplor avek Gouvernman, pou seryezman enplimant en programm led o pli vit posib, pou soulaz nou bann dimoun. Labitud delo ti mont Point Larue.

I enportan met lo rikord, ki depi mon'n vin sa MNA, nou pa pe ganny sa problem parey labitud. *So far, nou ok.*

**MR SPEAKER**

Onorab ou kestyon.

**HON CONRAD GABRIEL**

Me par kont, serten nou bann frer ek ser distrik Mont Fleuri i pa'n ganny eparnye avek sa sityasyon.

**MR SPEAKER**

Onorab ou kestyon silvouple.

**HON CONRAD GABRIEL**

Yes, mon pe demann mon kestyon wi. Mr Speaker mon ti a kontan zis demann VP petet

pou klersi popilasyon la deor, tou piblik an zeneral,

akoz ki *Deputy CEO*, e non pa CEO ki'n ganny apwente dan sa pozisyon, ki vin fer bann gran deklarasyon lo bann size pertinan, ki pe seryezman afekte nou popilasyon?

Mon lans en mesaz for pou medya, silvouple rod dimoun ki ganny apwente dan sa bann pozisyon, pou vin eklersi nou ki pe pase dan STC Mr Speaker.

**MR SPEAKER**

Eski mwan, sa.

**(APPLAUSE)**

**HON CONRAD GABRIEL**

Mr Speaker-

**MR SPEAKER**

... sa kestyon,

**HON CONRAD GABRIEL**

... Mr Speaker mon santi-

**MR SPEAKER**

... eskiz mwan Onorab, mon'n ekout ou. Ou'n fer en *speech*. Ou'n demann en kestyon ki pa relevan, avek kestyon orizinal. Ou a eskiz mwan ...

**HON CONRAD GABRIEL**

... ok Mr Speaker mon ava demann kestyon.

**MR SPEAKER**

Ou annan en kestyon.

**HON CONRAD GABRIEL**

Mon ava demann VP ...

*(Interruption)*

**MR SPEAKER**

*Order silvoupe!* Ou'n annan en kestyon ki relevan avek kestyon orizinal?

**HON CONRAD GABRIEL**

... ki zot plan egzakteman *going forward*, pou ed pri komodite soulaz lavi pep Seselwa? Mersi.

**MR SPEAKER**

Mersi. Vis-Prezidan son dernyen pwen, mon krwar i kapab ganny adrese.

**THE VICE-PRESIDENT****AHMED AFIF**

Mersi bokou Mr Speaker, onnetman mon'n en pe perdi. Mon'n antre dan larivyer, nou'n sorti nou'n mont anler, fer letour pas Erport.

Finalman...

*(laughter)*

**MR SPEAKER**

Ale annou.

**THE VICE-PRESIDENT****AHMED AFIF**

... finalman konmsi i pe demande.

**MR SPEAKER**

Annou retourne, annou retourne lo size Vis-Prezidan.

**THE VICE-PRESIDENT****AHMED AFIF**

... finalman i pe demande, be ki nou pe fer lo kote pri. Onorab sa ki nou pe fer lo kote pri, se fer sir ki nou pe toulstan aste dan en volim ki permet ou ganny meyer pri.

E osi fer sir ki nou pe ganny bann fourniser e lozistik an plas ki pou permet sa bann marsandiz isi dan meyer dele, avek meyer pri ki ler nou met li lo letazer, i annan serten ki nou pe perdi lo la.

Me selman nou kapab minimiz sa kantite pou STC. Parske STC, li i bezwen kontinyen kapab fer profi, pou li kapab soutenir e gard pri ba. Parske si i perdi tou keksoz, i pa pou la. Alors nou pe fer sir nou aste avek fourniser apropiye. Nou pe fer sir nou aste, dan en fason, ki sa stok ki nou rode, i tenir. I pa gate.

Akoz ler i gate i vin en kou, nou perdi. E se sa vreman ki nou pe fer. E nou pe osi fer sir

ki dan tou bann landrwa kot nou'n met *RRP*, nou ankouraz sa bann marsan e pep Seselwa, pou fer sir zot pe vey pri, zot osi. Nou pe donn, nou pe konsyantiz bann dimoun, pou zot kapab konnen ki bann pri ki zot aste, i meyer valer pou ou larzan.

So vwala enn pti pe ki nou pe fer lo kote. Mersi bokou Mr Speaker.

### **MR SPEAKER**

Mersi *VP*. Mon pou pran en dernyen kestyon sorti kot bann Manm. Onorab Cosgrow.

### **HON WALLACE COSGROW**

Bonzour Mr Speaker. Bonzour tou dimoun. Mersi Mr Speaker. Mon ti krwar ou pou al mank mwan. Akoz mon kestyon i vreman pertinan.

### **MR SPEAKER**

Wi me selman. *Get to the point please.*

### **HON WALLACE COSGROW**

*I will get to the point* Mr Speaker. Mr Speaker, i enteresan bomaten Onorab Georges in koz lo kou lavi in koz lo sosyal, me i pa'n vvar li enportan pou koz sa pandan SONA.

Nou lo kote sa latab, lo kote sa latab, nou'n koz lo la.

**(APPLAUSE)**

### **HON WALLACE COSGROW**

E mwan mon pa'n mank okenn loportinite pou koz lo la Mr Speaker, dan repons SONA. E osi ler Minis ti la, semenn pase. Mr Speaker ...

### **MR SPEAKER**

Onorab, nou pe *run out of time* prosede.

### **HON WALLACE COSGROW**

Mon pe al lo la, mon pe al lo la. Mon pe al lo la Mr Speaker. Mr Speaker *VP* in dir nou ki poudir lalis komodite - 13 komodite esansyel, pa'n sanze. Mr Speaker, tou dimoun ki pe aste komisyon deor la i konnen poudir disel in ariv R10. Zonnyon konbyen arive, ponmdeter konbyen arive.

Ou pa kapab vin devan Lasanble, dir nou sa.

**(APPLAUSE)**

### **HON WALLACE COSGROW**

Mr Speaker mwan mon anvi konnen, mon kestyon, eski ...

*(Interruption)*

### **MR SPEAKER**

*Order!*

**HON WALLACE COSGROW**

Eski STC, i pou retourne lo son manda orizinal lo kote sa 13 komodite, e kontinyen sibvansyonn sa komodite, pou Kreol kapab *afford?* Akoz sete zot ki ti dir, zot pou vin *deal* ek kou lavi. Silvousle *deal* ek kou lavi, la Kreol i a kapab viv en lavi soulaze silvousle! Mersi.

**(APPLAUSE)**

**MR SPEAKER**

Mersi. VP ou annan en kestyon lo sibvansyon. Mon krwar i kapab antre.

**THE VICE-PRESIDENT  
AHMED AFIF**

Mersi bokou Mr Speaker. In fer, li osi in vir en pe otour. Me selman sa ki mon kapab asir Onorab, se kou lavi i en keksoz ki sa Gouvernman, in koz lo la depi ler nou'n vini.

Nou pe, nou pe fer tou sa ki nou kapab pour nou tenir kou lavi a en pri abordab. Nou pe fer tou sa ki nou kapab, pou fer sir ki pei i annan reveni, pou kapab pey dimoun pou zot kapab aste keksoz.

E sa i pli enportan ki zis vey kou komodite. Parske bokou sa bann kou i an deor nou kontrol. Alor ou bezwen fer sir, ou annan mwayen pou ou kapab pey sa bann keksoz, ler i

arive. E ozordi sa ki mon kapab dir ou se li STC, i annan li son manda pou li gard bann pri abordab.

Onorab si ou dir poudir pri, in ogmante pou sa 10 komodite, mwan mon poudir ek ou. Poudir i annan seren komodite, ki annan plizyer kalite. I annan *brand*, mon'n donn en legzanp taler. Si ou aste dile STC i annan son mark pou li, e si ou aste dile *Melody* i pou pli ser. Tousala dile menm.

Selman sa dile ki STC, i vann ou i pou son pri. E i pa'n sanze. Par egzanp zonnyon i 11.90 sa, sa ki STC pe vann. Al dan nenport laboutik *RRP* ozordi zonnyon i 11.90, i pa'n sanze sa. Ponmdeter i 11.90, i pa'n sanze. I pa'n sanze.

*(Interruption)*

**MR SPEAKER**

*Order!*

**THE VICE-PRESIDENT  
AHMED AFIF**

Selman i annan lezot kalite ponmdeter ou kapab rode, i bokou pli ser, me annou konpar, parey Angle i dir *like with like*.

Annou pa fer en konparezon, vir tou keksoz anba lao. E konfiz pep Seselwa. Sa ki mon pe dir, avek pep

Seselwa. E zot konnen zot parske, zot al laboutik zot aste.

Sa bann prodwi ki STC pe vann - sa 13 komodite sa bann pri, sa ki STC ozordi pe mark koman *RRP* - sa bann pri, i pri sa bann menm komodite ki avan *RRP* ki pa ti egziste sa letan - ti pe vann lo menm pri, e nou pa pe sanz sa.

I annan en deba ki'n leve la eski nou devret annan en lot sistem, pou fer sir ki sa ki malere i ganny bokou plis lasistans, kot i fodre? Wi nou pare pou nou regard sa. Si fodre nou revwar en nouveau sistem pri wi.

Selman primordyal pou nou, pri lavi i enportan. E nou bezwen asire, e tou dimoun ki dan bezwen i ganny sa 13 komodite a bann pri abordab. Mersi Mr Speaker.

### **MR SPEAKER**

Mersi.

**(APPLAUSE)**

### **MR SPEAKER**

Mon pou pran prezan kestyon siplemanter *Leader Lopozisyon*.

### **HON SEBASTIEN PILLAY**

(Pa ou benny dan disel ou?)  
Mersi Mr Speaker, Mr Speaker mon kontan ki ozordi mon kestyon pa'n ganny larepons.

Non! E ki nou'n anvi reponn kestyon ozordi pou nou eksplik Seselwa i byen! Nou danse dan delo beni, i byen!

Prezan annou vin lo kestyon ki nou pou fer. E mon swete ki *Chairman STC*, ou pa pran mwan mal, me selman sa i zis mon louvraz pou fer sir, ou fer ou louvraz e ou asire ki Seselwa i ganny komodite ki i bezwen.

Premyerman, STC i dir ek nou koumsa poudir i bezwen plis fasilité pou stokaz, eksetera, eksetera, eksetera. E VP i dir ek nou koumsa poudir, ti napa komodite esansyel ki ti manke eksetera, eksetera.

VP ou ek mwan, nou fer semen Anse Etoile, Yer ti annan laboutik, napa dipen ladan. Ti napa! Pa kestyon in fini, ti napa!

*(Interruption)*

### **HON SEBASTIEN PILLAY**

Aret koz la...

*(Mic switched off)*

*(Interruption)*

### **MR SPEAKER**

Ekout mwan silvouple. Si mon pa ganny en pe lord mon pou termin sa sesyon kestyon.

Onorab Pillay, Onorab Pillay ou pa la pou antre dan largiman avek Minis, avek VP.

Ou'n fer *statement*, li in fer son *statement*. Prezan ou annan drwa demann li kestyion, demann li kestyion silvouple.

### **HON SEBASTIEN PILLAY**

Ok Mr Speaker, anliny avek bann Konvansyon Lasanble, mon ava demann mon kestyion. STC i koz ek nou lo planifikasyon. Eksplik mwan alor ki mannyer STC, in kapab annan tre bon planifikasyon, pou al sers diven, ki'n sipoze ganny konfiske anba *case Anti-Koripsyon*, dan en *chiller STC*, dray par Mr *CEO STC*, pou al anmenn kot en *bonded warehouse STC*. Zot in kapab planifye sa ...

(*Interruption*)

### **MR SPEAKER**

Onorab! Onorab! Sa kestyion napa relevans, avek ou kestyion.

(*Interruption*)

### **MR SPEAKER**

*Order!* Sa kestyion napa relevans ek ou kestyion orizinal. Si ou annan enn ki al lo ou kestyion orizinal silvouple.

### **HON SEBASTIEN PILLAY**

Mersi Mr Speaker. Mon tir mon mask akoz mask i afekte nou tou dan en serten fason. Mr Speaker mon vin lo mon kestyion orizinal.

Mr Speaker, ler nou ti koz lo sa size pri lavi, nou ti ganny bokou rezistans ek Gouvernman e i byen ki Gouvernman pe reakte lo sa ki nou'n dir, pou zot fer sa ki nou'n demann zot pou fer. Prezan, nou, nou annan leksperyans lo sibvansyonn komodite, akoz se nou ki'n met sa bann komodite an plas. Pa zot.

(*Off-Mic*)

### **HON SEBASTIEN PILLAY**

Zot be ou en move lagrenn Onorab en?

### **MR SPEAKER**

Kontinyen silvouple.

### **HON SEBASTIEN PILLAY**

Azir koman en bon lagrenn Onorab ! Mersi Mr Speaker. Mr Speaker mon kestyion pou VP se ki akoz, akoz ki STC e ou Gouvernman pe komans koz lo etablir en sistèm *class* dan pei, kot serten komodite ki pou lo pli bon, lo pli o nivo, pou

ganny vann avek serten, e larestan dimoun pou aste en komodite ki lo en kalite enferyer ?

Ou koz ek nou lo ponmdeter Mr Speaker, mon pe vin lo ponmdeter. Ponmdeter i pouri, sa ki dimoun pe aste i pouri Mr Chairman.

### **MR SPEAKER**

Ale lot kestyon.

### **HON SEBASTIEN PILLAY**

I pouri! Zonnyon sa ki dimoun pe aste, i pouri. *Ok?* So mon bezwen met sa devan ou, akoz se landrwa pou mwan fer ou bouze e pas a laksyon e zwe rol ki ou sipoze pe zwe!

Dezyenmman Mr Speaker, dezyenmman Mr Speaker. Mon pa konnen akoz zot pe danse parey dyab dan delo beni ozordi, me i paret, laverite i ofans zot. So annou get sa byen Mr Speaker.

E ou konn tre byen sa ou osi akoz mon konnen ou'n pase, i annan dimoun ki'n koz ek ou lo la. *Ok?*

Ki mannyer ou kapab annan en sityasyon kot, margarin, ki ti pe vann avan sa R19 in ariv R26? E VP i koz nou lo kalite margarin. Me sa kalite margarin ki lamazorite paran i aste, pou servi pou met dan dipen zot zanfan pou li al lekol.

So VP pa kapab vin dir ek mwan koumsa, al dir ek sa dimoun al aste en kalite enferyer, akoz li son stati i pli ba. I pa marse koumsa.

### **MR SPEAKER**

Bon. Mersi.

### **HON SEBASTIEN PILLAY**

Non Mr Speaker mon pa ankor fini. Mon annan en dernyen pwen mon le fer Mr Chairman. Avek ou permisyon mon annan en dernyen pwen mon le fer Mr Speaker.

E mon swete - Mr Speaker sa ki mon pe fer, mon pe fer dan bonnfwia mwan. Mon pe fer en fason ki ozordi, dan sa moman difisil ki nou pe pase. Nou Lopozisyon nou zwen nou rol, pou met presyon lo Gouvernman pou li reakte, parey nou'n fer li fer ek *welfare* ! Parey nou fer li fer ...

(Mic switched off)

### **MR SPEAKER**

Wi! Onorab! Silvouple, demann ou kestyon, si non mon pou ferm sa deba. Ale terminen.

### **HON SEBASTIEN PILLAY**

Mr Speaker, ou vwar ki mannyer bann Manm sipoze reprezent zot distrik pe reakte?

Napa kestyon, kan zot sipoze pe defann lentere zot zabitan?

Zot devret onte bann Manm Onorab.

*(Interruption)*

### **MR SPEAKER**

Si Onorab napa kestyon, i pe - Si Onorab napa kestyon i pe argimant avek Manm lot kote, mon sipoze, nou pou termin sa deba. Nou pou termin sa deba la. Nou'n - en fwa la.

***(APPLAUSE)***

### **MR SPEAKER**

Minis. Vis-Prezidan e Mr Chairman, mon a dir zot mersi, pou zot partisipasyon. Mon krwar zot in reponn kestyon ki annan. Si i pa'n annan kestyon relevan, nou pa kapab antre dan sa bann kestyon ki pa relevan. Mersi.

Orevwar e *bonne journée*.

### ***(THE VICE-PRESIDENT AND HIS DELEGATION WAS EXCUSED FROM THE HOUSE)***

### **MR SPEAKER**

Mon akout ou Onorab Pillay.

### **HON SEBASTIEN PILLAY**

Mersi Mr Speaker. Mr Speaker mon napa okenn lanmertim avek desizyon ki ou'n pran.

Mon dezapwente, me i ou desizyon ki ou'n pran. Sa ki mwan bezwen dir ou, se ki ou souvandfwa reakte lo azitasyon bann Manm lo lot kote latab.

I byen. Ou koman Speaker i ou rol pou met lord dan Lasanble. Me i mon rol osi, pou fer sir ki ler en Minis, oubyen Minister i vin isi, i pa servi proteksyon ki i gannyen avek son mazorite, pou li *avoid* koz lo bann size ki pe afekte dimoun la deor. Pou en Vis-Prezidan dir avek sitwayen, poudir ponmdeter i R11.90, kan dimoun pe pey li R13, i pa akseptab!

Pou en Vis-Prezidan dir napa mankman lafarin, oubyen dipen i pa akseptab! E mon krwar ki koman en Gouvernman responsab, e koman en *Leader Zafer Gouvernman* responsab Onorab Georges, I devret osi *step-in* e dir son Gouvernman, be tyonbo en kou, zabitan Mamelles, pe soufer ek sa sityasyon.

### **MR SPEAKER**

Ale, be ou, ou tyonbo en kou prezan!

*(laughter)*

### **MR SPEAKER**

Bon nou pe retourn lo menm size. Nou'n fini avek sa size, Madanm Clerk nou a pran en *sanitizing break* silvouple, pou nou apel lot Minis.

(*technical break*)

### **MR SPEAKER**

Bonzour e byenveni Minis Antony Derjacques Minis pou Transpor e mon swet la byenveni osi son delegasyon Mr Patrick Andre. PS pou *Land Transport* Mr Parinda Herath, CEO pou *Seychelles Land Transport Agency* e Mr Ronny Brutus CEO pou *Seychelles Ports Authority*.

Nou a komans avek kestyon bann Manm. Mon pran kestyon Onorab Desheila Bastienne.

### **HON DESHEILA BASTIENNE**

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou Manm Lasanble e en gran bonzour pou tou piblik la deor espesyalman zabitant Perseverance.

An vi ki bann enstriker dray pe fer fas avek bokou difikilte, tel ki zour e ler pou komans fer zot *training off-road* dan *cone*, landrwa apropiye ek ler ki zot devret arete,

Eski Minis pour Transpor i kapab konfirm avek Lasanble ki plan ki zot annan pou ed bann enstriker dray fer zot travay dan konfor, annakor avek ler apropiye dapre demann zot kliyan?

Eski zot annan okenn plan idantifye en landrwa pou met a dispozisyon bann enstriker dray e osi konstrir en *driving school*, kot zot ava annan tou zot facilite an plas vi ki bann enstriker zot pe pas dan bokou difikilte pou fer zot travay dan *car park NSC*? Mersi.

### **MR SPEAKER**

Mersi Onorab. Minis ou a pran sa kestyon pou repons.

### **MINISTER DERJAQUES**

### **ANTONY**

Mersi Mr Speaker. Bonzour Onorab *Leader of Government Business, Chief Whip*, Onorab. Bonzour tou Seselwa ki pe ekoute.

Mr Speaker bann enstriker i servi landrwa kot Stad Linite pou zot fer bann aktivite montre dray. Pou nou kapab servi sa landrwa pou fer pas tes e osi pou bann enstriker pratik montre dray nou ti antre dan en kontra avek Lakor NSC. Me avek restriksyon enpoze par Minister Lasante

akoz COVID-19 i ti restrikte ler loperasyon pou anpes propagasyon sa maladi COVID.

Avek deklarasyon Minister Lasante tou dernyerman nou'n retir sa bann restriksyon, nou ti konsilte avek NSC pou revwar sa sityasyon, e nou'n tonm dakor pou tir bann restriksyon ki ti an plas lo bann enstriker e i kapab ganny travay parey avan. Bann ler loperasyon prezan i *comme* swivi;

Lendi ziska Vandredi 7er bomaten ziska 6er diswar,

Sanmdi ek Dimans 7er bomaten ziska 1er apre midi.

Dezyenm kestyon Mr Speaker dan lepase Minister in deza fer demann avek Minister Later ek Labita pour ki en landrwa ouswa en bout later i ganny idantifye pou fer bann *off-road driving test*.

Me ziska prezan nou pa ankor reisi dan sa demars, nou ankor angaze dan sa demars. Par kont pou enstriker lo Praslin, nou'n nobou ganny en morso teren lo zil Eve pou fer tes e osi pou bann enstriker servi. En fwa ki travay in konplete zot pou kapab komans servi sa novo landrwa Praslin.

An sa ki konsern pou konstriksyon en *driving school* fodre fer resorti ki pou le moman i pa ankor e i pa nou manda koman Gouvernman

pou direkteman konstrir en *driving school*.

Bann enstriker zot menm zot devret konsider atraver zot lasosyasyon e menm koman bann endividé pou zot ouver, etablir en *driving school*. Mersi Mr Speaker.

### **MR SPEAKER**

Mersi Minis. Onorab Bastienne ou annan kestyon siplemanter lo sa enn?

### **HON DESHEILA BASTIENNE**

Wi Mr Speaker. Mon annan 2. Eski Minis i kapab dir nou Lasanble ki pe arrive ek sa lokasyon kot Sainte Anne Jetty ki ti'n deza ganny propoze pou donn bann *driving instructor*? Prenon kont ki sa landrwa i deza annan tou facilite, i ase gran, zot kapab fer zot *training* dan konfor e an se moman sa landrwa la i vid, personn pa pe servi.

E mon dezyenm, Minis parey ou'n dir en *driving instructor* i kapab antre zot, zot kapab zwenn pou zot ouver en *driving school* wi, be eski Gouvernman i pou pare pou donn zot sa sipor, pou asiste zot atraver en lokasyon, en landrwa pou zot *ok ansanm* parey ou'n dir *build* sa *driving school*? Mersi.

**MR SPEAKER**

Mersi. Minis ou repons.

**MINISTER**                   **ANTONY**  
**DERJAQUES**

Mersi Mr Speaker. Ti annan kozri lo Sainte Anne Jetty e sa landrwa in ganny transfer ek Lapolis e Lapolis pa ankor *comme back*. I ankor annan osi bann diskisyon si i pou ganny servi par bann lot operator e i annan diskisyon par egzant avek por, lo ki bezwen bann loperasyon prive i kapab servi espesyalman kot sa enfrastruktir deza i ete.

Me pour le moman pou Minister Transpor nou ankor pe servi kot *National Sports Council* kot sa landrwa ki ti pe ganny servi oparavan. Pou en *driving school*, wi anba seksyon 28 *Road Transport Act* se Minis direkteman ki kapab etablir e fasilit en *driving school*.

Be dan sa lepok kot nou ete, pou zot kapab lwe en landrwa pou etabli bann laklas teori apre pou zot kapab fer zot pratik vin asosye ansanm enkorpor en sisyete mon pe ankouraz bann *drivers*, bann *instructors*, pou zot vin ansanm e ed zot lekor.

Gouvernman *comme* i kapab i ava ede i ava fasilit. Solman a sa moman Minister ek Gouvernman napa sa larzan

pou al kre en batiman. Alors i preferab ki bann *instructors* bann ki enterese i rod *backing* avek lasosyasyon zot kapab al kot en labank komersyal e zot kapab vin ansanm etablir sa fondasyon kot zot kapab devlop en *driving school*.

I pa tro difisil pou zot asosye e lwe en landrwa pou fer teori. Zot bezwen en gran *room* en laklas avek en administrasyon depen lo grander sa *driving school*, apre bann fasilit nou semen i la, bann landrwa *National Sports Council* i la.

E kekfa a lavenir si nou ganny sa morso later parey nou'n gannyen pou Praslin nou ganny enn Mahe nou kapab al pli lwen.

Alor pou le moman i nou *Policy* pou *facilitate*, solman nou pa ankor arriv sa nivo ek sa moman e nou napa Bidze pou nou konstrir en laklas par egzant pou teori. Mersi Mr Speaker.

**MR SPEAKER**

Mersi Minister. Mon a pran kestyon Manm ki'n lev lanmen. Onorab Andy labonte.

**HON ANDY LABONTE**

Mersi Mr Speaker. Bonzour Minis ek *panel*. Bonzour tou dimoun ki a lekout. Minis dan

ou larepons ou'n dir ki ti annan restriksyon avan, me apre bann restriksyon in ganny tir e ou'n mansyonnen poudir *from Lendi a Vandredi i 7er bomaten a 6er diswar e Sanmdi a Dimans i 7er a 1er apre midi si mon'n byen ganny ou.*

Me la deor bann *driving instructor* pou zot i *still* en problemm. Pou zot i en sel lenkonvenyan e zot pe demande poudir, mon ti a kontan petet si ou konfirm ek sa Lasanble si ti annan en konsilyasyon?

Akoz aparaman zot ti'n demann en miting avek ou lofis depi boner Desanm e i parey mwan zot pa'n zanmen ganny en repons zot pa'n zanmen zwenn *Chairman Lasosyasyon*.

Apre dezyenm kestyon ki mon ti a kontan konnen, eski tou bann *driving instructor* i obligatwar ki zot *full time or part time*? Akoz i annan en konplent la deor ki serten *instructor* i *part time* e sa i pe kre en problemm pou bann dimoun ki pe fer sa *full time*. Mersi.

### **MR SPEAKER**

Mersi Onorab. Minis ou ava adres kestyon *please*.

### **MINISTER DERJAQUES**

Mersi Mr Speaker. Mr Speaker mon krwar Onorab in mal

ganny son lenformasyon. I devret tyek son sours ankor. Nou'n zwenn bann *driving instructors*. Mon'n dan sa miting avek mon *PS* e nou'n annan en long sesyon avek zot.

Mon'n osi zwenn bann endividé espesyalman en msye ki ti anvi konnen ki mannyer pou fer son *driving school*, e nou'n menm ed li pou dir li kwa ki i devret annan dan en proze. E bann *correspondence* osi in kontinyen.

Mon fer li mon devwar pou zwenn tou dimoun ki annan en *request annefe* pou transpor, sa ki konekte avek mon Minister pou mwan zwenn zot e pou ede.

An sa ki konsern bann *license* si i *fulltime* ouswa *part time* ou pas atraver *Licensing* ou ganny ou *license* e ou kapab fer li *fulltime* ouswa ou kapab fer li *part time*. Mon ti a demann osi *PS Andre* osi pou antre lo sa 2 kestyon. Mersi Mr Speaker.

### **MR SPEAKER**

Wi, *PS* ou a kapab azoute.

### **PS PATRICK ANDRE**

Bonzour Mr Speaker. Bonzour tou bann Onorab. Bon parey ki Minis in fer resorti nou'n angaze e nou kontinyen annan langazman avek bann *driving instructors*. E Minis in fer resorti ki nou ti zwenn zot e dan

sa miting ki nou'n annan in annan plizyer keksoz ki zot in met devan. E ki i annan bann ki nou'n konsidere, i annan serten keksoz osi ki nou'n dir ek zot ki sa nou pa pou kapab fer.

Par egzanp enn bann keksoz ki zot ti demande pou fer, ozordi *theory test* i zis an Angle, zot in demande pou nou fer li dan 3 langaz. Mon kapab dir poudir travay i avanse pou tradwir tou sa bann kestyion ki nou annan, an Angle, An Franse osi an Kreol, ki ler en etidyan i vini i annan 3 swa, swa i deside fer son legzanmen en Angle, an Kreol oubyen an Franse sa i sa 3 lalang ki nou servi li menm li.

So nou angaze avek zot ok? Me nou ankor pe an diskisyon an vi bann lezot keksoz ki zot in met devan nou, ki nou a pe kontinyen etablir dan pli bon fason pou nou kapab fer serten keksoz. Mersi Mr Speaker.

### **MR SPEAKER**

Mersi. Onorab. Labonte mon a permet ou en klarifikasyon si ou annan.

### **HON ANDY LABONTE**

Mersi Minis. Mersi Mr Speaker. Mersi Minis pou ou larepons. Minis petet si mon ti kapab ganny sa dat kan ki sa miting ti

ganny fer si ou ti annan avek ou?

Apre senp rezon akoz parey taksi ou napa Drwa annan en lot biznes, e se la rezon ki bann *instructor* pe rode akoz ki *driving instructor* i kapab annan en lot biznes *as well*. Mersi.

### **MR SPEAKER**

Mersi. Minis ou annan en klarifikasyon?

### **MINISTER**

### **ANTONY DERJAQUES**

Mr Speaker lo dat ek ler mon'n osi demann *PS*, nou pa mazinen pou le moman, solman nou ava anvoy kot Clerk pou donn li son dat.

E nou'n diskit longman lo *computerization*, nou'n diskit dan sa miting osi pou fer li bokou pli fasil pou zot, zot in anmenn bann pwen osi lo ki mannyer sa tranzisyon ant oparavan avek *computerization*.

An vi ki ler nou ti komans dan Minister nou ti bezwen sispann 5 dimoun dan Minister e zot ti al *remand* le 26 Desanm lannen pase, akoz ti annan serten alegasyon. E Minister Transpor ti bezwen *move towards computerization*.

Mon konnen in kre en pe difikilte e zot in anmenn sa bann difikilte kot nou, bann lot

size ki'n ganny kouver, se zot ti pe dir ki napa ase bann liv e nou bezwen dir zot kote bann liv i ankor pe ganny trouve e pe ganny vann e nou'n met bann stok dan nou biro kot *Land Transport Department*.

Bann sizesyon in ganny pran kont e bann diskisyon i ankor *ongoing*. An sa ki konsern taksi sa i en size spesifik e Polisi pa ankor sanze. Annefe *Cabinet 2* semenn pase nou'n konsidere si nou pou *Maintain* taksi avek *owner operator plus one*, par egzanp son madanm i ouswa son partner, *Cabinet* in dir wi.

Pou *driving license* i ankor reste pou le moman ki ou kapab annan ou *license* si ou kalifye pou ou montre *drive*, e ou kapab *fulltime* ouswa ou kapab *part time*. Pou le moman personn pa ankor vin dir nou ki i annan en problem mazer pou sanz sa Polisi. Mersi Mr Speaker.

### **MR SPEAKER**

Mersi Minis. Mon a pran kestyon Onorab Sandy Arissol.

### **HON SANDY ARISSOL**

Mersi Mr Speaker. Bonzour Minis avek ou delegasyon. Bonzour tou bann Manm. Tou zabitan Bel Ombre ki pe ekoute. Mr Speaker mon ti a kontan

demann Minis ki bann prosedir i annan an plas ozordi pou en zenn ki anvi aprann dray pas atraver? Premye kestyon.

Dezyenm kestyon mon ti a kontan demann Minis si mon pa tronpe Lalwa i fer provizyon pou aprann dray dan en *vehicle*, me i pa idantife si i en transpor otomatik swa i en transpor *manual*.

Alor kestyon ki mon ti a kontan demann ou la, eski i en endividé ozordi ki anvi aprann dray, eski i annan en swa pou li aprann dray dan en loto otomatik, oubyen i forseman bezwen aprann dray dan en loto *manual*? An vi ki tou mazorite transpor ki pe antre dan pei ozordi i otomatik. E nou annan bann dimoun avek abilite spesyal ki osi i annan son mwayen i ti anvi aprann dray. Mon dezyenm kestyon.

Mon trwazyenm e mon final, an vi ki nou loto bann zafer *Learner*, nou lo bann zafer trafik mon ti a kontan demann ou Minis si Gouvernman pe mazin revwar osi laz *Learner* pou annan dimoun ki mont bann zenn ki mont moter? Parske avek statistik i annan en dezord lo semen, kantite aksidan e zot napa lord pou pyeton oubyen lezot dimoun ki servi transpor e semen piblik. Mersi bokou.

**MR SPEAKER**

Mersi. Onorab. PS i a pran kestyon, wi.

**PS PATRICK ANDRE**

Mersi Mr Speaker. Bon pou premye kestyon Onorab se ki prosedir pou en dimoun aprann dray; normalman en dimoun letan i deside pou li aprann dray i bezwen al kot Lapolis pou anrezistre li e pou met lapwentman pou fer son *theory test*.

En fwa ki li in fini fer son *theory test* dizon in *successful*, la aprezan i retournen pou li konplet son formalite i annan en form ki i bezwen konplete kot Lapolis aprezan i annan *medical test* tou ki i pou bezwen fer. En fwa ki li in fini fer sa *then* i ganny *issue* avek en *Learner's Permit*.

Sa *Learner's Permit* la aprezan i al rod en *instructor*, si i pa'n etablir enn, preznan sa *instructor* i montre li dray parey ki i devret ganny fer. E letan sa *instructor* i santi poudir ki sa novis *driver* parey nou apel zot in pare pou fer son *practical test* la i *proceed*. I annan 2 tes ki ganny fer, i annan en *off-road test*, sanmenm sa ki ganny fer laba Roche Caiman apre i annan son *on-road test* ki i ganny fer.

En fwa ki sa in fini si in *successful then* Lapolis i *issue* li avek en *Competency Certificate* e la li sa endivid i pran sa *Competency Certificate* i al kot *Licensing* pou li ganny son *proper driving license*. Sa i prosedir ki mannyer ki nou antre ladan.

An sa ki konsern kalite veikil, nou, nou pe met lanfaz ki tou dimoun letan i aprann dray i bezwen aprann dray dan en loto *manual*, pa otomatik.

Rezon pou sa si ou aprann dan loto otomatik ou pou annan en dezavantaz, par kont direkteman si ou pa kapab demen ou ganny ou en loto ki *manual* apre ou pa pe kapab *maneuver* ladan.

I annan sa bann prosedir, sa bann *process* i kapab ganny fer, *then* ou kapab ler ou'n ganny ou *license* dray en loto otomatik. Napa pou le moman en spesifik *license* swa pou *manual* swa pou otomatik. Ok?

Apre ou trwazyenm kestyon, pou laz *scooter*, parey zot konnen ti annan en amannman Lalwa ki ti fer ki ti sorti 16an pou vin 18 an pou ou kapab mont moter, so sa Lalwa i an fors *as we speak now*. Mersi Mr Speaker.

**MR SPEAKER**

Mersi. Mon a pran kestyon  
Onorab Roucou.

### **HON MICHEL ROUCOU**

Mersi Mr Speaker. Bonzour Minis ek ou lekip. Bonzour spesyal pou bann zabitan Mont Fleuri. Minis si ou kapab die nou ki bann prosedir pou kapab vin en *driving instructor*?

Apre si ou kapab dir avek nou eski i annan en kota lo konbyen ki en *driving instructor* i kapab sarz en kliyan ouswa sakenn i kapab vin avek son pri? Mersi.

### **MR SPEAKER**

Mersi Onorab. Minis wi.

### **MINISTER ANTHONY DERJAQUES**

Mr Speaker mersi. PS i ava reponn.

### **MR SPEAKER**

PS ou annan laparol.

### **PS PATRICK ANDRE**

Mersi Mr Speaker. An sa ki konsern prosedir pou en *instructor* aprann dray pou li vin en *instructor*, normalman i pa *similar* parey ki en tes *drive* me selman li i bezwen fer son legzanmen teori osi son legzanmen *practical, ok*.

Sa prosedir i mars parey, en fwa ki zot, zot fini pas atraver

zot bann prosedir zot ganny teste *practically* e osi teori, e en fwa ki nou donn zot en *Competency Certificate ok*, sa i ganny donnen par Departman *Land Transport*, me selman an kolaborasyon avek Lapolis.

Sa i en konbinezon ansanm ant sa 2 lenstitisyon kot zot donn sa sertifika konpetans. E la aprezan zot al kot *Licensing* pou zot *apply* pou zot ganny zot *Driving Instructor's Permit*. E lot kondisyon ki al avek se ki kalite veikil ki zot bezwen pe servi pou zot montre dray.

Tou ban veikil ki ou pe servi pou montre dray anba Lalwa i bezwen annan *dual control* kot sa enstriker li osi i kapab *depress* son *clutch* oubyen son fren dan ka en *emergency* kot sa novis *driver* pa pe mannye byen, oubyen pou *avoid* en sityasyon ki kapab arrive.

An sa ki konsern kou konbyen pou koute, dan Regilasyon i pa egziste okenn kou se sa bann *driving instructors* zot menm zot antre dan en Lagreman avek sa bann novis *drivers*, pou zot pey en sonm ki akseptab. Mersi Mr Speaker.

### **MR SPEAKER**

Mersi PS. Mon a sey *squeeze in* kestyon Onorab Zialor.

### **HON NADDY ZIALOR**

Mersi Mr Speaker. Bonzour Minis ek ou delegasyon. Mon annan en *follow-up question with regards to* teori; baze lo repons ki Minis in donne in fer resorti ki enn bann *request* sete pou *translate* teori to Kreol ek Franse.

Mon pe osi al pli lwen ki sa petet pou demann avek zot, eski zot pe osi mazin petet la dan lespri *accessibility* en dimoun ki pa konn lir me ki anvi aprann *drive*, ki prosedir ki li i swiv? Epi PS mon apresye larepons ki ou'n donne, ankor enn fwa petet en komanter.

Eski ou pa krwar letan ou pe fer bann Regilasyon kot ou pe dir en dimoun non, baze lo abilite spesyal oubyen limitasyon ou pe depriv li par lefe ki ou pa ankor mazin dan en laliny pou ou osi enkli serten sityasyon, en dimoun petet ki pe viv avek en dezabilite fizik ki anvi aprann *drive*. So en keksoz pou zot mazin lo la. Mersi bokou.

### **MR SPEAKER**

Mersi. Son dezyenm pwen mo krwar i pa pe vreman demann en repons me i annan son

premye pwen. Lekel ki ava adrese? Minis.

### **MINISTER DERJAQUES**

Mersi Mr Speaker. Mr Speaker akoz sa ki bann *learners* i bezwen aprann i anliny osi avek standar enternasyonal. I neseser ki zot bezwen annan sa *basic ability* pou zot lir, e osi pou lir bann *signs* e pou rekonnit bann *signs* ek ki zot mean lo bann semen tou lede Sesel avek enternasyonal ler zot vwayaze.

Alor en *minimum* abilite pou ou kapab lir e konpran sa ki ganny ekrir e i neseser. Pou le moman nou pa ankor devlop en *Scheme* pou bann ki pa konn lir ek ekrir ditou. Solman nou bezwen fer en keksoz a en standar ki akseptab. Mon pa konnen si PS i annan okenn keksoz pou azoute. Mersi.

### **MR SPEAKER**

Mersi. PS ou annan en keksoz pou azoute, vitman.

### **PS PATRICK ANDRE**

Pa vreman Mr Speaker. Me selman mon ti oule zis petet enform Onorab poudir nou a pe get dan bann fasilite pou bann dimoun ki annan serten dezabilite pou zot kapab osi aprann dray, ki kalite veikil ki

kapab ganny itilize pou fer sa arrive. Akoz serten kondisyon lasante ki serten ban sitwayen i kapab annan.

Me selman sa i en keksoz ki nou pe travay lo la, ansanm ki nou ti annan sa rankont avek dimoun sorti dan *United Nations* ki ti isi pli boner sa lannen. Be nou pe travay lo serten keksoz pou vvar.

E osi nou pou an diskisyon avek lasosyasyon pou bann dimoun avek serten andikap osi pou vvar, ki mannyer nou kapab met sa ansanm pou ki nou pa afekte Drwa sa bann dimoun tel kont. Mersi Mr Speaker.

### **MR SPEAKER**

Mersi. Minis dernyen mo.

#### **MINISTER**

#### **DERJAQUES**

Mr Speaker mersi. Mon *personal assistant* in anvoy mwan dat ki nou ti fer miting avek bann *driving instructors*, sa sete le 3 Novanm 2021. Mersi Mr Speaker.

#### **ANTONY**

### **MR SPEAKER**

Mersi. Nou a termin la pou sa kestyon. Nou a repran kestyon 11er. Mersi.

**(BREAK)**

### **MR SPEAKER**

Mersi pou repran e nou a kontinyen avek en lot kestyon. Onorab Desheila Bastienne.

### **HON DESHEILA BASTIENNE**

Mersi Mr Speaker. Ankor enn fwa bonzour a tous, bonzour Mr Speaker. An vi ki dan nou liv Kod Larout, ki nou pe servi an se moman laplipar bann lansenny ek lareg pa anliny avek nou semen,

Eski Minister pour Transpor i annan plan reviz Kod Larout pou fasilit bann ki pe aprann dray letan zot lo semen e osi pandan zot legzanmen? Mersi.

### **MR SPEAKER**

Mersi Onorab. Minis repons.

#### **MINISTER**

#### **DERJAQUES**

Mersi Mr Speaker. Departman Transpor i deza pe antreprann revizyon *Highway Code* ki egziste. Bi revizyon e pou moderniz li e met li an akor avek bann nouvo Lalwa e osi bann siny ki nouvo. E osi pou fer li pli o nivo posib an kont nou bann lobligasyon internasyonal.

Nou bezwen pran kont ki i annan bokou drayver Seselwa ki ler zot al aletranze zot pe dray. Sa revizyon i ava ed zot

osi. Mon'n osi lans en lapel avek tou bann drayver pou tanzantan pas dan zot *Highway Code* epou rafresir zot memwar. Akoz si en zouti ki pou kit zot zour a zour avek bann Kod Kondwir lo semen.

Me non, pa en zouti ki zot lir zis pou zot pas zot legzanmen teori. Lo sa menm laliny ban drayver i osi pe devret kit azour e pran kont bann nouvo Regilasyon legal ki pe ganny adopte e passe de tanzantan. Mersi Mr Speaker.

### **MR SPEAKER**

Mersi Minis. Onorab Bastienne siplemanter.

### **HON DESHEILA BASTIENNE**

Wi, Mr Speaker en kestyon. Minis ler nou pe regard nou semen ozordi i annan bokou nouvole, *roundabout* bann keksoz ki'n ganny fer.

E apre letan nou pe regarde en etranze i vin Sesel e li i pa al fer okenn *practice*, i pa ankor konn nou semen i pa ankor azour avek nou *code* avek nou semen li i, akoz i annan en *license* enternasyonal e nou pa kapab prouve si i *genuine* oubyen non - me li i ale i pey R500 e i ganny en *license* pou li dray lo nou semen.

E letan nou pe regard nou annan Seselwa ki parfwa i

annan ki al tes 3, 4 fwa, 5 fwa i *fail* menm nou pe, mon ti ava kontan si ou ti kapab konfirm avek sa Lasable, ki laprev zot annan ki sa etranze li i ok pou li ganny sa *license*, san ki i fer okenn tes, me letan nou get nou Seselwa zot pe kontinyelman ganny difikilte pou ganny zot tes.

E prenon kont ki *pass mark* konmela i 80poursan, i annan bokou Seselwa ki pe *fail* atraver 79poursan, 75poursan. Eski ou Minister pe konsider reviz sa bann *pass mark* e donn en sans pou nou annan dimoun ki en pti pe mwen kapab akademikman konsider ki sa *pass mark* i kapab desann ki omwen 60poursan? Mersi.

### **MR SPEAKER**

Mersi Onorab. Minis ou repons silvouple.

### **MINISTER**

### **ANTONY DERJAQUES**

Mersi Mr Speaker. Mr Speaker pou bann *license* enternasyonal i annan en Konvansyon enternasyonal ki bann pei in group ansanm pou zot etablir bann standar minimonm. E parey mon'n reponn dan sa premye kestyon i annan bann *basic skills* ek bann *basic signs*, ek bann *basics* prekosyon ki tou drayver dan en fason

internasional, i ganny enkli dan zot bann *exam teorik* e dan standar semen ek bann *signs* lo bann semen.

Napa en lot fason pou fer ki bann etranze i kapab dray isi Sesel e nou annan en kantite touris, nou annan en kantite biznes parey *car hire, omnibus, luxury cars* ki pe vini, *saloons* ki isi nou fer bann touris ouswa bann viziter pas en lot tes Sesel, sa pou vin en baryer.

Zot pa pou kapab debarke lo en avyon pran zot *booking* avek sa *car hire* lo *Airport* e pran sa al kot zot lotel e fer letour lo zil.

Alor nou bezwen pran kont sa bann Konvansyon internasional, nou bezwen fer parey bann lot pei i fer, e sa i *reciprocity*. Par egzanp si ou annan e ou'n pey ou *license* internasional ou al Moris en Seselwa i debarke lo *Air Seychelles* i pran son *car hire* i drive, e en morisyen i vin Sesel i pas son tes Moris e i pey son *license* parey sa Seselwa ki pe al Moris i pran en *car hire* isi Sesel e i *drive*.

Alor i annan bann standar ki'n ganny etablir e sa i pou tou transportasyon, i pou tou bann profesyon, i kapab en Dokter kot i annan en *minimum standard*; i kapab pou en Avoka i annan bann standar

*minimum* osi kot ou kapab *facilitate* sa bann profesyon, sa bann okipasyon, sa bann standar pou *drive*. E i akoz lemonn i en *global village*, e alor i bezwen annan sa korperasyon.

E alor pou reponn ou direkteman, i annan bann standar minim. Sesel i bezwen mentenir son standar. Moris oubyen Sid Afrik bezwen mentenir son standar e alors sa i permet ki ler enn i al vizit dan lot pei zot kapab *drive*. E i pou s arezonn ki nou bezwen toulstan gard nou standar Sesel.

Pou reponn sa dezyenm kestyon, ler ti ariv sa problem ek Departman e kot detrwa dimoun ti bezwen kit travay nou ti bezwen bouze pou al *digital*. En sel kou tou dimoun ti annan en tes pou pase kot i difisil, akoz i napa enterferans en dimoun kot ou avek ou legzanmen. I pirman lo *computer*.

Alor ti annan difikilte oparavan kot dimoun ki ti pe pas *pass mark* ti 30poursan, me avek sa ledikasyon ki Departman Transpor in fer, bann miting ki nou'n fer avek bann *driving instructors* avek tou dimoun osi, zot standar pe monte e la in ariv en staz lot i akzeptab.

Son poursantaz dernyen kekfwa PS i ava dir nou ki son standar selman ti 30poursan mon aksepte oparavan e sa ti akoz nou ti *mitigate from* sistenm avan, pou nou vin bokou plis *digital*. Mr Speaker eski PS i kapab.

### **MR SPEAKER**

PS wi zis klarifye pou nou pas lo lot kestyon.

### **PS PATRICK ANDRE**

Mersi Mr Speaker. Mr Speaker mon annan zis 2 klarifikasyon pou fer. Normalman en etranze ki vin Sesel avek en *international driving license*, i annan li zis 3 mwan pou li kapab dray maksimonm dan pei ok?

Be par kont nou annan bann travayer ki vin Sesel, etranze ki vin Sesel e zot dray lo zot 3 mwan, apre zot bezwen al kot Lapolis pou zot ganny en *local driving license*, pou zot kapab kontinyen *drive* plis ki sa 3 mwan ki an egzistans.

Lo lot kote revizyon *pass mark; pass mark* zis pou fer en koreksyon, *pass mark* pa'n ganny sanze. Toultan *pass mark* ti 80poursan. Bann partisipan i ganny 25 kestyon e zot bezwen *achieve at least* 20 kestyon ladan pou zot kapab *pass*.

Pwen klarifikasyon ki pou remet li an perspektiv se ki nou ti pe ganny nou apepre 30poursan dimoun ki pe pas zot legzanmen. Me la firanmezir letan dimoun pe komans adapte avek sa novo sistenm, ou war kot i *rate of pass mark* i pe kontinyen ogmante, akoz i annan pli bon preparasyon ki sa bann novis *drivers* pe fer e sa i en bon siny pou nou menm nou. Mersi Mr Speaker.

### **MR SPEAKER**

Mersi. Kestyon Onorab Uranie.

### **HON ROCKY URANIE**

Mersi Mr Speaker. Bonzour tou koleg. Bonzour Minis ek ou delegasyon. Bonzour tou zabitan Zil Pros a lekout. Minis vi ki ti u annan en novo Polisi pou Transpor lo La Digue, eski sa Polisi in pare si wi kan ki sa pou ganny met a laporte bann operator Digwa? E eski pou li annan bann novo Kod Semen an relasyon avek sa novo Polisi? Mersi.

### **MR SPEAKER**

Tre byen. En pti pe an deor kestyon orizinal me Minis adrese silvouple. Son dezyenm pwen, son dezyenm pwen i ase pre avek kestyon orizinal.

### **HON SANDY ARISSOL**

(Off-Mic)

**MR SPEAKER**

Onorab Arissol *Order* silvouple. Ou'n konpran kestyon Minis oubyen ou bezwen?

**MINISTER**

**DERJAQUES**

Yes, Mr Speaker.

**ANTONY**

**MR SPEAKER**

*Go ahead please.*

**MINISTER**

**DERJAQUES**

Mr Speaker an se moman mon prezant en *new Public Transport* Polisi avek *Cabinet*, pou dernyen mwan tou le semenn bann seksyon pe ganny diskite, demen pe kontinyen. *Cabinet* in pas lo sa seksyon ki fer avek nouveau Polisi pou La Digue.

E demen ler nou al koz lo *omnibus* avek *SPTC*, *PS* pou prezante devan *Cabinet*, la nou ava fer en *press conference* nou ava kouver *at least 3 size* ki'n fini pase.

Solman sa prezantasyon kekfwa nou ava fer dan Lasamble, se ler sa Polisi an antye in fini. I tre long i annan plis ki 55paz. I kouver tou laspe *Public Transport* Sesel enkli takse, *limousine*, La Digue, *SPTC*, alors a sa moman kot nou'n fini ganny aprouvasyon

*Cabinet* ek Prezidan, nou ava fer sa *press conference*.

Nou ava posib konsidere ki akoz pou la Digue in fini avan si nou ini kouver *omnibus* ek takse avek *SPTC* demen, nou ava met latet ansanm nou ava gete si nou kapab fer li par seksyon. Savedir nou kapab fer detrwa *Press Conference* e sa i ava kekfwa bokou pli fasil pou piblik olye don zot en kantite alafwa.

An sa ki konsern la Digue avek sa nouveau Polisi Minister ek *Secretariat* dan *Transpor* pou Pa Digue pou al fer en *survey* isi. Selman pou napa en kod spesifik. Akoz la Digue i parey Mahe ek La Digue annefe. E tou an Lalwa Regilasyon ek Kod i aplik la Digue parey i aplik isi eksepte *of course* bann *speed limits* avek kalite transpor par egzanp bann *electric buggies* answit.

Solman sa travay apre ki sa Polisi i ganny aprouve par *Cabinet* se enn de bann Zofisyen pou mont La Digue. Nou'n fini anvoy en *inspector* ki'n komans son travay detrwa mwan pase, e lenformasyon osi pe ganny anvoye dan Minister. Mersi Mr Speaker.

**MR SPEAKER**

Mersi. Kestyon Onorab Labrosse.

**HON RICHARD LABROSSE**

Mersi Mr Speaker. Bonzour Minis bonzour tou dimoun ki a lekout bonzour bann koleg dan Lasanble. Minis etandonnen ki nou pe koz lo sa legzanmen pou dray la, ek sa liv ki bann fitir drayver i gannyen.

E parey nou'n tann dir ki i annan bokou bann dimoun osi ki pe *fail* ler zot al fer legzanmen, i annan menm Manm ki'n sizere pou fer desann *pass mark*. Mwan mon pa pou la lo sa desann *pass mark*, mon pou plito met lanfaz ki novo plan Gouvernman?

Eski Departman Transpor i annan en novo fason la kekfwa pou ankadre bann novo fitir drayver dan plas pou donn zot en liv pou zot lir, kot kekfwa nou ava kapab annan en laklas en fwa par semenn *somewhere* ouswa en dimoun prive swa oubyen Gouvernman.

Eski i annan en konversasyon ki pe ganny fer lo sa? Akoz mon pe mazinen la dan sa klima keksoz pe sanze osi e zis pou ou asize ek en liv pou ou aprann apre pou ou al fer en legzanmen, mon krwar par ler ou bezwen en pe *coaching* pou ou konnen kwa ki ou'n fer mal, kwa ki ou pa'n - pou ou kapab amelyore. Eski zot annan en plan departman

transpor pou regard la fason ki legzanmen pe ganny fer?

**MR SPEAKER**

Mersi Onorab. Minis.

**MINISTER****DERJAQUES****ANTONY**

Mersi Mr Speaker. Annefe le 3 Novanm letan nou ti fer sa miting avek bann *driving instructors*, i enn bann sizesyon ki ti ganny diskite. Zot ti war li difisil ki a en sel kou i legzanmen in elektronik lo *computer*.

Zot osi zot in dir nou e zot in aport a nou latansyon bann difikilte akoz COVID, kot nou pa ti kapab ganny tou bann facilite par egzanp ek bann lekol. Akoz ti annan restriksyon COVID lo ba laklas dan bann lekol osi. Alor nou'n al dan en peryod kot ti vreman difisil, pou ou kapab fer bann laklas piblik pou bann *driving instructors* osi *operate*.

Akoz in an bann restriksyon osi lo konbyen dimoun dan en transpor bann keksoz koumsa. Parey mon'n sey eksplike avan a sa moman la Bidze pa permet pou nou al kre en batiman, selman par egzanp ler mon ti koz avek sa *driving instructor* ki'n dir mwan i anvi fer son *driving school*, mon'n dir li nou ava facilite, nou ava ed ou.

Solman zot osi koman sen lasosyasyon zot bezwen vin ansanm e ed zot lekor. Zot kapab asosye pou rod en laklas en batiman, zis en lasanm pou fer bann laklas teori. E i bon sa lide kot en dimoun i vini i *coach* zot. Alor ou pe mazin dan en fason pou fer li vin pli profesyonnel. Se sa ki ou pe dir ?

An menm tan nou, nou pare pou nou pran sa liv, sa *Code Book* e pou nou *scan* pou no met li lo *computer, digitalize* pou fer li *available for free* pou tou manm piblik. An se moman enn sa bann liv pe ganny vann pou aepre R250 kot Departman Transpor. I ase ser e kekfwa i pa ase *available*.

E ou pa kapab asize kot ou *at your own time* pou ou lir, kekfwa in ler pou nou fer li *digital* e fer li *available* kot tou dimoun i kapab pran bokou plis letan e zot pa bezwen depans larzan pou zot aprann sa bann *Code*.

Mon anvi fer en keksoz resorti osi ki Departman avek *SLTA* pe fer tou pou tou pou nou *meet standar - o standar* bann semen Sesel. So i annan bann landrwa kot nou bann semen i difisil e i difisil pou ou fer en *third lane*, en katriyenm *lane* ouswa pou elarzi semen. E deplizanpli nou ganny plis ki

1200 loto sak lannen, ki pe antre dan nou pei.

Alor i vin bokou pli difisil pou ou *maneuver* isi lo nou zil, Mahe Praslin ek La Digue. La Digue nou'n met en *moratorium*, akoz nou'n fini sot 110 transpor lo La Digue, Praslin i ankor kapab kontrole. E Mahe si ou konte ansanm avek Praslin ek La Digue nou annan 32mil transpor lo nou pti zil.

Zis ou kapab masin sa kantite veikil ki la e pe antre e i annan ki bokou pli gran. I annan bann kontrakter ki anmenn bann gro trakter, bann gro konminyon. Alor i difisil pou nou mazinen pou nou *lower* sa *standard pass mark* ki *80percent*.

Selman parey mon dir mon kontan ki pandan sa lannen - wi ler nou ti al *digital* ti annan zis 30 poursan dimoun ki ti pe pas zot tes. Solman la i pe *improve*. Bann *learners* pe aprann *pass mark* pe monte e nou pe fer sir ki keksoz ganny fer dan en fason obzektif, ki ler ou pas sa tes vreman ou konn son teori, e ler ou al lo semen ou kapab pas sa pratik.

Pou Praslin parey mon'n dir nou'n fini ganny later, e prezan lo *Eve Island* pou annan landrwa kot bann Pralinwa i kapab al pas zot tes. Pou Mahe nou pa ankor ganny sa later

alor son landrwa i ankor kot NSC. Mersi Mr Speaker.

### **MR SPEAKER**

Mersi. Nou pou termin avek sa kestyon la, e nou'n arriv lo, nou'n fini ek bann kestyon ki konsern *PS* Andre so si i ti a kontan fer son depar.

*PS* Andre nou a dir ou mersi, i depan lo ou ek Minis, ou kapab reste asiste, napa problemm nou a kontinyen avek lot kestyon. E se kestyon Onorab Rosie Bistoquet.

### **HON ROSIE BISTOQUET**

Mersi Mr Speaker. Bonzour Mr Speaker. Bonzour Minis avek tou ou delegasyon. Bonzour to Onorab e en bonzour spesyal tou ban travayer sosyal, akoz ozordi le 15 Mars lemonn antye pe komemor travay sosyal dan lemonn. E mon pou dir zot mersi bokou e kontinyen sa bon travay.

Minis etandonnen ki problemm konzesyon trafik dan Pointe Larue i en konsern mazer i pou bann dimoun ki al travay dan bomaten e retourn se zot tar, dapre lenformasyon ki Minis in donnen lo medya lo konstriksyon en trwazyenm *lane* trafik, Minis enn; -

Eski Minis i kapab dir sa Lasanble ki zistans son Minister in arive avek sa plan?

Dezyenm ki gran benefis sa Proze pou anmennen pou zabitan Pointe Larue e osi tou sa ki servi sa semen ouswa sa larout? Ki kontrent zot antisipe gannyen pou konstriksyon sa trwazyenm *lane* trafik dan Pointe Larue? Mersi.

### **MR SPEAKER**

Mersi Minis, trwazyenm *lane* trafik Pointe Larue. Repons.

### **MINISTER**

### **ANTONY DERJAQUES**

Mersi Mr Speaker. Avan mon reponn mon anvi remersi Onorab Bistoquet avek Onorab pou Pointe Larue, akoz zot in vreman *involve* avek nou avek mwan pou nou komans sa trwazyenm *lane* Pointe Larue.

### **HON CONRAD GABRIEL**

(Off-Mic)

### **MR SPEAKER**

Silvouple.

### **MINISTER**

### **ANTONY DERJAQUES**

Onorab Gabriel mersi. Nou'n osi pas dan difikilte ki pou lannen pase nou pa ti'n ganny sa larzan pou nou komanse dan Bidze parey zot tou zot konnen akoz Bidze i pas devan zot. Alor pou en lannen antye nou pa'n kapab demare.

Mr Speaker plan pou premye faz sa proze ti deza ganny aprouve par Lotorite plan an 2019, avek serten kondisyon ki relye avek negosyasyon *wayleave* e konsiltasyon avek bann Konpannyen *Utilities* Piblik ek SCAA.

Pou lannen 2021 ti napa Bidze. Ziska prezan mwan, mon an diskisyon avek plizyer propriete pou siny bann *wayleaves*.

Mon'n personnelman zwenn avek bann endividé prive par egzamp Zedi avek Mrs Stravens ek Mr Plow kot zot reste e mon antisip zwenn avek bann lezot, bann *owners* ek bann zabitan Pointe Larue.

Bann Zofisyè Minister avek SLTA pe kontinyen zwenn osi avek bann *stakeholders* ki enkli SCAA SEYEC, Air Seychelles, UCPS. E bann korespondan avek komunikasyon aktyelman pe arive.

Savedir tou lede Minister Transpor avek SLTA i aktiv. SLTA in resevwar selman R5milyon dan sa Bidze pou lannen 2022. E estimasyon ti ganny fer an 2020 pou sa proze ti pou kout R8milyon. Be par kont avek bann lenflasyon avek bann pri komodite ki'n monte, sa proze prezan nou ekspekte i en pe plis.

SLTA pe a sa moman reviz son Bidze. Sa premye faz proze pou komans kot *roundabout Airport* ziska kot lizin sigaret, kot *Almagamated Tobacco*. An vi ki i annan serten nouvo lamannman ki pe ganny er dan sa plan swivan sa bann diskisyon avek negosyasyon ki nou pe fer avek sa bann *stakeholders* nou pe reviz tousala a sa moman.

E nou ekspekte anmenn kot *Planning* sa nouvo plan bann pri amannman o pli vit posib. Koman bann *wayleaves* i konplet avek koman sa bann amannman kot *Planning* i aprouve avek nou Bidze R5milyon, nou pou komanse.

Mr Speaker mon anvi pran sa loportinite osi pou mon fer en rapel, Departman Transpor avek SLTA nou pe sey komans sa 2 proze enn Baie Lazare West Coast Road Project avek kot Pointe Larue. Par egzamp dan *west coast* mon'n ale mon menm avek bann zofisyè SLTA avek Departman e mon pe sey zwenn tou bann ki pa ankor siny bann *wayleaves*.

E bann *wayleave* ki'n ganny sinyen dan lepase be i pa ankor an konformite avek Lalwa nou pe rezourd sa bann problem. Nou annan en tim ki *dedicated*, ki aktiv, ki zwenn ki pe al lo teren e kot mon kapab

ede mon ede. E mon kapab dir zot espesyalman pou *West Coast Road Project* Prezidan i personally personnelman osi involve e detanzantan i kontakte mwan. E dernyen fwa aepre 2mwan a 3 mwan pase nou osi nou ti marse, nou ti al regard sa semen e i ti mars sa 2 kilomet pou li vvar li menm kote ki problemm i ete e in donn nou bann direktiv lo ki mannyer nou kapab deblok bann *issue wayleaves*.

*Sponsorship* larzan i la, solman si sa bann lagreman avek bann *landowners* lot kote semen ki le problemm.

Mr Speaker pou dezyenm larepons sa bann benefis sa proze pou *comme swivan*;

Lo kote trafik nou ekspekte annan en rediksyon dan konzesyon trafik sirtou dan direksyon lavil dan bomaten. Alor motoris perdi mwens letan dan trafik.

Trotwar ; sa proze i enkli konstrir trotwar pou amelyor sekirite tou bann pyeton ki deservi sa landrwa.

Drenaz ; vi ki sa proze i enkli amelyorasyon dan sistèm drenaz dan sa landrwa, nou ekspekte redwir gravite *flooding*, savedir linondasyon dan sa landrwa.

Mr Speaker nou trwazyenm kestyon ki lir *comme swivan* ;

Ki kontrent zot antisipe pou konstriksyon sa trwazyenm *lane* trafik Pointe Larue? Bann kontrent prensipal nou pe rankontre se premyerman *wayleave* parey mon'n eksplike, e mon'n fer en lapel avek bann ki annan sa bann propriete, pou silvouple ed nou pou nou fer sa *third lane*, espesyalman osi pou nou met en *pavement* pou bann zabitant.

E dezyenm pou nou kapab tonm dakor avek bann lakonpannyen *utilities* par egzanp *PUC, Cable and Wireless, Airtel* ki zot, zot annan en kantite zot bann *apparatus*, zot ban elektrik, zot bann tiyo pou nou kapab elarzi sa bann semen nou bezwen tonm dakor avek zot e avek *Planning* ki mannyer nou pou dil avek sa bann sityasyon.

Dernyen kontrent parey mon'n dir 2021 nou ti napa Bidze, sa lannen nou annan 5milyon e nou pou komanse solman nou pou bezwen vin kot Lasanble ouswa rod larzan nou menm pou nou kapab *achieve* sa 8milyon ouswa en pe plis akoz enflasyon. Mersi Mr Speaker.

## **MR SPEAKER**

Mersi Minis. Onorab Bistoquet siplemanter. Fer vitman silvouple.

### **HON ROSIE BISTOQUET**

Mersi Mr Speaker. Mersi Minis pou ou larepons. Mon annan zis en pti siplemanter Minis ou'n fek dir nou la ki dan ou larepons ki ou ti a kontan ganny led pou fer marse sa proze. E vi ki sa prose i en gran devlopman pou distrik onte Larue e osi i pou ed bann lezot distrik e bann dimoun ki servi sa larout, ki ou pozisyon ou Minister pou fer ganny en dyalog lo sa size avek koman atraver en miting piblik, pou anmenn plis korperasyon pou zabitant Pointe Larue? Mersi.

### **MR SPEAKER**

Mersi. Minis.

### **MINISTER ANTHONY DERJAQUES**

Mersi Mr Speaker. Annefe mon Sekretarya in parey nou konnen nou'n kontakte ou direkteman osi ek DA. E DA in dir nou zis i pou donn lasal e nou ki bezwen al koze avek sakenn sa bann zabitant, an menm zot kot lasal. Nou'n an kontak osi avek Onorab Gabriel ki pe sey ed mannyer i kapab.

E solman ki nou pe fer direkteman se al kot zot. Si nou

pa kapab fer sa miting, gran miting piblik e mon konnen sakenn i anvi koz ek mwan ouswa koz ek Minister koman endividé, an prive - akoz fodre nou pa oubliye ki sa bann demann pou *wayleaves* i la pandan en kantite lannen. Akoz sa proze to sipoze demare enn de lannen pase.

E sa bann dimoun i annan sakenn i annan zot problem spesifik. Parey mon'n trouve Zedi ler mon'n al kot Mr Plow e i annan en problem flooding e i pe demann en miray pou anpes delo ler lanmer i mont ek lapli i tonbe, ki sa delo i anvair son lakaz e menm parey kot Mrs Stravens.

E alor mon pe get si nou kapab fer en proze dan sa kontra pou nou kapab fer sa pti miray pou anpes sa flooding. Alor kekfwa zot santi zot pa pou kapab zwenn mon dan en miting piblik, sakenn i oule war zofisyé ouswa Minis personnelman.

Alor se pou sa rezon ki mon pe al kot zot dan en fason endividé kot zot lakour, en nespes *door-to-door*. Mersi Mr Speaker.

### **MR SPEAKER**

*Thank you. Mon a pran kestyon Onorab Adelaide.*

**HON FRANCOIS ADELAIDE**

Bonzour Mr Speaker. Bonzour tou dimoun. En bonzour spesyal pou Mr Prezidan pou son laniverser ozordi.

Parey nou pe mazin ban travayer sosyal an menm tan nou'n dir lazournen konsonmater, zis nou oule fer zot konpran pour ozordi disel pa ankor arive R10 so, sa i manti.

Minis mwan mon kestyon pou ou, se mon konnen poudir pou le moman i annan bann kontrent finansyel, me bann dimoun ki pe servi sa semen laba, mon panse ki petet ou Minister i annan keksoz zot kapab fer, san bezwen azout plis bann problem finansyel lo Gouvernman tel par egzant ki met *traffic warden*. E osi Lapolis.

Akoz ki nou pe trouve lo bann kot bann semen kot i annan sa bann *sign* ki lo semen, sirtou dan bomaten petet mon a don ou en pti nide ki mannyer nou kapab aranz sa pou nou fer ki bouze.

Se ki nou met zofisyel Lapolis ki kapab permet ki trafik i desann pou vin anvil e bann ki pe vin lot kote i kapab bloke ziska ler sa bis ki sorti lo semen i bouze. E sa nou fonn priyorite bann dimoun ki pe desann dan bomaten pou zot

desann anvil e ki sa *constant flow* i kontinyen reste.

Apre petet nou annan parey bann pti aksidan ki arive en dimoun tous ek kanmarad, nou bezwen tarde me si i annan Lapolis ouswa *traffic warden* lo semen i pou ed nou en kantite.

So mon pa pou met plis *burden* lo zot, me eski ou kapab don nou en komitman poudir ou pou al koz avek ou partner Minis Fonseka, pou *provide* ou avek en pe zofisyel Lapolis ek *traffic warden* pou ede pou nou kapab deblok semen e ki trafik i ava *flow* en pe pli byen? Mersi Minis.

**MR SPEAKER**

Mersi. Minis.

**MINISTER**  
**DERJAQUES****ANTONY**

Mersi Mr Speaker. Mr Speaker *traffic wardens* i an tre pe, apepre 11. RTC pe ganny *merge* avek *Land Transport* e nou lide se par egzant etablir en *Scheme of Service* donn zot plis facilite avek lekipman, apre pou annan en plis *focus* lo zot, pou nou lev zot standar. E sa i ava enkli pou zot kapab al dan bann landrwa. Selman *at the moment* pou al an deor lavil - kapasite i ptigin.

Wi avek Lapolis, avek *Traffic Department*, avek mon

koleg Minis Fonseka mon ava antre dan en dyalog, e mon a port a son latansyon bann bon bezwen spesifik pou Pointe Larue.

Mon konnen ki i annan en kantite *congestion*. I annan bann *zebra crossing* ki nou'n bezwen mete. En bann i tro bokou, e bann i dir tor enn *at least*, e i annan lekol lanmenm, i annan *Airport* ki pre. I annan en kantite problem.

E pou sa rezon ki nou pe sey tou pou tou, pou nou kapab sa lannen komans e travay lo sa *third lane*, kot nou kapab ede pou fer *traffic flow* pou i sa *congestion* Pointe Larue.

Wi alor mon ava antre dan en dyalog avek Lapolis ek Trafik Departman, e mon ava demann zot led pou Pointe Larue. Mersi,

### **MR SPEAKER**

Mersi Minis. Onorab Sandy Arissol.

### **HON SANDY ARISSOL**

Mr Speaker bonzour. Ankor enn fwa bonzour Minis. E mon ti a kontan lo menm laliny ki Onorab Adelaide in demann ede. Pou konnen nou annan nou bann *traffic warden* ozordi Sesel, nou *traffic warden* i baze zis lo *car park* sa ki nou apel *car park* pirat. Zot pa desantralize zot.

Pointe Larue kot nou pe koze napa en Kordgard, Providence napa, Perseverance napa, la kot *trouter* dan bomaten trafik *chaos*, enorm ! Nou pa vwar sa bann dimoun dan bann pozisyon stratezik dan bann pei. Nou war zot en sel landrwa. Eski Minis ou pe donn nou en konfirmasyon ozordi la, poudir ler nou fini koze la taler ou pou zwenn zot parske zot anba ou Minister.

Pou nou desantraliz zot en pe pou nou ed Pointe Larue, be mon felisit Onorab Rosie pou anmenn sa tel kestyon akoz Onorab Gabriel pa'n fer fout naryen lo la. Mersi.

**(APPLAUSE)**

### **MR SPEAKER**

Mersi. Minis ou adres sa silvouple.

### **MINISTER** **ANTONY** **DERJAQUES**

Mersi Mr Speaker. E PS i ava azoute. Parey mon sey eksplike i annan zis 11 e zot sey *manage* kot zot kapab partou. Zot napa sa tim deryer zot parey Lapolis i annan. Alor lanmenm la ou war zot mars par 2 ouswa menm par 3. Akoz ennler zot ganny - espesyalman ler zot pe al sa ki nou apel kot *market street* kot taksi pirat, zot osi zot ganny

*intimidated*, zot ganny zoure. Espesyalman konmela ki bann tiket i R1000.

Alor sanmenm ennler ou war zot pe mars par group. Ou wap war zot, zot tousel parey en Lapolis ki annan sa bagaz deryer li e i annan son kordgard, i annan son kaso i annan son *backup special police* deryer li.

*Traffic warden* zot, zot pti gin, zot ti dan en *Commission on their own* la zot pe ganny mete pli pre avek Departman, anba PS. Si nou kapab fer mon kapab koz avek PS i la - direkteman - li ozordi ler i al dan son Departman i ava koz avek Komisyoner RTC, i ava gete si zot pe ganny deplwaye dan en fason pli efikas osi.

Sa mon kapab promet ou *Chief Whip* e nou ava get sa enn pou ou. Mersi Mr Speaker. Eksepte si PS i annan okenn mo?

### **MR SPEAKER**

Mersi. PS si ou annan.

### **PS PATRICK ANDRE**

Mersi Mr Speaker. Zis petet pou en klarifikasyon lo ou bann *traffic warden* normalman zot pe travay ansanm avek Lapolis sirtou dan bomaten avek dan apre midi. parey si ou pou war zot kontrol depi krwaze Bel Air,

Quincy an desandan, apre zot lo krwaze Plaisance osi tou ki zot ed dan bomaten pou kapab fasilit mouvman trafik.

Me malgre kantmenm nou annan nou 11 travayer ozordi, i annan 3 novo ki fek zwenn nou, zot ankor anba *training* zot prosedir. Me selman nou pran kont sa sizesyon, pou nou kapab regarde ki mannyer nou kapab maksimiz zot prezans pou ede pou kapab dekonzeste trafik li menm li. Mersi Mr Speaker.

### **MR SPEAKER**

Mersi. Kestyon Onorab Georges.

### **HON BERNARD GEORGES**

Mersi Mr Speaker. Mr Speaker permet mwan pou dir zeneralman avek *panel* ki mon en pti pe dezapwente avek zot bann repons. Akoz mon vvar bokou leskiz pou linaksyon. E mon konpran ki larzan pa *available* e nou annan problem.

Me dan en sityasyon mon ti a kontan demann Minis atraver ou Mr Speaker e sa se kestyon *wayleave*. I pa posib Minis e mon ti ava kontan ki ou konfirmen silvouple - i pa posib pour ki en dimoun i met otaz en proze piblik, akoz i pa oule siny en *wayleave*.

I annan en Lalwa ki ou konnen akoz '*Acquisition of Land in the Public Interest Act*' ki permet, annefe ki son rezon spesifik se pou permet Gouvernman azir ler i pa ganny permisyon avek propriyeter, pour ki dan lentere *public* en proze i kapab ganny fer. I bezwen dan lentere piblik.

E mon konpran Minis in deza dir nou dan sa Lasanble dan lepase ki etandonnen lavi par bann administrasyon lepase avek sa bann Lalwa sa ladministrasyon pa anvi asir dan sa fason.

Me mon ti a kontan ki Minis i kapab silvouple reasir nou, ki si i en kestyon *wayleave* ki pe anpes en devlopman piblik ki zot ava revwar zot Polisi, e zot ava kapab itiliz sa Lalwa, pou permet ki sa ki lamazorite i bezwen pa ganny *handicap* par en minorite. Mersi.

### **MR SPEAKER**

Mersi. Minis ou a donn ou pwennvi lo la?

### **MINISTER DERJAQUES**

Mersi Mr Speaker. Sa Lalwa i permet mwan pou refer avek *Ministry of Lands* mon *request* ouswa mon demann pou *land acquisition* i ganny konsidere. Savedir i tonm dan diskresyon

en lot Minister si nou, nou demande koman Transpor.

Onorab in byen dir ki i annan en listwar deryer *land acquisition*, akoz i ti ganny servi parey ou'n tande devan *Truth Commission* dan en fason malapropo, ki en kantite dimoun in perdi later. E Gouvernman a sa moman la i annan sa legzersis pou rann nou later ki pa'n ganny devlope or bann *landowners*.

Pou sa rezon alor ki sa i vin en zour i dernyen e alor mon pe personnelman parey mon eksplike - semenn pase mon'n ale, se rankontre sak sa bann dimoun, e sey gete kwa ki zot *issue*, akoz ki zot pa oule sinyen e sey *persuade* zot pou zot sinyen.

Parey mon dir sakenn i annan en pti demann, i annan ki zis *done freely*, selman zot dir ki personn pa ti'n kontakte zot a en nivo. Alor zot pa'n pran li koman serye. Me la nou pe fer li dan en fason serye. Sa lannen nou'n ganny en pe larzan ki apepre 60poursan e nou pou sey li.

Nou a gard posibilite *land acquisition* koman en dernyen zouti, solman an menm tan bomaten nou ti pe konsider osi ki si par egzanz i en *issue* kot semen i kapab ganny fer, solman *pavement* pou ganny

*interrupted*, akoz sa *particular land* pa pe ganny donnent.

Nou kapab *skip* sa *about trotwar*, e kontinyen avek semen e regran *pavement* pli lwen. Solman si ou komanse sa osi i ava met presyon lo sa bann *landowners*.

Mete prose i komanse, proze pa pou fini avan si sa i bon. Kekfwa dan sa 6 a 8 mwan i ava sanz on lide. Alors nou pe sey mazin tou sort fason pou bokou *persuade*, me pa pou nou vin avek sa *land acquisition* dan en fason ki fasil. Lannen pa e nou pa ti kapab fer sa bann proze. Sa i premye lannen ki nou kapab fer li.

Alor, mon oule *exhaust* posibilite kot bann sitwayen ki dan sa *issue*, dan sa problemki annan sa later pou fer en keksoz avek zot konsantman. Mersi Mr Speaker.

### **MR SPEAKER**

Terminen Onorab Georges silvouple letan pe kit nou.

### **HON BERNARD GEORGES**

Mersi Mr Speaker. Mon ti anvizis klarifye e eksplik Minis, mon konpran son respons. *Lands acquisition* i pa neseserman ki vini ou pran. I annan en prosedir anba la kot nou servi en *notice to treat* avek sa propriyeter pou demann i vin

devan e vin negosye avek nou.

Se dan sa loptik ki mon pe demann ou Minis, konsider sa en pe plis pour ki bann dimoun ava vin devan e ou ava negosye avek zot dan en fason confortab pou pey zot en konpansasyon pou sa ki zot pou perdi. Mersi.

### **MR SPEAKER**

Mersi. Minis ou a konsider silvouple. Mon a bezwen pran kestyon Onorab Gabriel, pou Pointe Larue.

### **HON CONRAD GABRIEL**

Mersi Mr Speaker. Dabor mon a zis met lo rikord ki nou'n travay ansanm ek Minis. Minis in pran loportinite in nonnm Onorab Gabriel 2 fwa. I montre ki i pe travay dan distrik, Mr Arissol.

Minis eski ou kapab is enform nou Lasanble ki solisyon alternativ ki pou ganny met an plas, *once* ki sa proze i *kickoff* silvouple, pou amelyor en pe *the flow of traffic?* I deza konzeste la. Ki solisyon petet alternativ ki nou pe met devan? Mersi.

### **MR SPEAKER**

Mersi. Minis.

### **MINISTER ANTHONY DERJAQUES**

Pou le moman si nou pa kapab fer sa *third lane*, nou pou

bezwen konsider bann *alternative transport*, i annan en komersan, en akter ki pe regard si nou kapab fer en *sea ferry service* pou sorti Anse Royale pou vin kot Por.

Apard ki sa, napa en vreman an lot fason eksepte vreman nou annan ou en Polisi kot nou sanz ler travay, lot en *shift* i komans granmaten 7er i fini 3er, lot i komans 9er i fini 5er.

Apre kekfwa osi nou annan bann facilite bis ki ganny servi bokou plis ki loto prive, alor nou annan bann *multi-storey car park* ki a sa moman la par egzanz nou fek fayle pou 2 *multi-storey car park* Victoria pa dan milye, dan rezyon.

I annan enn ki pe ganny kontanple pou ganny fer lo por kot *International Conference Center*, i annan lot ki pe ganny sizere priveman zis an deor Francis Rachel Street par deor kot *Indian High Commissioner - prive*.

Alor nou pe mazin bann fason kot nou kapab manage sa *traffic flow*, sa konzesyon, sa kantite loto. Solman nou pou bezwen fer sa *third lane*. Nou pa pou *give up*. Nou pou bezwen al asiz avek zot, *persuade* zot e sa nou pe fer alor nou pe sey tou pour tou pou nou delivre. Mersi Mr Speaker.

### **MR SPEAKER**

Mersi. Mon pou termin la pou sa kestyon. Mon leskiz pou bann ki pa'n ganny sans, nou pou pas lo prosen kestyon. Onorab Gervais Henrie.

### **HON GERVAIS HENRIE**

Mersi Mr Speaker. Bonzour tou dimoun. Kestyon limero 8 i lir koumsa, pou demann Minis pou transpor ki progre in annan dan bann proze re sifras semen dan nivo nasyonal, pou asire ki rezo semen primer lo Mahe e Praslin, i dan en leta akzeptab. Mersi.

### **MR SPEAKER**

En moman silvouple. Minis atann mon en moman mwan annan plizyer lanmen ki'n leve. Mon bezwen sey pran en pe not e sa i pou difisil, akoz mon pa konnen lekel ki'n lev premye. I pou bezwen annan dezapwentman la osi. Ok Onorab Naidu, Onorab Hoareau. Tre byen, Minis.

### **MINISTER DERJAQUES**

### **ANTONY**

Mersi Mr Speaker. SLTA i annan en programm travay mentenans sistematik pou tou semen primer ek segonder. E sa pe ganny enplimante par faz

depandan lo disponibilite resours.

Bann travay i enkli re sifras bann semen primer ek segonder ki'n andomaze. Fer bann travay *pot holding* avek koltar, refer, *reinstate* bann travay *excavation* ki bann lakonpannyen par egzant *PUC* in fer pou repar zot bann lenfrastriktir. Re sifras bann semen i an konsiltasyon avek *PUC* e lezot lakonpannyen; par egzant Telecom, kot zot in fer zot bann proze kot semen.

Teknisyen *SLTA* i travay lo en programm pe re sifras semen apre ki zot in fer bann vizit pou evalye kondisyon ban semen. Sa programm i pran konsiderasyon sa bann kriter swivan; kondisyon sifras bann semen, volim trafik ki servi sa bann semen, kalite travay *maintenance* ki merit ganny fer.

Ki kalite *utilities* ki pas anba semen e zot kondisyon. Si bann lakonpannyen litilite i annan lentansyon repar ouswa ranplas, ouswa sanz landrwa kot zot bann litilite a lavenir. Sa i konsern sirtou bann tiyo delo *PUC*.

Nou pe eksperyans seren difikilte parey mank resours finansyel retar dan kontazyon koltar an vi problemm bato.

Mankman serten materyo de baz parey makadanm ek

lapousyer ros. Me avek sa bann difikilte, nou'n osi mansyonnen nou'n kapab reisi refas lisyen semen primer ek segonder lo Mae ek Praslin e nou plan se pou kontinyen met semen lo en nivo akseptab.

I non note ki lannen 2020 ek 2021 nou'n rankontre pa mal reakter dan bann proze re sifras semen, prensipalman akoz retar pou annan koltar dan pei akoz bann bato ki pa'n kapab ariv isi. Sa lakoz *COVID-19*.

Sa lannen nou pa ankor eksperyans sa kalite retar alors nou ekspekte annan en amelyorasyon dan sa bann prodiksyon. E nou kapab fer sir ki bann semen pou bouze e nou pou kapab fer en pe plis re sifras.

Mr Speaker mon anvi osi di avek Lasamble an 2021 nou'n kapab travay e fini re sifras 96 bout semen. E an 2022 nou'n kapab Zanvye pou la fer 22 fer bout semen.

Pou 2021 sa i enkli par egzant Barbarons kot Grand Anse *main road*, Anse Boileau kot Cap Sainte Marie, Bougainville ziska Takamaka, Baie Lazare *feeder road*, Kayman Anse Boileau, Lilot Glacis North East Point Village. Panorama *Road*, Takamaka Val D'En D'Or Anse Gaulette, Anse la Mouche kot *Sail Fish Estate*,

*Slipway access road* Anse Boileau kot Banbou Estate, Anse Louis kot Hoareau, Montagne Posée, Bel Eau Flat, Bel Ombre.

Mr Speaker si mon lir sa kantite travay ki'n ganny fer, i annan aepre 96, parey kot Cap Lelefan, in redwir, kot Morel, Baie Lazare kot Figaro, Sweet Escott kot Hoareau.

*Malaysian Flat* Glacis, Sorento lower, Sicobo Daycare Center Anse Royale, Anse Royale kot Daycare, Les Mamelles Clinic, Beoliere, Brillant Housing Estate, St Louis Dan Koko, Deaf School Mont Fleuri, La Misere feeder road, Majoie, Maldives feeder road, Maravi. Mr Speaker Pointe Au Sel, Port Glaud, Santa Maria.

Sa lalis i kontinyen e i annan 96. Mon ava anvoy sa lalis kot Mr Speaker e aksepte si bann Manm Lasamble i oule mon lir tou sa bann proze ki SLTA ek Transpor in konplete an 2021 e mon bezwen fer sorti sa aktyalite Bidze ki'n vin vreman pli ba. E zot, zot konbyen akoz se zot ki pas sa Bidze.

Mr Speaker pou sa lannen i annan par egzanz Ile Aurore *emergency housing*, Beau Vallon Petrol Station, Gaza Estate, St Louis *feeder road*,

Basin Bleu, La Misere, Ile Soleil entrance, Machabee *waterfront station*, Silhouette View Apartment, Glacis, Mont Buixton *secondary road*, Pascal Village *circular*, Bagatel Bel Air, Grand Anse DA's office *access road*, Eau Clair Lane, Cosmoledo Les Mamelles *circular*, kot La Gogue, Majoie Secondary School, kot Les Mamelles *flat*, kot La Gogue, obor Danm, Cascade road obor *volleyball court*, Espoir road Mont Blanc Waterfall *main road* Port Glaud, Waterfall *feeder road* Port Glaud.

E sa pe kontinyen e nou vreman aktiv. Mon krwar tou dimoun ki pas par egzanz lo *providence highway*, i war bann travay pe kontinyen. Si ou pas kot Plaisance kot *roundabout* ou a war i annan travay ki ganny fer nou pe fer si 2 kilomet kot Mont Plaisir, Praslin. I annan travay pe fer kot semen Pasquere.

Alor i annan en kantite travay ki SLTA ek Departman Transpor pe fer. Mersi Mr Speaker.

### **MR SPEAKER**

Mersi Minis. Nou a pran kestyon siplemanter Onorab Henrie premye. Mikro silvouple.

### **HON GERVAIS HENRIE**

Mersi Mr Speaker. Dabor mon ava zis profite pou mwan dir mersi SLTA. Vreman zot in fer bon travay a sak fwa ki nou'n bezwen zot Mont Buxton. Depi ki mon MNA 2016, mersi pou sa.

Mr Speaker mon annan 3 pti kestyon presi. Dabor mon anvi konnen si Minis i kapab konfirmen pou nou, ki kantite larzan ki'n ganny bidzete an 2022 pou ed SLTA fer bann re sifras lo nivo nasyonal.

Dezyenmman Minis in dir nou 96 bout semen, si i ti kapab donn nou sa an term kilomet par egzanp, i ti ava en bon mezir pou nou vvar kantite travay zot pe fer.

E dernyen trwazyenmman se kwa ki zot pe fer pou asir kalite travay an term re sifras semen, sirtou pou ravay avek bann kontrakter pou asire ki zot annan en nivo performans dan letan zot pe re sifras sa bann semen? Mersi.

### **MR SPEAKER**

Mersi. Minis oubyen *panel* nou kapab ganny sa bann detay ase vitman?

### **MINISTER** **ANTONY** **DERJAQUES**

Mersi Mr Speaker. Mr CEO SLTA i a reponn tou le 3. Bidze

o mwen 58milyon, CEO i a kontinyen.

### **CEO SLTA PARINDA HERATH**

Mersi Mr Speaker. Bonzour tou dimoun. Lo kote kilomet i en pe difisil Onorab pou nou met sa statistik lo kilomet, akoz i annan diferan semen e larzer i diferan.

Alors nou mezir ki nou pran i plito lo kote *area*. E nou napa sa statistik lo kote kilomet semen. Akoz semen primer parey zot konnen i en pe pli larz. I annan en larzer environ 6.5met, i annan bann semen segonder ki diferan larzer.

I annan ki 3 met, 4 met. 5met eksatera. Alors si nou pran bann mezir zis lo longer i pa pou vreman fer sans. E i plito nou annan bann mezir lo *square meters* bann *road* ki ganny *resurface*. Mersi.

### **MR SPEAKER**

E ou annan en mezir pou donn nou CEO? Oubyen ou ava anvoie.

### **CEO SLTA PARINDA HERATH**

Mon napa sa kalite statistik pou le moman Mr Speaker.

### **MR SPEAKER**

Ok, lezot pwen. Kalite travay lo semen.

**CEO SLTA PARINDA HERATH**

Mersi Mr Speaker. Bon lo kote *quality of work* mon krwar mon'n deza eksplike dan lepase osi i annan en group travayer ki la pou plizyer lannen, e osi nou annan bann novo dimoun ki vin travay avek nou letan bann dimoun i kite eksetera.

E malerezman nou napa en sistem kot nou kapab *train* bann dimoun an deor, apre met zot travay dan semen. Zot bezwen vin aprann *on the job* li menm. E nou pe fer sa kontinyelman avek bann novo dimoun ki vin ek nou. E bann vye dimoun ki annan *sort of* - bann dimoun ki annan plis leksperyans kontinyen ed zot, kontinyen *train* zot.

E osi lo kote lekipman ki nou annan, pou le moman nou annan zis bann *basic equipment* e sa osi avek letan, nou pe ekspekte nou pe fer plan pou nou kapab rod Bidze avek zot menm, ganny laprouvasyon pou nou kapab *improve* sa bann lekipman ki nou annan.

E nou ekspekte avek letan, letan tou lede lo kote lekipman avek *training* bann dimoun i vin lo sa nivo ki nou, nou anvi. *QUALITY* ki nou pe donnen avek travay i ava *improve*. Nou osi nou pa 100poursan satisfe avek *quality* dan serten landrwa, me selman

nou bezwen konsider sa bann lekipman ki nou annan, ki vreman i annan ki'n *outdated* e nou pe esey nou mye pou nou kapab *update* nou sa.

E osi nou annan en keksoz ki nou pe rode sa lannen, avek en Bidze ki nou'n gannyen sa se laboratwar pou teste bann prodwi koltar. Alors avek sa letan nou, nou asire sa ki sorti dan nou masin, sa ki pe al lo semen i enn ki lo pli bon *quality* sa osi pou ede pou fer sir ki sa *quality* i pou *improve*. Mersi.

**MR SPEAKER**

Mersi CEO. Bon i annan gran lentere. Minis oule azout keksoz?

**MINISTER ANTHONY DERJAQUES**

Yes. Onorab Deputy Speaker. Mon annan son bann *pointers* pou 2021. Par egzanp pou Barbarons ek Grand Anse ti 7860 *square meters* par egzanp pou North East Point Village i 1600 *square meters*, par egzanp pou Bel Ombre *waterfall* 3413 *square meters*, Anse Etoile *Hangard Road* 5669 *square meters*.

Pou sak sa bann proze i annan son *square meters*. ALOR mon kapab donn zot, e mon a don ou an partikilye ler nou leve taler. Apre i annan en

pe bann longer. Par egzant Mont Plaisir kot mon ti al vizite i 2 kilomet ki pe ganny aranze. Semen Pasquere i 3kilomet sorti Baie Sainte Anne pou ariv Grand Anse lot kote, lo *highway* i ant 1 a 2 kilomet - 1.2 egzakteman kilomet sorti kot *Eden Island* pou ariv kot Panjia *Flats*.

Alors sa i, nou pa mezir an kilomet nou mezir e ler nou fer en proze *by square meter*. E bann *quality surveyors* bann *QS* bann enzenyer i travay lo *square meters*, selman mon annan lalis mon ava donn ou son *square meters*.

### **MR SPEAKER**

Mersi Minis. Wi mon pe dir nou an gran lentere lo sa size. Mon pou sey fer sa ki mon kapab, me selman zot osi ede gard zot kestyon direk *to the point*. Mon a pran kestyon Onorab Pillay.

### **HON SEBASTIEN PILLAY**

Mersi Mr Speaker. Mr Speaker dan larepons li Minis in donn en lo serten bann kestyon in koz lo travay ki *SLTA* pe fer.

Mon ti a kontan klarifye avek Minis in annan bokou mekontantman par egzant lo serten travay ki'n ganny fer parey lo ann alan Providence, lo sa *lane* ki'n ganny fer e i an

bokou mekontantman par piblik.

Ki mannyer, e ki vites ki zot pran dan pwennvi Minister mon konnen *SLTA* li i enplimante, me i bezwen en Polisi sorti kot zot, ki mannyer ki *SLTA* i ale pou adres sa bann problem? Akoz an se moman i annan bokou konsern eksprimen par motoris.

Apre zis an pasan Mr Speaker, in annan en konversasyon lo sa size akizisyon later ki'n ganny fer par Onorab *Leader Zafer Gouvernman e Minis*, zot in koz lo *TRNUC*. I enportan osi lot kote pou nou *remind* Seselwa, la kantite lakaz ki'n ganny fer par Gouvernman avan atraver bann later ki'n ganny *acquired*, la kantite proze ki'n ganny fer pou benefis-

### **MR SPEAKER**

... Onorab ou pe al *off the point*. Ou pe al *off the point*.

### **HON SEBASTIEN PILLAY**

... se sa le problem, problem se ki si nou, nou koz lo la zot ankoler, zot anpes nou koz lo la.

### **MR Speaker**

Wi be ou pe al *off the point*, nou lo en size la.

### **HON SEBASTIEN PILLAY**

... Nou ti koz lo la taler.

### **MR SPEAKER**

Ale terminen.

### **HON SEBASTIEN PILLAY**

... I zis mon pwen, i zis mwan osi mon bezwen fer le pwen ki ...

### **MR SPEAKER**

Be terminen. Si ou bezwen met en lot kestyion pou Minis apre ou a kapab adres sa pwen. Mersi.

### **HON SEBASTIEN PILLAY**

Mersi Mr Speaker. Zisteman dan lespri adres sa pwen an sa ki konsern bann akizisyon, ler mon ekout ou larepons ki ou'n donn Onorab Georges, mon krwar i enportan pou nou ganny en konpran, si zot annan en plan konkret vizavi bann semen ki ozordi dan bann sirkonstans vreman mal kot i annan pye dibwa ki'n pouse kot in pou lo bann morso semen anler. Si zot annan bann plan konkret ki zot pou al fer ek sa bann semen? E kan eski nou pou vvar sa bann plan konket ganny prezante avek nou devan Lasamble? Mersi Mr Speaker.

### **MR SPEAKER**

Mersi. Mon bezwen *remind* zot nou lo semen prensipal e

kondisyon semen, silvouple esey tenir sa *focus*. Minis ou larepons.

### **MINISTER DERJAQUES**

Mersi Mr Speaker. Sa bout semen lo Providence *Highway* sorti kot *Eden Island* ziska kot Panjia i pe ganny fer, e sa bann konplent i vizavi ki zot krwar ki pe ganny fer in *patches*. Be kwa ki pou ganny fer se semen pe ganny an larzi.

I annan bann bout ki ganny met koltar, i annan *leveling* osi pe ganny mezire pe ganny fer dan en fason syantifik, e ler tou sa bann bout i zwenn apre pou annan son final ek *third layer* ki ganny met lo la pou fer li a sa standar.

Sa ki ou pe trouve ozordi ler ou'n desann pou vin anvil ozordi i zis en faz dan renovasyon, *extension* e kreasyon sa kat *lane* pou sa *highway*.

Mr Herath i la i osi en enzenyer i ava eksplik dan en fason pli byen. E mwan mon pe eksplik lib koman en *lay person*. An sa ki konsern *acquisition* mon pa ava fer okenn komanter akoz tou dimoun i la zot kapab *switch on*, e get ki pe pase dan *Truth and Reconciliation* lo sa bann zafer *land acquisition*.

### **ANTONY**

Solman parey mon'n dir Gouvernman e Prezidan i direkteman angaz zot dan en proze e sa Polisi i on ki bann ki'n fer aplikasyon avan le 31 Desanm. E zot later in ganny *acquired*, ouswa in ganny aste dan en fason malapropo, zot pou ganny rann zot later. Bann ki pa'n ganny devlope ouswa ki pa'n ganny met dan *planning*, ouswa Gouvernman napa en proze pou devlope.

Zot pou ganny rann sa bann bout later ki pa'n ganny devlope.

### **MR SPEAKER**

Mersi Minis. Nou a retourne lo semen silvouple. Onorab Woodcock.

### **HON WAVEL WOODCOCK**

Mersi Mr Speaker. Bonzour Minis ek ou lekip. Minis mon pou bezwen demann sa kestyon la. Akoz i annan pa mal lannen - CEO Herath i konn tre byen, i annan 2 semen vreman enportan lo Praslin ; sa i semen Anse Boudin pou al ziskan Anse Lazio, apre semen Konsolasyon. I annan pa mal lannen, plizyer lannen ki mon'n met sa konsern zabitant Praslin.

Akoz i bann semen ki deservi nou zabitant, an menm tan bann touris i servi sa bann semen, ki dan bann kondisyon

vreman deplorab. Mon kestyon i kan ki travay finalman pou komanse pou re sifras sa bann semen? Mersi.

### **MR SPEAKER**

Mersi Onorab. Minis.

### **MINISTER**

### **ANTONY DERJACQUES**

Mersi Mr Speaker. Mon a reponn pou Consolation e CEO Herath i a reponn lo Anse Boudin.

Annefe pou re sifras semen Anse Consolation pou sorti kot lotel Coco De Mer pou fer letour ziskan kot Baie Sainte Anne pou komanse kekfa lafen sa semenn ouswa lot semenn.

Nou'n fini deside e akoz nou'n fini travay kot *jetty* Baie Sainte Anne, prezan bann zonm ek masin in pare. E nou pe fer sa bann transfer e zot pou komans la byento e zot pou fer letour Praslin. Savedir kouver Anse Consolation an antye ziskan kot *jetty*. Mersi Mr Speaker.

### **MR SPEAKER**

CEO.

### **CEO SLTA PARINDA HERATH**

Mersi Mr Speaker. Zis pou mon azoute ki prodiksyon koltar lo Praslin i bokou pli

mwens ki sa ki nou prodwir isi Mahe.

E nou annan serten *delay* dan plizyer bann *issue*. Parey lannen pase nou'n ganny en kantite *delay* dan, pou ganny materyo debaz parey makadanm avek lapousyer ros.

Akoz sa 2 *quarry* ki ti pe *supply* sa bann materyo ti dan problemm e zot ti napa. E alors nou prodiksyon lo Praslin i toulstan bokou pli ba ki sa ki nou fer isi Mahe.

E nou bezwen nou tim ki travay lo Praslin osi, en tim ki ptipti, nou annan nou zis 8 dimoun ki pe travay. Alors nou pa kapab fer en kantite proze *at the same time* lo Praslin.

E byensir letan nou fini en proze, sa enn ki pli enportan la kot nou pou ale, kot Minis in eksplike lo semen Konsolasyon. E nou pou bouz lo lezot proze ki lo nou lalis.

E avan petet nou deside lo ki priyorite, nou ava zwenn avek tou lede Lotorite Distrik e nou ava fer en evalyasyon lo kondisyon semen ki egziste. E nou ava deside lo *next step* lo ki semen ki nou pou bouze.

Akoz sa semen Konsolasyon i ankor annan en bon pe travay pou nou fer. Mon ekspekte pou environ 3, 4 mwan ki reste nou pou laba.

Alors *rest assured* ki nou ava vini, nou ava zwenn zot e nou ava deside lo *next step* kot nou pou bouze. Mersi.

### **MR SPEAKER**

Mersi CEO. Onorab Aglae.

### **HON EGBERT AGLAE**

Mersi Mr Speaker. Bonn apre midi Minis ek CEO. CEO ouswa Minis li menm, i annan 2 konsern la. Premyerman i annan travay ki zot fer, mon aksepte zot pe fer en bon travay.

Me i annan travay ki komanse ki kit dan semen. Ki zot pe anvizaze fer - sirtou, mon propoz ou parey dan mon distrik, i annan landrwa kot ki'n komans ganny mete en kote, me lot kote pa'n fini.

Ki zot pe anvizaze fer pou konplet sa bann travay. Dezyenmman, ou'n koz en pe lo kalite. Petet si ou ti kapab eksplik sa Lasanble, an term sa bann kontrakter ki zot pe donnez pou fer, sirtou lo bann semen segonder, kot i konsern kalite lekipman.

Eski sa bann kontrakter pe oblize rod zot prop lekipman, ouswa SLTA osi pe *provide* zot ek serten lekipman, pou kapab annan en standar ki ase o nivo, ki ler tou dimoun pe servi semen, zot satisfe. Zot pa pe pase e pe monte desann. Mersi.

**MR SPEAKER**

Mersi Onorab. *CEO* wi.

**CEO SLTA PARINDA HERATH**

Mersi Mr Speaker. Bon lo kote kontrakter ki pe fer serten travay *asphalting* pou nou, zot bezwen rod zot prop lekipman zot menm.

Me selman i annan parey mon'n eksplike, nou annan bann lekipman debaz ki nenport dimoun ki met koltar pou bezwen. Par egzamp en roler, bann lekipman pou fer *leveling*, rato eksetera.

Oubyen bann ki en pe pli gro, zot annan en *paver*. E sa i bann lekipman debaz e zot bezwen annan sa pou zot kapab ganny bann kontra avek *SLTA*.

E zot osi sa bann kontrakter pe ganny - konmsi zot pe ganny swiv e pe ganny *supervised* avek nou bann *supervisors* ki'n la pou plizyer lannen.

E zot annan ase leksperyans pou get lo kalite louvraz. E letan nou pa satisfe, i annan lenstans kot nou bezwen fer sa bann kontrakter, *either refer*, tire, re mete eksetera.

Me selman parey mon'n dir, i en louvraz ki i annan serten konponan ki ou bezwen aprann *on the job* li menm.

Si nou, nou pa ti'n *contract out* sa bann louvraz avek sekter prive parey nou'n komanse apepre en 3, 4 lannen pase, nou ti pou war nou *bopped down* avek tou sa bann louvraz.

E *SLTA* pa ti pou kapab delivre sa kantite proze ki nou pe fer konmela. Alors menm si i annan serten defayans lo kote *quality*, ki nou pe kontinyelman sey *improve*, mon krwar nou pou bezwen kontinyen les sa bann kontrakter fer zot travay osi, pou nou kapab *increase*, e osi pou nou kapab tir en pe bann proze ki nou pe gannyen kot bann distrik. Sirtou lo bann semen segonder.

E tou bann proze ki pe ganny fer lo semen primer, pe ganny fer *either by* *SLTA* oubyen avek bann kontrakter ki annan lekipman parey en *paver* ki li i donn sa *finishing* ki ase akzeptab.

Lo lot kote, wi i annan serten landrwa kot nou'n koman bann proze, me selman nou'n bezwen tenir pou le moman pou nou kapab bouz dan bann lezot landrwa.

Akoz si nou war ki nou pa pe kapab prodwi ase koltar pou fer en lavans signifikan, i pa pou fer sans ki toulezour nou pe anvoy koltar pti gin par pti gin, sirtou lo bann proze primer

parey lo semen Grand Anse par egzanz.

Alors i pa nou lentansyon pou nou kit sa bann travay dan milye semen pou bokou letan. Nou ekspekte re-bouz lo sa bann proze *as soon as possible* pou nou kapab kontinyen. Mersi Mr Chair.

### **MR SPEAKER**

Mersi CEO. Nou a swiv avek kestyon Philip Arissol.

### **HON PHILIP ARISSOL**

Mersi Mr Speaker. Bonn apre midi tou dimoun. Minis nou war ki enn bann rezon pou degradasyon semen, sifras semen i lye prensipalman ek PUC ki pe pas bann kab elektrisite.

Legzanz i nou dan rezyon Was Mahe. Dan sa ka spesifik, eski Minis i kapab dir Lasanble, si PUC ek SLTA ti tonm dakor lo en dele letan egzakt kan ki travay pas kab elektrisite pou konplete e kan ki nou ekspekte travay re sifras semen rezyon Was Mahe, sirtou Anse Boileau, Anse La Mouche, i kapab komanse e konplete? Mersi.

### **MR SPEAKER**

Mersi Onorab. CEO.

### **CEO SLTA PARINDA HERATH**

Mersi Mr Speaker. Bon, nou'n fer plizyer *meeting* avek PUC e osi lezot lakonpannyen itilite. Me selman malerezman zot pa kapab donn en dat egzakt, kan zot bann proze pou fini. Annefe bann dat ki nou ti'n diskit lo la in fini pase bokou letan pase.

E zot in ganny kantite *delay* pou plizyer rezon e osi COVID ti enn bann rezon prensipal. Dan bann dernyen diskisyon ki nou'n gannyen avek PUC, zot ekspekte donn nou sa seksyon depi Takamaka ziska Baie Lazare.

Kot zot in fini pas tiyo. Me i annan serten tes ki zot pa ankor fer, *by an Out* sa lannen. Alors letan zot, zot in fini teste tou bann, zot bann kab ki zot in mete, la SLTA pou kapab kontinyen avek sa program *resurfacing*.

E lo nou kote, nou pa oule pran en risk pou nou met koltar davans - avan sa bann tes i ganny fer. Akoz i annan plizyer lenstans kot nou'n vwar ki zot bezwen retournen pou vin re fouye pou fer serten lezot travay.

Alors nou prefere pou nou espere, fer sir zot in fini tou zot travay avan nou, nou vin *resurface* semen. Sirtou sa cours final ki nou pou mete.

I annan serten landrwa ki nou met en cours fen zis pou tir sa bann gro, gro depresyon sa beton ki zot mete, *sort of lo zot excavation*. Me selman cours final, nou pou espere ziska ler zot in fini avek tou travay ki neseser. Mersi Mr Chair.

### **MR SPEAKER**

Mersi. Mon a pran kestyon Onorab Romain.

### **HON GEORGE ROMAIN**

Mersi Mr Speaker. Bonn apre midi Mr Speaker, Minis bonn apre midi ek ou *panel*. Minis atraver ou Mr Speaker, mon konnen zot in, travay *SLTA* zot in met en bon pe re sirfas lo bann semen e sa i vreman, vreman byen.

Me selman en keksoz ki nou pa pe vvar pe arive, bann demarkasyon. Bann laliny par egzant ki separ semen an de. Apre parey bann *speed bump*, bann, zot pa pe demarke.

Bann, son bann lapentir ki ti deza lo la pe komans pali. E sa ou kapab mazinen, i kapab kree en aksidan. E nou'n vvar zot pe fer en pe dan sa bann louvraz dan lavil.

Be selman an deor lavil espesyalman lo bann semen primer pa pe ganny fer. Alors mon ti a kontan demann ou Minis.

Byensir kan zot ekspekte pou fer en tel legzersis koumsa, ki zot pou kapab re demark bann semen. Espesyalman aswar kot sa laliny blan i reflekte aswar. I kapab ed en dimoun pou evit aksidan. Mersi Mr Speaker.

### **MR SPEAKER**

Mersi Onorab. Minis ou larepons.

### **MINISTER**

### **DERJACQUES**

### **ANTONY**

Mersi Mr Speaker. Mon a pran kont sa *request* e mon a demann *SLTA* avek *RPC* osi pou fer en pti legzersis. E nou ava al dan loto, mwan osi mon en drayver, nou ava gete e nou ava sey fer plis ki nou kapab. Mersi Mr Speaker.

### **MR SPEAKER**

*Thank you.* Kestyon Onorab Naidu.

### **HON SATHYA NAIDU**

Mersi Mr Speaker. Bonn apre midi Mr Speaker. Bonn apre midi Minis ek ou delegasyon.

Nou size semen, nou war ki ou koman Minis avek ou departman zot annan bann proze ase anbisye lo nivo nasyonal, e lo lot kote i annan

sa priyorite ki konsern re sirfas bann semen.

Par ler mon bann zabitant i santi ki, eski nou pa devret regard bann semen ki deza la an plas, pou fer sir ki i lo en standar ki akseptab.

So zot pe demande, eski nou pa devret pe met *on-hold* bann novo proze e regard dan bann semen ki deza la ?

Dezyenmman, ler nou pe koz lo *quality of work*. CEO SLTA in fek fer resorti ki i annan mankman lekipman. Kestyon se, konbyen eski sa bann lekipman pou koute? Akoz eski nou pa aste lekipman, apre nou ava regard dan bann gro, gro proze semen? Mersi.

## **MR SPEAKER**

Minis.

## **MINISTER ANTHONY DERJACQUES**

Mr Speaker bann proze bann semen i ganny evalye. Nou get kot volim trafik i ete. E nou sey degaz bann - parey nou dir an Kreol - lasasen.

E ler mon regard enn de bann proze ki pa bann *resurface*. Be par egzanp pou kree sityasyon pou deblok semen, i enportan;

Par egzanp kot STC, kot i annan sa 3 semen ki join en el semen, kot STC *roundabout*,

nou bezwen debloke e alor *tender* pe ganny lanse la. E dan enn de semenn, e kontrakter i sipoze kapab menm al *on site* lafen Avril apepre.

E wi nou'n gannyen serten sonm, apepre 60poursan larzan. E solman nou pou komanse. Akoz nou pa kapab asize esper lannen prosenn pou ganny *the full amount* pou nou fer sa semen.

Prezan dan sa 6 mwan ki pe vini pou nou kapab fini sa larout, pou deblok sa 50mil dimoun ki par zour i pas lo Providence Highway i vin travay anvil, nou ava diskite.

Kekfwa nou ava tourn kot Lasanble, kekfwa nou ava al kot Minister Finans pou nou ganny sa dezyenm porsyon pou nou deblok sa bann semen.

Ki nou pe fer, nou pe konsantre, par egzanp lo Pointe Larue, lo STC, lo Plaisance, pou deblok trafik. An menm tan, akoz nou annan en bidze ki nou'n dir i R58milyon, nou bezwen osi konsantre kot bann zabitant i reste, bann *secondary roads*.

Larepons e nou pe sey fer tou lede, e le mye posib avek sa ki nou annan. Parey mon'n dir, lannen pase avek tre pe, avek en gran rediksyon, nou'n fer 96 proze.

Sa lannen nou ankor an Mars, nou'n fini fer 22 proze ki'n fini. E bann ki nou pe fer la parey Mont Plaisir, Plaisance, *Highway* i pou bokou. Alor SLTA li i annan pti gin masin, i annan travayer.

Solman mon satisfe ki SLTA pe sey son mye. Nou bi se pou rezourd o plis ki nou kapab sa blokaz. Nou pa anvi ki Seselwa i *spend* 1erdtan pou vin travay sorti dan Sid, par egzamp 1erd tan pou ariv kot li.

Nou annan zis 24erdtan dan en zour. Nou pa kapab *spend* 2erd tan dan en transpor lo en semen piblik. Alor nou bi se fer li pa 2erdtan, kekfwa 1 erdtan. Se sa nou bi. Mersi Mr Speaker.

### **MR SPEAKER**

Mersi. Mon regrete, mon pou termin la lo sa kestyon. E nou pou pas lo lot kestyon. Mon apel Onorab Churchill Gill.

### **HON CHURCHILL GILL**

Mersi Mr Speaker. Bonn apre midi Mr Speaker. Bonn apre midi Minis e tou Manm. Kestyon limero 9 i lir koumsa,

Eski Minis i kapab donn lesplikasyon Lasanble lo *scope of work* pou premye faz semen Pasquere, Laplenn Olandez. Nou ti a kontan konnen, nou ti

a kontan ganny sa bann detay swivan;

Detay lo travay ki'n ganny fer, konbyen ki'n ganny peye pou sa bann travay? Eski Minis i kapab konfirm ek sa Lasanble si son Minister i satisfe ki tou travay in delivre dapre *scope*?

### **MR SPEAKER**

Mersi Onorab. Minis repons.

### **MINISTER DERJACQUES**

### **ANTONY**

Mersi Mr Speaker. Mr Speaker bi sa proze se pou konstri 3 kilomet semen depi Pasquere dan distrik Baie Sainte Anne ziska Grand Anse Praslin an pasan par Laplenn Olandez, koman en larout alternativ ant sa 2 distrik.

Sa semen pe ganny konstri par faz depandan lo larzan ki ganny donne dan Bidze Nasional. 2 faz sa proze semen in konplete an term travay civil.

E an trwazyenm faz i an progre e en katriyenm faz pou ganny met lo *tender* sa lannen. Premye faz proze i konmans dan krwaze semen Pasquere, dan distrik Baie Sainte Anne, e i al pou en zistans 60 met - 600 met.

Sa faz ti ganny *tender* an Mars 2019 atraver *open tender* e i ti ouver pou bann kontrakter

*class 1* selman. Nou ti vwar partisipasyon 5 kontrakter ki ti soumet zot lof.

E lof *Ascent Project* ti ganny aksepte a en valer R5.4 milyon. Annefe R5milyon 461mil, 463.

Premye faz proze ti komans an Out 2019 e konplete an Zilyet 2020, a en pri R4milyon 477mil 361 dapre evalyasyon ki ti ganny fer lo tou bann louvraz ki'n konplete.

Bann travay ki ti ganny antreprann dan sa faz, savedir son *scope* i konm swivan; Preparasyon sit, ki enkli derasin pye dibwa, netwaye, netway sit, kas ros, demolir pon e *culvert*, pou en kou R1.548 milyon.

Travay teren ki enkli koup lateras, ranpli miray ek later, *excavation* pou drenaz, pou, miray e a en kou total R374, 752 mil.

Travay konkret ki enkli konstriksyon drenaz, pon, *culvert*, i osi miray pou en kou R2milyon 430mil, 518.

Travay metal ki enkli fabrikasyon e enstalasyon ki bann *grill* i osi enstalasyon baryer sekirite pou en kou total R123, 250 mil. I bon note ki sa sit ti ranpli ek bokou ros e pye dibwa ki ti dan laliny kot semen pe ganny fer. E sa bann ros e

pye dibwa ti bezwen ganny demolir e koupe.

Trwazyenmman, tou bann travay in ganny antreprann dapre scope.

E ti annan lekspektasyon e evalyasyon proze regilyerman, pandan ki sa bann travay ti pe ganny fer. Par kont, i annan en seksyon dan sa faz ki pa ankor ganny konstri.

E *attendant* negosyasyon ant proprieter e dirzan later lo size konpansasyon. sa seksyon pa'n ganny, sa seksyon pa'n ganny peye. Ki fer ki i annan en diferans R984, 102 mil ant pri kontrakter e pri ki'n ganny evalye.

Mr Speaker dezyenm faz proze i komans dan krwaze semen kot Legliz Sainte Mathieu Grand Anse Praslin. E i al pou en zistans 120met.

Bann travay ki ti ganny antreprann, ti konsern elarzisman semen ki egziste, konstriksyon trotwar e konstriksyon en *boundary wall*.

Proze son kou total ti R750mil. Mr Speaker trwazyenm faz pe ganny antreprann, i en kontinyasyon avek faz 1. I al pou en zistans 500met.

Bann travay ki pe ganny antreprann dan sa faz i enkli preparasyon *site*, travay teren, konstriksyon *culvert* e osi

miray. Drenaz ek enstalasyon baryer feray. Sa faz i ekspekte kout R6milyon 870mil 840mil.

E sa i ekspekte konplete sa lannen. Pou annan en alokasyon 2.7 milyon dan Bidze sa lannen, pou en katriyem faz.

Anvi ki sa sonm i bokou mwens ki bann alokasyon oparavan, nou annan lentansyon fer sa katriyem faz kontinyen ek sa dezyenm faz dan distrik Grand Anse Praslin. Nou ekspekte *tender* sa katriyem faz an Me sa lannen. Mersi Mr Speaker.

### **MR SPEAKER**

Wi Onorab Gill. Mersi Minis. Nou a pran ou siplemanter Onorab Gill.

### **HON CHURCHILL GILL**

Mersi Minis pou ou leksplikasyon ki ou'n donnen. Mon annan 3 klarifikasyon. Enn ou'n dir ki miray in ganny fer, apre *backfield* ou'n mansyonnen.

Me selman ozordi si nou al la lo teren, sa 2 miray ler ou komanse, monte, napa *backfill* ladan. I annan zis sa pti bout dan milye kot semen ti deza egziste, ki transpor pe servi pe monte.

E 2, ou'n dir ki dezyenm faz in komanse, me selman an

menm tan ou'n dir premye faz i annan en bout pa'n ganny fer. Akoz i annan en diskisyon pou konpansasyon.

Ki grander sa bout from premye faz pou dezyenm faz ki'n ganny kite, ki an diskisyon? Akoz ler mon'n al vizite, mon pa'n vwar bout ki'n sote. Me mon'n plito vwar travay in kontinyen.

So ti a bon eklersi sa 2 pwen. Apre sirfas mon pa'n tann ou nonmen. Eski sa i en travay ki pou vin dan katriyem faz?

Akoz ler nou'n fini premye faz, nou'n bouz dan dezyenm faz, mon ti mazinen nou pou'n konplet sa premye faz, enkli son sirfas. Mersi.

### **MR SPEAKER**

Mersi Onorab. Minis.

### **MINISTER ANTHONY DERJACQUES**

Mr Speaker CEO i ava pran sa.

### **MR SPEAKER**

CEO tre byen. CEO.

### **CEO SLTA PARINDA HERATH**

Mersi Mr Speaker. Lo kote *backfield* Onorab, pa tou landrwa ki nou kapab *backfill* an se moman. Me selman parey Minis in eksplike dan son

larepons, travay letan in fini ganny fer, i ganny evalye.

Savedir i annan nou bann, QS i monte avek *project officer*, e osi reprezantan Minister Finans, ki evalye travay ki ganny fer e dapre mezir ki peyman i ganny fer.

Alors si i annan okenn landrwa ki *backfilling* pa ankor ganny fer, kontrakter pa pou ganny peye.

Dezyenmman i annan serten *backfilling* ki pou ganny fer par nou menm nou *Land Transport* avan nou met koltar.

Sa i osi relye avek ou trwazyenm kestyon, akoz nou pa'n met sifras lo sa premye bout. Vi ki sa i en semen ki kontinyen, nou, nou'n deside nou pa oule met en sifras lo sa premye faz avan ki nou'n fini sa semen an antye.

Akoz vi ki i annan bann gro transpor, bann *construction* lekipman ki pou mont lo la, parey bann *excavator* eksetera, e si nou met en koltar la i pou al andomaz sa sifras letan pe fer bann lezot faz ki vini.

Alors nou, nou pou met sa sifras letan nou'n fini. *Either* semen antye, oubyen si nou'n arriv lo en nivo kot nou konnen i - nou pou komans travay par lot kote par egzanp, la nou ava met sa sifras koltar.

Lo kote sa bout ki nou'n sote, i annan en distans environ 50met. Kot si ou pase ou pou war i annan en landrwa ki semen i en pti gin pli etrwat ki sa lot bout ki nou'n fer.

E lanmenm la ki sa negosyasyon i *still ongoing*. Me selman i pa en landrwa ki, i pa pou neseserman afekte nou proze, akoz larzer ki nou'n gannyen, menm si nou pa ganny sa *way ave*, mon krwar i pou ase pou nou larzer semen ki nou bezwen laba. Mersi Mr Chair.

### **MR SPEAKER**

Wi termin ek klarifikasiyon vitman *please Onorab Gill.*

### **HON CHURCHILL GILL**

Wi. Mon dernyen klarifikasiyon lo la, se avan ler nou ti al lo sa dezyenm faz, akoz nou pa ti konplet sa premye faz? Vi ki pou sa bann travay ki nou'n koz lo la, ki pa ankor fer.

Apard ki *resurface* ki mon konpran ou, ou pa oule met par bout. Sa bann lezot *backfilling*, fini aranz byen partou.

Akoz ki pou arive prezan vi ki ou pa'n konplet li, ou pou fer pli tar e kou materyo in monte. Ki pou arive? Eski Gouvernman pou bezwen vwar li pe met larzan ekstra.

Ki si ou ti'n konplet li avan, ou ti pou napa sa depans ekstra pou ou kapab fer. Mersi.

### **MR SPEAKER**

Mersi, CEO i a kontinyen adrese.

### **CEO SLTA PARINDA HERATH**

Mersi Mr Speaker. Annefe sa *backfilling* ki ou pe koz lo la Onorab, ki nou ti anvi fer sa *backfilling*, nou ti anvi fer li avek later ki nou pou tire dan dezyenm faz.

Savedir sa bann landrwa kot ou'n war i annan serten *backfilling* ki reste, i pou ganny *fill* avek sa proze li menm letan nou pe kontinyen avek dezyenm faz.

Savedir letan dezyenm faz pe fini, oubyen sa faz ki nou pe fer la *actually*, later ki nou pe tire laba pou fer *cut and filled* kot nou nivle, nou pe koup sa bann lateras eksatera.

Sa later menm ki pou vin zet dan sa bann landrwa pou fer *backfilling*. Alors non, mon pa ekspekte pou annan okenn kou ekstra. Akoz i pa en materyo ki nou pe aste pou vin met la. Nou pe servi materyo ki lo site menm. Mersi.

### **MR SPEAKER**

Mersi. Mon a pran kestyon Onorab Wavel Woodcock.

### **HON WAVEL WOODCOCK**

Mersi Mr Speaker. Sa proze si mon pa tronpe i pou kout en pti pe plis ki R40 milyon. Me selman zot pe fer sa proze *piecemeal*.

Sa proze ti al lo *tender* 2019, ti annan en alokasyon R5 milyon dan Bidze, ki pa ti neseserman ganny servi. Akoz proze ti vreman konmans an 2020.

E tou le lannen *from 2020*, nou pe ganny zis en pti alokasyon 5milyon 2020. 2021 5milyon, la 2022 i annan en pti alokasyon R2.7milyon.

Ki'n fer ki aepre en R13.7 milyon environ la in ganny depanse lo sa proze. Mon kestyon i akoz ki nou pe fer sa proze *piecemeal* ?

Akoz nou pa gete lekel bann proze ki priyorte ki nou ganny en alokasyon en pti pe pli gro, ki nou kapab pou anpes sa proze ariv pli kourt de letan posib?

E dezyenmman ti annan sa *issue* problem avek *PUC*. Kot zot ti annan en serten rezervasyon, sirtou kot sa bout kot sa *water catchment* i ete.

Eski zot in ganny diskisyon, zot in negosye avek *PUC*, regardant sa bout kot sa *water catchment* i ete, konmsi zot in ganny en *go ahead* avek

*PUC* ki pou napa okenn blokaz, ouswa okenn rezistans, ler zot ariv sa bout kot sa *water catchment* i ete. Mersi bokou.

### **MR SPEAKER**

Mersi. Minis. I annan 2 kestyon.

### **MINISTER**

### **DERJACQUES**

Sa konversasyon avek *PUC* i *ongoing*. E pe vin deplizanpli *urgent*. Akoz *PUC* i anvi fer en danm, e sa i en proze *PUC* pou bokou lannen. E mon pa war bokou mouvman.

Alor mon bezwen asize ankor enn fwa e dir avek *PUC* ki nou pe ariv anler kot li. Solman si *PUC* pa ankor fini e pa ankor fer son desizyon final, nou pou sot en bout, nou al komans, kontinyen kot Grand Anse pou mont anler, pou donn *PUC* plis letan pou zot kapab met an plas zot bann proze.

Alor nou annan diskisyon avek *PUC*. Par egzanp pou La Digue pou nou travay pres avek *PUC*. Annefe partou kot *PUC* i annan bann lenstalasyon lo semen, i annan en dyalog, e dan en fason ase regilye nou zwenn ansanm, Minis avek mwan.

Minis Joubert, nou zwenn, e nou osi enkli *PUC* son CEO, Mr Valmont avek Mr

Herath CEO SLTA. Nou pe fer bann *MOUs* ansanm avek *PUC*.

Nou pe antre ler nou konnen i annan en kontra, ou fer en kontra lo standar ki nou ekspekte *restoration of roads* avek *PUC*.

Prezan pou reponn direkteman ankor, wi nou an konversasyon avek *PUC* lo sa problem, kot zot anvi fer en danm par lao.

An sa ki konsern bann alokasyon larzan, i depan en kantite lo sa ki nou kapab negosye avek Minis Finans dan Bidze. E se zot osi dan sa Lasanble ler zot pe regard zot distrik.

E la i 2 distrik. Onorab Gill ou menm, Onorab Doyace ler zot pe get sa semen pou konekte Baie Sainte Anne avek Grand Anse, se a zot osi, pou li ensiste ki i annan plis larzan dan Bidze pou nou fini sa semen.

Zot kapab sizere. Solman pou sa lannen zot in donn nou en porsyon, nou pou servi li dan en fason profesyonnel ek efikas. E nou pou, sa lannen ouswa lannen prosenn, fini avek sa - konplet sa semen.

Selman i depan en kantite lo Minister Finans, e sa i depan lo ki mannyer lekonomi e ki nou kapab met dan Bidze pou fer fini sa semenn. Mersi Mr

Speaker. E CEO i kapab annan en keksoz.

**CEO SLTA PARINDA HERATH**

Non i ok. Mersi.

**MR SPEAKER**

Non i ok. CEO mersi.

**MINISTER**

**ANTONY**

**DERJACQUES**

Mersi.

**MR SPEAKER**

Mersi. Mon a pran kestyon Onorab Porice.

**HON DOYACE PORICE**

Mersi Mr Speaker, bonn apre midi a tous. Mr Speaker pou benefis tou zabitant Praslin, eski Minis i kapab dir nou si son Minister in prevwar bann proteksyon lanvironnman, kot i konsern nou bann nespes, plant andemik, delo, pti larivyer, pou nou pa ganny afekte letan sa proze semen Pasquere i fini?

Mon dezyenm, eski zot pe osi prevwar *pavement* avek sa proze semen Pasquere pou benefis zabitant Praslin? Mersi.

**MR SPEAKER**

Mersi. Minis.

**MINISTER**

**ANTONY**

**DERJACQUES**

Wi CEO ti prezant sa proze 2019 devan *Planning*. Alor mon a les li reponn lo sa *environment impact assessment study* ki ti bezwen neseserman ganny konsidere.

E PS li osi i lo *Planning Authority Board*. Alor mon a les zot reponn sa bout. Mersi.

**MR SPEAKER**

2 pwen. Mersi, lekel? CEO a komanse.

**CEO SLTA PARINDA HERATH**

Mersi Mr Speaker. Bon lo kote Lanvironnman ki nou letan nou'n *submit plan Planning Authority*, normalman plan i ganny sirkile avek tou bann Departman.

E Lanvironnman i enn bann Departman kle ki *review* tou bann plan ki pase. E nou, nou proze nou pa ekspekte pe afekte okenn sit dapre sa *feedback* ki nou, nou'n gannyen.

E lo kote striktir li menm, osi nou pa ekspekte i pou afekte okenn lanvironnman andemik eksetera. Alors lo kote kondisyon, *anything* ki lanvironnman in mete, nou pou fer sir ki nou, nou *abide by* sa bann kondisyon ki zot pou mete. Mersi.

**MR SPEAKER**

Wi, next point PS ki pou pran.

**PS PATRICK ANDRE**

Mersi Mr Speaker. Zis petet pou fer sa klarifikasyon. Letan sa proze ti ganny submit avek Lotorite Plan, i ti ganny assess.

E nou ti vwar poudir lo kote vezetasyon li menm li, ti napa okenn vezetasyon ki ti pe vreman ganny detri kek se swa.

E osi ti napa bann plant andemik oubyen ki lo lalis disparisyon ki ti pou ganny afekte. Sel *area* ki ti an pwen kon tansyon se zis anler kot sa basen delo nou apel li "anler lo oter."

E sa, anvi ki ti annan diskisyon ansanm avek *PUC*, ki ti pe annan bann negosyasyon, e Lotorite Plan ti pran sa bann negosyasyon diskisyon e komanter ki *PUC* ti mete, pou nou determin ki kalite striktir ki nou pou mete la ki pa afekte sa *waterbody* ki la anler.

So tou bann *referral agencies* ti pozitiv lo sa proze. E enkli lanvironnman avek bann kondisyon ki i ti set. So nou pa'n vwar okenn vreman lenplikasyon negativ ki ti pou annan lo sa proze li menm li.

Plito nou'n get son benefis ki i pou anmennen pou bann dimoun lo Praslin. Mersi Mr Speaker.

**MR SPEAKER**

Wi Minis.

**MINISTER**

**DERJACQUES**

**ANTONY**

Mr Speaker an sa ki konsern *pavement*, sa semen i larz, ase larz. E pou ganny en demarkasyon avek en laliny kot bann dimoun, bann *pedestrians* i kapab mase lo la pou servi sa semen. Mersi.

**MR SPEAKER**

Mersi. Mon pou pas lo prosen kestyon. Onorab Churchill Gill.

**HON CHURCHILL GILL**

Mr Speaker zis ou a permet mwan pou mon zis ekliersi en keksoz ki Minis in dir dan son larepons konsernan Bidze ler Onorab Woodcock in dir, akoz pa get priyrite.

I enportan ki piblik i konnen, apre dimoun Praslin ki pe ekout nou, konmkwa ki ler Bidze in vin dan Lasanble, nou Manm Lasanble, nou pa pou kapab fer monte sa Bidze.

Si minister Finans ek Gouvernman in dir i pe donn 5 milyon pou Pasquere par egzanp, ler in ariv la, nou, nou pa pou kapab dir met 6milyon. I enposib pou en manm Lasanble kapab fer sa.

Alors pwen kot sa negosyasyon i devret pran plas se avan i vin dan Lasanble, Minis Finans ek minister. E nou si nou ganny en loportinite pou asiz dan sa diskisyon, la nou pou annan loportinite pou nou kapab pouz nou azanda. Mersi.

### **MR SPEAKER**

Mersi Onorab Gill. Ou kestyon please.

### **HON CHURCHILL GILL**

Ok. Kestyon limero 10 i lir koumsa, eski Minis i kapab enform sa Lasanble ek zabitant Praslin kwa ki'n anpes sa proze lezot lenfrastruktir lo nouveau lasose pasaze Baie Sainte Anne demare pandan sa dernyen 13 mwan?

Kan ki Lotorite i ekspekte komans sa bann lenfrastruktir e dan ki dele letan zot ekspekte konplet sa proze pou ki zabitant Praslin finalman, ava kapab aret fer fas avek konsesyon ki'n la pou bokou letan lo sa lasose egzistan? Mersi.

### **MR SPEAKER**

Mersi Onorab Gill. Minis, panel.

### **MINISTER DERJACQUES**

### **ANTONY**

Mersi Mr Speaker. Konman parti son plan developman stratezik, kot tou sa bann lenfrastruktir anba son responsabilite, Lotorite Por in etablir en plan konpreansif pou developman bann facilite portyer pou Praslin.

E sa i enkli sa nouveau *passenger terminal building* kot sa nouveau lasose pasaze *Inner Island* Baie Sainte Anne Praslin.

Sa nouveau terminal pasaze ki pou al ganny konstri pou mark en lot letap dan servis avek loportinite ki pou ganny kree pou bann zabitant Praslin.

I enportan pou fer resorti ki Lotorite Por, in deza fer bokou lenvestisman tre enportan pou developman dan domenn Maritime lo zil Praslin.

E sa i enkli sa nouveau terminal pou pasaze, ki nou apel *the Passenger Terminal Building*. Zis pou enform zot, sa bann proze ki'n fini ganny fer dan sa dernyen detrwa lannen i enkli, lasose kargo, stokaz kargo e sa nouveau lasose pasaze, ki an tou in kout R25milyon. An plis ki sa, nou tou nou deza konnen ki pandan son vizit Praslin, Prezidan Larepublik, Prezidan Ramkalawan ti eksprim son swe ki sa proze i demare o pli vit posib, Ppu ki

sa nouveau lasose ki'n deza fini i komans ganny servi.

Anliny avek direktiv Prezidan, e prenon kont bann prosedir neseser pou realiz tel proze, Lotorite Por in angaz li pou fer sir ki premye faz sa proze i ganny realize dan en dele letan akseptab, e osi lo en standar ki tre o, pli posib.

Se dan sa konteks ki Lotorite Por in swiv tou bann prosedir. E pou zis met keksoz an perspektiv, permet mowa koman Minis pou etablir sa *timeline*, pou listre en pe bann demars ek prosedir ki'n ganny fer an respe avek preparasyon pou sa proze.

Mr Speaker premyerman, Lotorite Por ti ofisyelman lans sa proze swivan laprouvason son *Board* sa letan le 2 Zen 2020.

Let '*Expression of interest*' oubyen lentre pou bann konsiltan potansyel partisip dan *design* sa proze, ti ganny aprouve par *POU, Procurement Oversight Unit*, le 26 Zen 2020. Piblikasyon '*Expression of interest*' ti ganny fer le 7 ek le 8 Zilyet 2020.

Koleksyon bann dokiman, bann *bidding document*, par bann profesyonnel ek bann lakonpannyen ki ti enterese, ti ganny fer le 13 Zilyet 2020.

Ti annan 6 lakonpannyen oubyen profesyonnel ki ti kolekte sa bann dokiman. Swivan sa, ti annan selman 4 lakonpannyen konsiltan ki ti retourne avek dokiman le 24 juillet 2020 pou partisip dan sa proze.

Ant le 24 *Juliette* e Desanm 2020 ti annan diferan letap pou selekte en konsiltan pou sa proze. E tou sa bann letap i anliny avek prosedir *Procurement Oversight Unit*, osi byen ki avek *National Tender Board*.

Setyenm, sa prosesis ti kontinyen an Avril 2020. En konsiltan ti ganny idantifye. Pandan sa letan lekonomi Sesel ti ganny enpakte par pandemik COVID.

E sa pa'n fer bann prosedir sitan fasil parey normalman ti sipoze ete. An plis ki sa, swivan lapwentman nouveau *Board* Lotorite Por an Mars 2021, nouveau direksyon avek stratezi Lotorite Por ti alor reevalye, anvi sityasyon lekonomi.

Se a sa moman ki larsitek ti ganny apwente le 5 Me 2021 pou *design* sa proze baze lo bann nouveau direksyon ki *Board* Lotorite Por ti donnen, prenon kont nouveau sityasyon ekonomi ki ti'n sanze.

Apre ki larsitek ti'n pare avek plan pou sa new *terminal* pasaze, plan ti ganny aprouve par *Board*, le 7 juillet 2021. Sa plan ti ganny depoze kot *Planning* le 20 juillet e *tender* pou *structure*, savedir *structural engineering* ti lanse le 21 juillet 2021.

Trezyenmman, pandan sa letan ki lotorite Por ti pe esper laprouvason *Planning, tender* pou striktir ti'n fini ganny finalize le 29 juillet 2021.

E sa an Zanye ki ti ganny *tender*, i ti ganny enformen le 29 juillet 2021 e ofisyelman apwente le 12 Out 2021. Answit Lotorite Por ti resevwar laprouvason *Planning* pou sa lenfrastriktir le 8 Septanm 2021.

Swivan bann formalite aprouvason kot Lotorite *Planning*, Lotorite Por ti soumet dokiman pou *tender* kot *POU*. Bann formalite neseser ti ganny fer e *tender* ti ganny ouver le 11 Novanm 2021.

E la bann prosedir neseser ti ganny fer pou evalye tou bann *tender* anliny avek Lalwa *Procurement*. Lotorite Por i pare pou soumet sa bann detay *timeline* pou sa proze avek bann manm Lasanble, koman zot referans.

Baze lo bann *tender* ki ti ganny resevwar, Lotorite Por ti

analiz bann lof, e dan lenteryer sa proze an term lekspektasyon, kalite louvraz, direksyon ki ti pe ganny ekspekte pou sa proze konplete, Lotorite Por ti pran en desizyon le 6 Zanye 2022, pou termin sa prosedir e *retender* sa proze.

Sa desizyon ti ganny pran anliny avek tou bann paramet legal anba *Procurement Act*, osi byen ki *National Tender Board* ki ti resevwar e aprouv bann dokiman relevan.

A sa pwen i enportan pou fer resorti ki Lotorite Por in fini ganny laprouvason pou *retender* sa proze avek *National Tender Board*. E prosedir in deza komanse - prosedir.

Baze lo bann prosedir ki an plas e prenon kont lenportans e lirzans pou enplimant sa proze, Lotorite Por i pe ekspekte ki sa proze pou demar ofisyelman ver milye Avril 2022.

Savedir sa lannen, savedir dan 1 mwan. Proze pou konstriksyon sa terminal pasaze e ekspekte dire pou 6 mwan, e i pou kont environ apepre R12.3milyon e pou ekspekte konplete ver Oktob sa lannen.

Lot laspe sa proze i enkli fouy dan basen o bor lasose pou fer sir ki fonder ideal i ganny mentenir, pou ki bann groser

bato ki pou servi sa fasilite i kapab mannevre dan sa bout san okenn difikilte.

Letid neseser in fini ganny fer, pou vwar bann landrwa kot pou neseser pou fouye. Kontra pou fer sa travay pe al ganny lanse byento. E Bidze pou sa proze i environ R5 milyon.

Sa proze i ekspekte konplete an menm tan ki proze konstriksyon pou sa terminal. Mr Speaker i tre enportan pou osi fer resorti ki i annan lezot laspe devlopman lenfrastruktir Por Praslin ki dan plan pou ganny enplimante par Lotorite Por.

Parey mon'n fer resorti pli boner, novo *Board* Lotorite Por in revwar plan bann devlopman ki sa Lotorite i annan e model finansman osi pe ganny revwar, anliny avek novo sityasyon lekonomi.

Novo model finansman ki Lotorite pe konsidere, se pou annan bann *partner* avek sekter prive pou *investment* dan bann lezot lenfrastruktir Praslin.

A sa pwen, i osi ankourazan pou fer resorti ki i deza annan bann endividé ek *business*, ki pe montre lentere, ki pe vin devan.

Lotorite Por pou tre byento angaz li en fwa, an fwa, ankor enn fwa avek Lotorite Praslin

pou prezant son dernyen plan devlopman pou Praslin.

Swivan konsiltasyon avek Komite Praslin, bann plan devlopman pou ganny pibliye e *tender*, pou ganny fer dan en lespri latransparans e dan bonn gouvernans.

Lotorite Por i reste touzour angaze dan sa bann proze anba son responsabilite e proze pou devlopman Praslin. E sa i reste enn bann baz mazer pou Por pou transform sa zil pou anmenn bann diferan servis portyer, lo en pli o nivo standar pou tou bann Pralinwa ek Seselwa. Mersi Mr Speaker.

### **MR SPEAKER**

Mersi minis. Nou a pran siplemanter Onorab Gill.

### **HON CHURCHILL GILL**

Mersi Minis pou ou leksplikasyon byen detaye. me selman vi ki ou'n nomm, i annan plizyer konponan sa devlopman, pou sa enn ki pou, ki pou komanse an Avril, dan milye Avril ki pou fini an Oktob, si ou kapab dir nou spesifikman kwa ki pou ganny fer. Mersi.

### **MR SPEAKER**

Mersi. Minis.

**MINISTER** **ANTONY**  
**DERJACQUES**

Mr Speaker, sa pan in ganny soumet, in ganny aprouve e CEO i kapab donn bann detay spesifik dan son plan. Mersi Mr Speaker.

**MR SPEAKER**

CEO pou donn nou en pe detay la. Ok. Wi.

**CEO RONNY BRUTUS**

Mersi Mr Speaker. Bonn apre midi tou bann dimoun, tou bann Manm Lasamble. E pou ou reponn ou kestyion onorab Gill, premye faz sa devlopman ki pe al ganny fer la byento an Avril i pou konpri sa *passenger terminal building* li menm.

I annan bann fasilite *parking* ki pou ganny met en plas. I annan fouye dan basen, *grudging*. Pou fer sir ki nou ganny sa fonder ki neseser. E i osi annan sa *Traffic Management Plan* ki pou ganny finalize. Pou fer sir ki ler terminal i an operasyon, sistem sirkilasyon trafik i lo en standar ki akseptab.

Nou pa pou ekspekte pe anmenn menm sityasyon kot pasaze pe debarke konmela pou anmenn li Baie Sainte Anne. Nou pe ekspekte ki *traffic flow* li menm li i ganny amelyore e i vin lo en standar ki akseptab. E sa

i premye konponan sa proze pou le moman. Mersi.

**MR SPEAKER**

Mersi. Klarifikasiyon vitman silvouple Onorab.

**HON CHURCHILL GILL**

De dernyen klarifikasiyon. Enn mon kestyion spesifik ki mon ti pe demande, sa striktir *passenger terminal* i comprises of what, kwa ki i annan ladan?

Apre mon dezyenm, si Mini sou dir poudir Oktob ou ekspekte konplete, avek sa konponan i annan osi sa semen ki pou antre pou ou vin kot sa terminal ki'n deza koz lo la.

Akoz i tonm dan en *roundabout*. Napa en *roundabout* la, me selman i annan 3 lane ki zwenn ek kanmarad. Avek sa lasose i pou en katriyem *lane*.

I ti annan diskisyon ki ti'n pran par pou nou deside ki mannyer nou pou *flow* trafik pou o pase la, vi ki i pou annan 4 *lane* a lafwa? Mersi.

**MR SPEAKER**

*Thank you.* Lekel ki pou adrese? Minis, Minis.

**MINISTER** **ANTONY**  
**DERJACQUES**

Mr Speaker.

**MR SPEAKER**

Yes.

**MINISTER  
DERJACQUES**

Lo son *building* CEO Brutus i ava kouver. Lo sa *roundabout* ek *traffic management*, annefe Departman Transpor pe fer en *drone survey*.

Sa *survey* i enkli en *survey* lo kantite veikil, kantite sirkilasyon i annan pou nou kapab plan egzakteman ki nou pou fer. Par egzant si i pou en *roundabout*, akoz nou konnen i dan sa kwen ki i annan en kantite use.

Par egzant ti annan bazar lanmenm la. E ou konnen ki Seselwa zot kontan met en bazar kot i annan maksimonm loto ki pase avek *pedestrian*.

E tou bann trafik i lanmenm la, semen pou mont Vallée De Mai i lanmenm la. Alors sa *survey* pe ganny fer e sa i avek, direkteman avek PS, avek son Departman pe fer.

Lo bann partikilye dan sa *building*, par egzant *waiting room*, *ticket office* avek bann zofisyé Por, CEO i kapab donn plis detay egzakteman sak lasanm i pou kwa. Mersi Mr Speaker.

**MR SPEAKER**

CEO ou a donn nou en pe detay please.

**CEO RONNY BRUTUS**

Mersi Mr Speaker. Dan sa *building* li i pou annan *ticketing office*, sa i pou sa 2 *main operator*. E zot in vwar plan, zot in donn zot lide ki mannyer zot ti a voudre vwar sa *layout* i ete.

E nou, nou'n pran sa an kont. I pou annan en *baggage storage area*, ki ler zot *check in* zot *baggage* i annan en landrwa kot i pou ganny mete antretan ki bato i vini.

I pou annan *waiting area* parey i abitye annan. E i pou annan osi en *VIP area* ki pou ganny servi par tou lede operator pou bann kliyan *VIP*. E i pou annan tou bann lezot facilite osi ki asosye avek en terminal parey nou tou nou konnen. Mersi.

**MR SPEAKER**

Mersi. Mersi Onorab. Mon pou pran en kestyón siplemanter, akoz nou bezwen terminen 1er. Kestyón Onorab Larue.

**HON FLORY LARUE**

Bonn apre midi Minis ek ou delegasyon, mersi Mr Speaker. Mr Speaker nou bezwen pran kont ki sa proze ki Minis pe met

devan nou ki kestyon ki Onorab Churchill in demande, i en proze ki vreman laz lo kote kou.

Letan nou Gouvernman pe dil avek bann proze sa grander, kot i annan en plan, i annan en Bidze, me selman konstaman nou vwar i annan retar. Sa i en keksoz ki nou'n erite.

Me selman koman en Gouvernman ki novo, ki mannyer nou pou dil ek sa? Selman mon a donn Minis en legzanp. Lafen Zanyye Minis ti al fer en vizit anler Anse Royal Mont Plaisir pou en elarzisman semen.

I ti dir ki sa proze pou pran lan edmi, sa i en pti proze. Zot annan en Bidze, zot annan en plan, zot fer sa travay. Mon ti a kontan demann Minis, ki akoz sa enn proze ki ptiti pa ankor fini e la zot pe donn nou en lot plan.

Ki garanti ki zot pou donn nou, ki zot pou fer ki proze pou termin a tan? Akoz sa enn Anse Royal ki annan 1 mwan edmi, bann dimoun Mont Plaisir i ankor atan. Mersi.

### **MR SPEAKER**

Mersi. Minis a reponn lo proze Praslin silvouple.

### **MINISTER DERJACQUES**

**ANTONY**

Mersi Mr Speaker. Mon'n pas dan, mon'n fer li par ekspre, ki mon'n pas dan sa 13 staz pou sa *passenger headquarters terminal* Praslin. Pou mwan montre zot ki bann konplikasyon birokratik, ki neseserman i ganny enpoze lo bann proze kot ou pe servi later ek resours Gouvernman.

Ou bezwen pas atraver dan *Procurement Act*. En Minis ler i annan en proze, i soumet son plan, son konsep avek *Cabinet*. Ler sa i ganny aprouve, i *of course* i rod son bann *architect*, son bann enzenyer. Prezan i bezwen komans pas dan bann staz ki neseser, par egzanp pou ganny aprouve avek *Planning*.

*Planning*, i annan *the Planning Act*, ek novo *Planning Act* ki zot in fek aprouve. I annan son bann *Board* ki endepandan e i pa ganny kontrole par Egzekitiv.

E menm son *Appeal Board* ki'n ganny aprouve par Egzekitiv, e aprouve par Lasanble i fer sir ki sa i endepandan e i an deor kontrol Egzekitiv. Ler prezan ou'n fini ganny aprouvason en plan, ou bezwen prezan pran kont dan *Procurement Act*.

Sa bann *Board* ek sa bann *National Tender Board* e son bann *Appeal Board*, *Procurement Appeal Board*,

tousala i endepandan. E lo la i annan bann dimoun ki *expert*, e sa bann dimoun ki parey nou menm, ordiner, zot osi zot annan zot bann pwennvi. Prezan, ki kalite proze i ganny diskite, ki kalite proze, lafason si i *direct bidding*, si i *selective bidding*, si i *open tender*. Tousala i annan son prosedir.

I pa otomatik ki ou met en *selective bidding* ouswa en *direct bidding* ki ganny aksepte. Bann *Board*, bann dimoun i endepandan. Zot annan zot lide, zot kontrol, zot prosedir. I nepli letan e i pa parey oparavan kot Egzekitiv sa ki li i deside i ganny aksepte. I parey sa Lasamble, zot endepandan avek Egzekitiv, e i pa neseserman tou keksoz Egzekitiv i met devan zot ki pase.

Zot fer bann amannman, zot *postpone*, zot met *delay* ki neseser, ki responsab, pou zot fer zot travay. E sa i egzakteman ki pe arive avek bann proze Gouvernman atraver *Procurement Act*, atraver *POU*, parey nou apel li, avek *National Tender Board*.

Si ou'n get dan sa *timeline* ki mon'n donn ou, ou pou vwar ki i annan menm kot *Board* li menm li, in deside ki i anvi fer en *new design* pou sa *building*,

ler sa nouveau *Board* ti ganny apwente boner lannen pase.

E son *architect in resubmit*, menm ki Prezidan ti'n monte 1 mwan avan. *Board* in deside sanz sa plan sa *building*. Prezan ler ou *resubmit*, it goes back to *Planning*. E once it goes back to *Planning*, ou repas ankor dan *Procurement* pou kapab ganny en kontrakter. E a lafen Port ti deside ki sa prosedir i bezwen *stop*, e en *new tender* i ganny fer pou bann rezon spesifik ek valab.

Alor Mr Speaker, comme bann regilater, comme bann oversight, zot osi zot konnen ki i annan dan *Procurement Act*, zot konnen ki i annan dan *Planning Act*.

Alor zot bezwen ekspekte ki i annan bann prosedir legal, rezonnab ouswa pa rezonnab. Selman Egzekitiv i bezwen travay ek bann Lalwa ki Lasamble in pase. Mersi Mr Speaker.

## **MR SPEAKER**

Mersi. Onorab Larue nou pou termin la. Mon pou remersye Manm pou zot pasyans. Mon'n prolong sa peryod, akoz nou letan apre midi i ase lib. Me, e mon krwar ti annan lentere dan serten bann kestyon ki ti'n ganny leve.

Apre midi nou pou kontinyen avek en kestyon. Akoz mon'n aksepte en kestyon koman Irzan baze lo lensidan linondasyon ki ti arive ek go lapli semenn pase.

So nou pou repran travay 2er edmi. E mon, en leskiz pou Komite ki ti pou zwenn, fotespere zot ava annan letan fer zot *meeting*. Bon nou a pran *break* la, e nou a rezwenn 2er edmi. Mersi Minis ek ou delegasyon.

### **(BREAK)**

### **MR DEPUTY SPEAKER**

Bonn apre midi tou Manm Onorab. E tou manm piblik ki pe swiv nou sesyon pou sa Mardi. Byenveni pou kontinyasyon nou travay pou la apre midi.

E an akor avek *Order 34* nou pou aprezan annan en *Urgent Question*. E mon ti ava demann *parliamentary reporter* pou kriy delegasyon silvouple.

Mon ava swet labyenveni Minis Errol Fonseka - Minis pou Zafer Entern avek nou. I akonpannyen par Direkter Zeneral pou *Disaster Risk Management Division, DRMD*, Mr Robert Ernesta, pou nou *Urgent Question* e mon ava envit

Onorab Wallace Cosgrow pou demann son kestyon silvouple.

### **HON WALLACE COSGROW**

Mersi Mr Speaker. Bonn apre midi Minis avek Mr Ernesta. Bonn apre midi tou dimoun.

Mr Speaker dabor avan mon antre lo mon kestyon, mon ti ava zis kontan petet pou lenformasyon Lasanble avek Manm piblik an zeneral.

Mon *Urgent Question* ozordi ti annan 3 part. E ti konsantre lo 2 *main issue*. Enn ti lo sa *issue* dezas. Apre dezyenm *issue* ti lo petet serten konpansasyon finansyel ouswa lasistans finansyel ki Gouvernman ti kapab ofer bann zabitan bann distrik ki'n ganny afekte, atraver petet *ASP*.

Apre petet vwar en pti pe ki kalite lasistans ki kapab ganny donne a bann biznes ki'n ganny afekte pandan sa movetan ki'n pase tou dernyerman.

Mon fer referans avek bann letan dan lepase. Par egzanp *Felleng* kot ti annan bann lasistans ki ti ganny donne.

Me Lasanble Nasyonal in trouve poudir ki mon kestyon i pa neseserman an akor avek *Standing Order*.

Alors mon'n ganny demande pou mwan revwar

mon kestyon. E mon pa met kestyon lo *Order Paper*. Solman mon revwar mon kestyon. E mon kestyon i annan zis en *part ladan* ki'n ganny garde. I enportan pou manm piblik konnen.

### **MR DEPUTY SPEAKER**

Wi Onorab. Osi pou lenformasyon Lasanble, avek lenformasyon piblik Speaker ti'n komunik avek ou pou eksplik ou byen.

Akoz an akor avek *Order 36* nou *Standing Orders*. I dir “not more than one subject matter, shall be referred to in any question.”

So ou kestyon orizinal ti annan 3 *subject matter*. Ki al kont nou *Standing Order*. Donk, mon krwar i annord ki mannyer Speaker in fer. Donk ou ava proceed avek ou kestyon. Mersi.

### **HON WALLACE COSGROW**

Mersi Mr Speaker.

### **MR DEPUTY SPEAKER**

*Proceed* avek ou kestyon Onorab. Mersi.

### **HON WALLACE COSGROW**

Mr Speaker. Nou *proceed* lo point of order, or...?

### **MR DEPUTY SPEAKER**

*I insist you proceed with your question.* Mersi.

### **HON WALLACE COSGROW**

Mr Speaker, mon kestyon i lir koumsa; In annan bokou konsern par popilasyon an zeneral swivan lapli ki ti koz linondasyon dan plizer landrwa.

Sirtou dan distrik Mont Fleuri e Lavil Victoria, kot bokou propriete in sibir ser ten domaz.

Sel parti mon kestyon ki mon'n kapab met devan Lasanble ozordi, se eski Minis responsab pou Risk ek Dezas i kapab enform sa Lasanble kwa ki pe ganny fer pou ki sa sityasyon pa repet ankor.

Mersi Mr Speaker.

### **MR DEPUTY SPEAKER**

Mersi Onorab. Minis. Larepons.

### **MINISTER ERROL FONSEKA**

Mersi Mr Speaker. Mr Speaker. *Leader of Government Business.* *Leader Lopozisyon*, tou Manm Onorab, manm piblik ki a lekout bonn apre midi. Onorab Cosgrow mersi pou ou kestyon.

Sa lensidan ki ti arive Vandredi le 11 Mars, ti enn ki ti ariv tre rar. En stabilite dan ler lokalize, ek en gran diferans dan nou *temperature gradient*,

in kre en devlopman nyaz ki nou apel *columbus nimbus*. E sa i anmenn en gran kantite zekler e inondasyon tre vit.

San fer keksoz konplike, mon le fer resorti ki sa fenomenn ti diferan konpare avek en sistenm depresyon ki pe bouz ek en serten vites. E ki permet en *warning* pli boner.

Mon konn sa akoz enn mon *pastime* i etidye bann zafer letan. Parey zot in war, en gran volim delo in desann dan lavil. E serten lezot landrwa lo Mahe.

Me si zot remarke, in tant pou tenir toultour sa *massive* Morne Seychellois, Morne Blanc, ek *Trois Frére* dan son Les e dan son West.

Par kont bokou landrwa ti totalman sek. Mr Speaker, bann sityasyon koumsa i demann prensipalman 2 keksoz. Prevansyon i en legzersis kordinen.

Lo ou kestyon prevansyon Mr Speaker, Gouvernman in fer plizyer preparasyon depi nou'n pran lofis.

Parmi se distrik Anse Boileau par egzanp. Konbyen letan zabitant sa distrik in mars en kannson ki'n tourn anler dan zenou.

Bann madanm e bann dimoun aze pa ti kapab traverse sorti kote Anse Louis pou li traverse pou li al lanmes.

Ozordi zabitant Anse Boileau i kontan ek sa travay debousman lanmar ki nou'n fer. E lapli ek loraz in e pli en gran problemm pou zot. Akoz tou i desarz dan delo sale.

Dan Distrik Anse Aux Pins e Point Larue osi, nou'n fer travay. E se pa'n travay okenn Onorab. Se plito travay bann tim Minister Lanvironnman. Minister Later. E Minister pou Transpor ki'n fer sa posib.

Selman in ganny fer pou benefis tou dimoun. E Onorab Point Larue i osi annan tou drwa pou li zouir sa lakonplisman.

Parmi lezot zefor ki'n ganny fer, se bann proze *water catchment clean up* ki Minister pou Lanvironnman an kolaborasyon avek *TRASS* ek *SFRSA*, ki pe fer partou menm Praslin.

La Digue in ganny netwaye an totalite o paravan mannyer ti ete ava. E delo i bouz byen ver lanmer fasilman ozordi. Pou zot lenformasyon Minister Lanvironnman i annan 65 kontrakter ki pe fer sa bann travay netwayaz larivyer.

Mr Speaker, wi travay i la li. Me kestyon ki mon'n anvi demande se ki sa Gouvernman avan in fer?

Lo kote preparasyon san dout i annan bokou pou fer. La

ki COVID in redwir. Mon pou ranforsi nou programm respe nou vwazinaz. Kot bann ka probasyon pou ganny ofer en swa dan servis kominoter.

Sa pou enkli netwayaz bann larivyer, tir bann lalyann anvaisan. E mentenir lapropte an zeneral.

Mr Speaker, mon bezwen fran e dir ki bokou in fer li en labitud pandan tou sa bann lannen pou zet salte partou.

E pa pran responsabilite pou bann konsekans bann tel aksyon. Sa mantalite lese fer i enn ki nou pa pou kapab kontinyen tolere.

Servis Probasyon ek prizon pou travay an kolaborasyon avek Minister Lanvironnman pou fer sa bann travay netwayaz ki pe kontinyelman kre debri dan desarz larivyer.

Parey zot in war servis prizon in fer diferans korperasyon pou ede dan kominote. Me parey mon'n eksplike, apard ki prevansyon nou lot responsabilite dan okenn ka irzans, i pou kordin tou bann diferan antite pou ki resours i ganny byen deploye.

Savedir i en travay ki priyotiz kote e ki kantite resours i ganny servi. Depandan lo gravite en lensidan.

Sa i ganny kordinen dan sa ki nou apel *Gold Command* dan nou *NIEOC*. Nou *National Integrated Emergency Operation Centre*.

Bann antite ki kordinen se *LWMA*, *LMGCA*, Lofis Mayor, *SDF*, *SFRSA*, Departman Lapolis, *PUC* e tousala i ganny kordinen par *DRMD*.

Mon le remersye tou bann antite. Bann kontrakter Prive. E bann endividé ki ti volonterman ed pandan sa *flash flood* le 11 Mars. Se sa lespri vin ansanm ki nou pei i bezwen dan bann ka irzans.

Antretan *DRMD* i dan en moman revwar tou son bann regilasyon. Kapasite *building* e kordinasyon pou met sa servis lo en lot nivo.

E prensipalman sa se nou *NIE* osi, en sant tre modern pou kordin bann loperasyon irzans.

Sa i pou donn nou sa efikasite pou dil avek sa bann sityasyon nou tou bout pei nasyonalman.

Finalman Mr Speaker. nou pli gro problem i senp. Nou bezwen aret sa bann *illegal dumping*. Sa bann *fridge* ki nou zet partou. Sa bann *cooker* ki nou zet partou. Sa bann lezot *washing machine* ki nou zet partou.

Problenm i pa avek larivyer. Problenm i pa avek *wetlands*. I pa avek lanmar. Problenm i pa avek letan. Nou problem i avek nou imen.

En minorite san disiplin ki'n ganny tolere tou sa letan. Mersi Mr Speaker.

### **MR DEPUTY SPEAKER**

Mersi Minister. Onorab Cosgrow ou annan siplemanter? *Proceed.*

### **HON WALLACE COSGROW**

Mersi Mr Speaker. Mr Speaker, parey labitid Minis i fer letour, i fer letour. Apre i mank *bulls eye*. Minis i byen poudir sa vye dimoun Anse Boileau ki pe al lanmes ki pa bezwen trous son kannson *anymore*.

Be ou mank le pwen.

### **MR DEPUTY SPEAKER**

Silvouple al lo kestyon. Pa reprimann Minis. Kestyon silvouple.

### **HON WALLACE COSGROW**

Wi in mank le mwen. Mon pa pe reprimann li mwan. In mank le pwen.

Le pwen se ki sa ki ti arive le 11, sa bann zafer ki nou ti war dan distrik Mont Fleuri e lavil. Se sa le pwen ozordi.

E Minis i pa'n adres kestyon pou kapab soulaz sa

bann dimoun dan rezyon lavil ki zot biznes in ganny afekte. Ki zot lakaz in ganny afekte.

Pou dir nou kwa ki son Minister, kwa ki *DRDM* pou fer de lavan pou ki sa zafer pa ariv ankor? Or si i arive nou kapab dil avek sa sityasyon.

Minis ou bezwen dir nou kwa ki *DRDM* pe fer? Petet kwa ki *DRDM* osi in fer depi Vandredi ziske ozordi pou kapab, depi le 11 ziske ozordi, pou kapab sort out sa sityasyon.

Akoz nou pa tann naryen. Nou pa tann naryen Minis. Se sa le problem. E dimoun lavil i bezwen konnen ki ou plan. Ki mannyer ou lyez ek *Environment*?

Ki mannyer ou lyez ek bann diferan Departman pou kapab sort out sa problem ki i pa ariv ankor Minis? Mersi.

### **MR DEPUTY SPEAKER**

Mon'n sezi 4 kestyon. Mon swete ki Minis in konpran mannyer ou'n fer letour. Minis *answer* silvouple.

Minis ou kapab reponn.

### **MINISTER ERROL FONSEKA**

Mersi Mr Speaker. Mersi pou sa. Mon pa tro konpran sa kestyon ki Onorab pe dir isi. Si mon ti annan en kontrol lo letan pou li pa ariv ankor, mon vreman napa sa kontrol.

So nou dan nou sityasyon nou pe get lo prevansyon. Parey mon'n dir i annan 2 keksoz nou fer. Prevansyon.

Savedir tou dimoun i annan son responsabilite, pou fer bann keksoz neseser kot son bout. Me anmenn tan nou, nou annan nou responsabilite pou fer sir ki bann desarz delo i mars byen.

Parey nou'n dir nou annan 65 kontrakter ki fer sa louvraz, sa louvraz netway delo partou. Netway larivyier partou.

So i annan en kantite resours ki nou'n mete lo sa bann zafer. E parey mon'n dir tou sa bann netwayaz ki nou'n fer i permet en kantite.

Sa sityasyon ki'n arive Onorab, parey mon'n eksplik zot i en *flashflood* ki'n arive dan sa *massive* Trois Frère, Morne Seychellois lo kote.

Me i ti en keksoz ki ariv tre vit. E sa fenomenn i fer sir ki en kantite delo i desann an se moman. Ou pa pou kapab anpes sa. Sa natir sa. Ou kapab fer prevansyon e prevansyon nou'n fer. E nou kontinyen fer. E DRDM la i pou kordinen sa *response* ki nou bezwen fer ler sityasyon in arive. Mersi Mr Speaker.

### **MINISTER ERROL FONSEKA**

Mersi Minis. Ou santi poudir i pa'n reponn dan sa 4 kestyon ki ou ti demande?

### **HON WALLACE COSGROW**

Mr Speaker zis dernyen. Minis ou dir i annan bann kordinasyon. I annan 65 kontrakter. Me 65 kontrakter, nou'n war landrwa antye in *flood*. Dir nou kwa ki zot pou al fer? Akoz ou'n dir fenomenn pou ariv ankor.

So si i ariv ankor, sa bann dimoun i ekspekte noy ankor dan delo? Kwa ki ou Gouvernman pou al fer pou revwar sa sityasyon pou *alleviate* sa problem? Sa ki nou bezwen konnen.

Si ou pa kapab dir nou sa, savedir napa plan. Zot pa'n fer okenn *assessment*. Zot pa'n fer naryen. Napa okenn plan! Mersi. Mon *rest mon case*.

### **MR DEPUTY SPEAKER**

Mersi pou ou kestyon. Minister.

### **MINISTER ERROL FONSEKA**

Mr Speaker mon krwar mon'n eksplike ki mannyer nou louvraz i marse. Nou prevansyon mannyer nou fer. E nou bann diferan antite ki nou kordinen pou ed sa bann dimoun ler keksoz i arive.

Mon pa kapab azout plis ki sa. Mersi Mr Speaker.

**MR DEPUTY SPEAKER**

Mersi Minister. Mon ava donn laparol Onorab Michel Roucou.

**HON MICHEL ROUCOU**

Mersi Mr Chair. Mon le dir en bonn apre midi spesyal tou zabitant Mont Fleuri. Espesyalman bann zabitant Corgate ki zot, zot in ganny plis afekte.

Mr Speaker, avan ki mon demann mon kestyon ek Minis. Mon le zis dir mersi a bann zabitant zot menm zot.

Akoz zot in montre sa *ownership*, sa *ownership* zot kominote. Kot zot in groupe la. Kot zot in ralye pou zot kapab donn kanmarad koudmen.

Mwan mon'n eksperyans sa, akoz mon ti la avek zot. Mon dir zot mersi Mr Speaker e tou le 4 kwen dan Mont Fleuri. Rochon osi tou kot Terrence anba Corgate Estate. Kot Mrs Romain anler Foret Noire osi tou in ganny afekte Mr Speaker.

Mon le dir zot mersi ki zot in reste brav. E ki zot in groupe. Bann ki pa ankor ganny okenn lasistans, DA in garanti mon poudir pou annan dimoun -

I annan en kontrakter ki'n vin devan ki'n pare pou ede. Ansanm avek tim Brigad, pou zot al kot bann fanmir pou gete

ki mannyer zot kapab ede, pou soulaz zot en pti pe.

Mr Speaker, mon kestyon pou Minis i se ki anvi ki Minis Lanvironnman ki ti la dan lepase, i pa ti war lenportans pou li rod fason pou netway en pti pe. Parey kot pon Kordgard Mont Fleuri anba. I annan gravye ki'n ogmante, ki sa in koz en problem pou anpes delo sirkil byen avek sa kantite *volume* lapli ki'n tonbe.

E si zot pe revwar pou zot ale pou gete pou tir en pti pe bann gravye ki'n la, ki'n kalsinen. Ki sa i ava fasilit demen zour i annan en gro delo ankor ki desann pou les delo *flow* byen.

Apre osi mon lot kestyon Minis, eski zot pe edik bann biznes demen pou zot pey en lasirans? Ki demen si i annan okenn dezas ki arive, ki demen zot konnen poudir zot lasirans i kouver zot? Mersi.

**MR DEPUTY SPEAKER**

Mersi pou ou kestyon. *Minister.*

**MINISTER ERROL FONSEKA**

Mersi Mr Speaker. Eski nou pe edik bann biznes pou pran lasirans? Si ou ouver en biznes, i par bann keksoz ki vin otomatikman. Akoz ler ou pe fer biznes la. Ou pe pran en serten

risk e ou bezwen kouver ou bann risk.

Sa sityasyon ki'n arive. Lo ou kestyion bann dimoun dan ou distrik Onorab, Mon asire *DRDM* i la pou asiste. E avek *Local Government* si i annan okenn led ki nou bezwen donn zot, *Local Government* i ava fer rekomandasyon. E *DRDM* i a fer sa. Apre rekomandasyon sorti *Local Government*.

Be lo ou kestyion bann biznes zot annan osi en devwar, pou planifye pou bann domaz ki kapab arive. Malgre sa kalite domaz. En kantite dimoun pa ti pe espekte. So i annan, i depan lo *cover* ki sa bann dimoun in donne.

Me selman i kapab annan kek sityasyon an plis ki zot pa'n prevwar dan sa kalite lapli mannyer in arive.

Akoz sa ti vreman en *one-off* sityasyon, ki pa ariv bonn a vini. E in pran tou dimoun an sirpriz. Mersi Mr Speaker.

### **MR DEPUTY SPEAKER**

E Minister i annan kestyion lo si pou *desilt* larivyier pou tir gravye ladan?

### **MINISTER ERROL FONSEKA**

Ou kapab zis repet sa ankor en pti kou Onorab.

### **MR DEPUTY SPEAKER**

Proced avek ou kestyion.

### **HON MICHEL ROUCOU**

Minis wi. An vi ki nou war kot Kordgard Mont Fleuri la kot i annan sa pon. La ti annan en blokaz la, avek bann debri ki ti pe desann.

An menm tan nou'n remarke poudir bann gravye la in kalsinen la. E nou pe demande si zot kapab vwar ansanm?

Nou ti ganny en vizit avek CEO Lenfrastruktir Mr Jitesh. Apre Minis Lakaz osi tou ti vin vizit nou. E osi Minis Ferrari osi tou ti la pou donn son sipor. Kot pou gete ki bann - rod en pti pe bann solisyon. Mersi.

### **MINISTER ERROL FONSEKA**

Wi Onorab. *In fact*, sa i pe arive. Parey mon dir sa bann kontrakter i la li, angaze ek Minister Lanvironnman.

So dan ou distrik i ganny kouver par sa. E i zot louvraz pou fer sa. So i zis ou bezwen fer kontak ek sa Minister, e zot la pou fer tou sa.

*In fact*, in fini ganny programmen sa. Mersi Mr Speaker.

### **MR DEPUTY SPEAKER**

Mersi Minister. Onorab Loze.

### **HON JOHAN LOZE**

Mersi Mr Speaker. *Minister ou dir nou ou annan 65 kontrakter. Mon prezimen sa i 65 kontrakter ki anba sa sistem kontra netway larivyer ki ou'n erite avek Gouvernman presedan. Zis parey sa DRD ki ou'n erite ek Gouvernman presedan.*

Mon premye kestyon mon ti pe mazinen si ti posib pou *redeploy* sa bann kontrakter pou fasilit travay en pe dan Corgate Estate pou ede?

Mon dezyenm kestyon, i annan sa bann vye lakaz Corgate Estate la, zot deza *structurally unsound*.

I annan pe rankontre bokou difikilte. Mon konnen ki mon koleg Onorab Roucou i annan serten travay osi ki in sey fer dan sa direksyon.

Prensipalman akoz *PMC* pa fer mentenans e reparasyon lo sa bann lakaz. E bann zabitan i deza annan bokou difikilte *wiring*, koneksyon delo.

Akoz *they are not being repaired due to the fact* ki zabitan in ganny *absorb*, pou pa pey zot *rent* tou le mwan, akoz vye lakaz.

So mon ti pe *wonder* si *DRD* ti kapab pase sey ede avek en *assessment*. Akoz i annan in vreman ganny afekte sirtou

kote kestyon lakwizin, elektrisite, delo.

Sey fer en *assessment* e gete si i annan nesesite e bezwen pou asiste zabitan an plis. Mon pa pe dir sa akoz Onorab Roucou pa'n al dan sa direksyon. Mon konnen i annan serten travay ki in fer. Mon pe zis donn en sipor e *l'appui*.

Apre Minis dernyen pwen ki mon pe leve, letan ou demande ki Gouvernman presedan in fer.

Minis nou'n kit en Gouvernman fonksyonnel. En pei ki bon. En lekonomi performan ki permet ou ek ou bann koleg pou pran ankor *allowance* mwan pase *on top of* sa ta *allowance* ki zot in deza pran ! Mersi Mr Speaker.

### **MR DEPUTY SPEAKER**

Minis i ava inyor son dernyen komanter, akoz in demann en kestyon in reponn li menm. So i annan 2 kestyon, lo lasistans an plis pou zabitan, avek kontrakter. Mersi.

### **MINISTER ERROL FONSEKA**

Mersi Mr Speaker. Mersi Onorab pou fer. Byensir apre sa dezas la, i bezwen annan en revi kot serten led nou bezwen donn serten dimoun ki vreman i bezwen sa soulazman.

E sa i bezwen ganny fer byen. I pa en sityasyon ki tou keksoz i ganny kouver. Me mon krwar i annan en rol pou zwe la ki mon pou dakor ki *Local Government* i get ladan.

E parey mon'n dir *DRDM* i annan en sours ki kapab - en *contingency* ki kapab fer fas avek pou ed sa bann dimoun ki bezwen. Mersi Mr Speaker.

### **MR DEPUTY SPEAKER**

Mersi Minister. Onorab Rosie Bistoquet.

### **HON ROSIE BISTOQUET**

Mersi Mr Speaker. Bonn apre midi Minis avek ou delegasyon. Minis mwan mon pou al en pti pe lo sa bout ki'n - i annan konsern pou popilasyon an zeneral swivan lapli.

E mwan mon pe koz lo kote vi popilasyon zeneral konsernan inondasyon. Mon pou koz en pe lo distrik Point Larue. Mon pa pou koze me selman apre mon pou demann ou en kestyon Minis.

Parey taler zot ti pe dir delo dan zenou, delo dan lakaz, delo dan laboutik, delo dan lenfrastriktir. Point Larue in konn sa plis ki 40 ekek lannen.

E prezan.....

(Off-Mic)

### **MR DEPUTY SPEAKER**

*Point of order? Unless sa Manm ki annan floor.* Si i pare pou li sede.

(*Interruption*)

### **HON ROSIE BISTOQUET**

Minis mwan mon pe demann. Mon kapab kontinyen avek mon kestyon silvouple?

(*Interruption*)

### **MR DEPUTY SPEAKER**

*Order silvouple! Order!*

### **HON ROSIE BISTOQUET**

Minis zis lannen pase Pointe Larue in ganny 3 proze enportan ki in ganny tir delo lo semen. E an menm tan i annan en dren ki'n ganny konstri avek lanmar ki'n ganny fouye.

Minis dir nou dan ou Minister, eski i annan bann *feasibility assessment* ki'n ganny fer lo Point Larue? Sirtou bann *coastal erosion* pou kapab met bann stratezi an plas?

Si i annan dir nou ki lannen? E ki'n ganny fer? Mersi.

### **MR DEPUTY SPEAKER**

Mersi Onorab. I annan zis en dimoun ki p asiz la dan Chair ki pe Chair sa sesyon ozordi. E sa se mwan silvouple ! Mersi.

Minis *proceed* avek ou larepons.

### **HON SEBASTIEN PILLAY**

(Off-Mic)

### **MR DEPUTY SPEAKER**

Onorab Pillay si ou pa apresye avek travay ki mon pe fer. Ou lib pou ou sorti.

Minis *proceed* avek ou larepons silvouple. *Proceed Minister.*

### **MINISTER ERROL FONSEKA**

Mersi Onorab pou ou kestyon. Onorab byen, nou'n fer en kantite keksoz Point Larue. *Feasibility* lo Point Larue in ganny fer par Departman Minister Transpor. E i annan son bann plan pou sa.

Me detay lo la i pa ek mwan pou lenstan. Me mon konnen in travay en kantite lo la. Me parey ou konnen ozordi napa okenn delo ki ganny bloke.

Tou sa bann desarz anba *Airport* in ganny netwaye partou. So tou keksoz i mars ase byen. Pa vedir ki si ou ganny en gro lapli i pa pou *overflow as* en tel moman. Me pou lenstan mon krwar i anba kontrol.

Mersi Mr Speaker. Mon *hope* mon'n byen reponn ou kestyon. Me parey mon'n dir sa

detay lo la i ek Minister Transpor. Mersi.

### **MR DEPUTY SPEAKER**

Eski Onorab Bistoquet ou annan klarifikasyon?

### **HON ROSIE BISTOQUET**

Wi Mr Speaker. Mr Speaker en lot mon kestyon mon ti demande. I annan 3 *feasibility assessment* ki ganny fer.

Ki ti ganny fer pou Point Larue sirtou *coastal erosion*. E sa i ti dan bann letan 2000. 2014 mon krwar si mon pa tronpe.

Eski nou kapab ganny sa rapor? E ki sa bann rapor in dir, ki bann stratezi ti ganny dir pou met an plas, pou fer sir pou anpes delo mont ankor dan Sesel sirtou dan Point Larue?

### **MR DEPUTY SPEAKER**

Mersi. *Minister.*

### **MINISTER ERROL FONSEKA**

Ki ou kestyon egzakteman LO kestyon sa *coastal erosions*?

### **MR DEPUTY SPEAKER**

I pe koz lo sa bann *feasibility study* ki'n ganny fer.

### **MINISTER ERROL FONSEKA**

Mon pa *aware of* sa *coastal erosion* rapor ki'n ganny fer. So -

**MR DEPUTY SPEAKER**

Onorab demann ou kestyon pli *sharp* ki Minis i ava kapab konpran e nou ava *move on* lo la.

**HON ROSIE BISTOQUET**

Non mon pe- Petet pou eklersi se ki i annan bann letid ki'n ganny fer. An tou mon krwar i annan 3 letid ki'n ganny fer. Petet pou ed nou en pe Manm Lasanble ouswa bann dan Gouvernman osi, avek lezot piblik ankor an zeneral.

Petet, ti annan 3 rapor. Enn ti ganny fer par *UN Communication Framework Convention Climate Change 2000*.

Lot ti ganny fer 2014 en *Study Coastal Erosion and Flood* pou annan kontrol *Management* dan Sesel. Ti fer par *JICA*.

Eski nou kapab ganny sa bann rapor silvouple? Ki nou kapab konnen vreman ki mannyer nou kapab met sa bann stratezi an plas. Si petet Gouvernman dan lepase pa'n fer, e nou, nou ava kapab sey fer keksoz. Mersi.

**(APPLAUSE)**

**MINISTER ERROL FONSEKA**

Mr Speaker mersi pou sa. La mon konpran ou pli byen. Lo sa bann demann ki ou'n demande, mon a ganny sa sorti Minister Lanvironnman nou a *forward* kot ou. Mersi Mr Speaker.

**MR DEPUTY SPEAKER**

Mersi. Onorab George Romain.

**HON GEORGE ROMAIN**

Mersi Mr Speaker. Minis bonn apre midi avek ou delegasyon. Minis sa gro lapli ki ti tonbe sa zour Vandredi, mon krwar Vandredi menm -ya.

I ti en lapli ki tou dimoun vreman pa ti espekte. E mwan mon en ansyen zabitan Mont Fleuri, byensir mon senpatiz avek Onorab Roucou dan sa letan.

Me selman mon kestyon pou Minis, an vi ki sa bokou delo ki ti pe desann la o bor kot Lapolis la, kot sa pon ki nou pe vvar lo televizyon. Kot bann dibwa ti'n bare la. Nou ti tann bann dimoun ki ti pe ede. Ti dir anba la dan bann dimoun ki ti pe ede. Ti dir anba la i annan bann tiyo ki pa pe servi ditou isi la.

Zot ti pe mazin pou fer, akoz dan le fitir zot pa tir sa bann tiyo. Akoz pe ede pou blok sa bann dibwa ki ti pe desann.

Apre an vi ki sa ta delo ki ti pe desann ki ti'n bloke, eski

zot pe mazin fer en pti *survey*? En *survey* dan en fason pou get sa pon si i vreman ankor ase solid. Si i pa'n ganny en pti pe andomaze? Sa mon premye kestyon.

Apre mon dezyenm kestyon. Sa ki'n arive i en lesion kekfwa pou nou pou le fitir. E alors mon pa'n vvar vreman parey kekfwa parey nou dir kot bann kote *firemen*, kekfwa ki ti kapab mobilize pou ale donn en koudmen. Oubyen menm solda. Akoz non war bann sivilyen ki pe *more or less* ede.

E mon mazinen si kekfwa nou ti'n kekfwa planifye li dan en fason avek bann dimoun. Parey mon dir kote bann *firemen*.

Zot en pi pe pli eksperyanse ladan. Kekfwa sa ti kapab osi evit en pti pe pou sa bann kantite delo kekfwa refoul dan bann lakaz bann dimoun.

Alors mon ti ava kontan ganny pwennvi Minis lo la. Mersi Mr Speaker.

### **MR DEPUTY SPEAKER**

Mersi. I annan 2 kestyon la Minis.

### **MINISTER ERROL FONSEKA**

Byen Mersi Mr Speaker. Mersi Onorab pou ou kestyon. Lo kestyon *response* ek bann

*firemen*. *Firemen* ti ganny deploye.

*In fact, believe it or not*, premyer deploymen ti Providence. Providence ti annan bann *building* laba kot en serten lakonpannyen. Ti annan delo pe vini.

E sa bann *firemen* ti enkli dan sa bann deploymen. Petet ou pa'n war zot. Be selman zot ti la pe fer sa. Pe servi laponp. Lo kestyon, zis mon le eksplik ou en keksoz, lo kestyon tou sa bann antite ki nou kapab servi par ler, sa ensidan la i pa'n prolongz en gran kantite letan.

So ti annan en kantite keksoz ki'n ariv tre vitman. Par egzanp sa bann kondwir ki - i bann kondwir sa ki ou war atraver lariwyer laba o bor *Regina Mundi Convent* avan. Bann landrwa koumsa. I pa zis la li.

I la akoz i annan bann *cab* ki zot in pase ladan. Me sa bann louvraz mon konnen Minister Rangasamy pe get lo la.

Akoz i fer bann latrap pou bann debri akimil lo la. Be sa bann konstriksyon lontan kot zot in fer zis par lao nivo delo. Me selman i ankor la.

Zot pou bezwen fer *bypass* pou sa. E i annan *survey* ki pe ganny fer lo sa

bann pon. Lo sa bann lobstak ki anpes - ki *track* sa bann zafer.

So an tou leka tou nou bann sipor ki nou annan. Pa tou ti'n ganny servi. Akoz keksoz pa'n ariv prolonge. So keksoz pa'n prolonge.

So menm ler *firemen* ti ape bouz pou vin tir sa gro tron. Sa gro tron, i dimoun ki'n koup dibwa ki'n met o bor lariwyer. Apre in ganny anmenn dan pon. Me menm ler zot in arive, sa kontrakter ti'n fini fer sa bout louvraz. So ti annan louvraz ki en kantite dimoun ti'n korpere. Vin ansanm pou netwaye. P

Parey mon'n dir nou remersi sa bann dimoun pou sa *quick action* ki zot in fer. E nou bezwen sa. Dan bann zafer dezas sa premye *response* ki ariv ek bann dimoun ki la lo sa bout. Lo sa bout i enportan sa. Akoz plizyer louvraz zot kapab fer ki anpes fer keksoz vin pli move.

So sa ti annan en kantite lasistans koumsa ki'n arive. Me nou annan lezot konsern ki nou bezwen get ladan. Ler ou annan sa kalite delo par egzanp.

Ou kapab ganny konsern elektrisite ek bann problem koumsa, ki nou bezwen revwar byen menm, ki mannyer nou pou dil avek.

So i annan en kantite danze ler ou pe fer sa bann louvraz. Mersi Mr Speaker.

### **MR DEPUTY SPEAKER**

Mersi Minister. Ou annan klarifikasyon ou pa satisfe avek larepons.

### **HON GEORGE ROMAIN**

Yes, Mr Speaker. I annan en kestyon ki Minis pa'n reponn. Kestyon Minis i si zot pe mazin pou fer en *survey* lo sa pon. Son striktir li menm pou gete si i pa'n andomaze pou le fitir - pou zot konnen. Mersi.

### **MINISTER ERROL FONSEKA**

Wi mon krwar. Mon ti krwar mon'n reponn ou. Pe ganny fer ozordi menm sa o kontrer Onorab. Mersi.

### **MR DEPUTY SPEAKER**

Mersi Minister. Mon ava donn laparol Onorab Uranie.

### **HON ROCKY URANIE**

Mersi Mr Deputy Speaker. Bonn apre midi Minis. Bonn apre midi Mr Ernesta. E bonn apre midi tou zabitan Digwa.

Mon'n tann Minis dir poudir La Digue delo i ale konmela. Minis pou delo ale nou war nou, nou bezwen fer en kantite travay.

E mon ti a kontan konnen si zot in ganny dimoun pou aktyelman responsab sa bann drenaz. Pou fer sir ki sa bann drenaz i reste lib pou ki delo i kapab sirkile?

Apre ki nou'n remarke mon'n bezwen war mon pas atraver tay deryer dimoun, tay deryer *Local Government* pou ganny permisyon letan delo in monte nou war nou, nou'n pas atraver birokrasi. Tro bokou birokrasi. Ou ganny demande pou al tir portre pou anvoy sepa ki bor avan ler ou ganny permisyon pou fer aksyon.

So dan letan kot keksoz i été, eski pou ganny *retire* en ta bann birokrasi ki zot in met an plas, pou ki keksoz i kapab ganny fer vit. *As long* ki DA ek MNA i kapab zistifye poudir be vwala nou bezwen fer sa dan limedya pou tire?

Akoz nou'n war nou an paravan bezwen pas atraver en gran prosedir lannen pase, pou kapab fer serten travay. Mersi.

### **MR DEPUTY SPEAKER**

Mersi Onorab. Nou pou aksepte son kestyon koman bann prosedir letan linondasyon i arive. An zeneral dan pei parey kestyon pe demande. So, *proceed* Minis.

### **MINISTER ERROL FONSEKA**

Mersi Onorab pou ou kestyon. Onorab wi mon konpran ki ou pe dir. Me selman i annan en kantite sa bann zafer DA, ou pe dir DA, MNA.

Parfwa ou bezwen pran ou keksoz dan ou lanmen. Akoz zot, zot dan bout. *In fact*, zot bezwen konpran nou, Mr Ernesta i annan en kantite louvraz pou fer, ek tou bann distrik - bann DA. I annan nou sistenm *Response*. I demande ki dan tou bann distrik ki annan, ki nou apel bann *Bronze Command*.

Sa bann *Bronze Command* la, ou ganny enkli ladan. Ou pou konpran ki mannyer pou rod led isi laba.

Me selman i annan en serten kantite louvraz ki ler dezas i arive, ou pa pe espere pou ou fer ou. Ou pou *get on with it*. Ou konpran mwan?

Akoz ou pou ansarz sa. Ou pou *command* sa loperasyon dan sa bout.

Dan nou *National Integrated Emergency Operations Centre*, kot *Gold Command*. Li i kontrol bann resours ki ou pou bezwen.

Petet i annan bann *extra* resours *Caterpillar* isi laba, ki bezwen ganny anvoye.

Nou pa pou anvoy partou. Nou pou anvoy sa dapre irzans

serten landrwa. E nou proyoritiz sa bann zafer.

Sa i ganny kontrole. Sa bann resources i ganny kontrole par *the Gold Command*.

Be *going back* pou ou kestyon, lo ou bout la, ou ki debourye. Ou ki debourye e ou pou annan, solman ou pou annan komunikasyon ek *the Gold*.

So koumsanmenm i marse. E nou anvi bann sistemkoumsa kot ler i annan en dezas dimoun pa pe espere pou debourye.

Ou pran sa dan ou. Selman *obviously* ou'n ganny *training*. Ou'n ganny tou bann keksoz ki neseser. E ou kapab pe rapport ou sityasyon.

Mon krwar mon'n eksplik sa ase byen. Mersi Mr Speaker.

### **MR DEPUTY SPEAKER**

Mersi Minister. Teknikman mon'n ferm lalis. Akoz i annan ki pe zis kontinyelman lev zot lanmen. Donk bann ki lo lalis zot ava ganny sans demann zot kestyon.

Mon pa pe pran ankor novo kestyon. Onorab Loizeau. *Minister* ou ava donn li mic silvouple.

### **HON NORBERT LOIZEAU**

Mersi Mr Speaker. Mr Speaker vi ki ek sa gro lapli, si zot pou remarke, mazorite sa bann delo ki'n desann in sorti dan Distrik Bel Air anler lo montanny. In desann in al fer dega anba.

E Sanmdi dan nou pe vizit ek *DA*, serten zabitan nou'n notice serten keksoz anler lo montanny. Si zot debout anvil zot pou get lo nou montanny ti annan landrwa kot lontan ti annan en delo ki ti desann avek gro lapli.

Me gradyelman nou'n trouve ki i annan lezot landrwa ankor ki menm si lapli pa gro, i annan serten delo ki pe desann kot avan ti napa.

E la, mon annan portre tou nou'n tire. E la avek sa gro lapli ki'n arive, in desann pli gro ankor.

E dan rezyon Hunt Road Sans Soucis, i annan bokou lakaz ki annan serten larivyer ki ou pa ti war li, ou pe war li ozordi.

I annan en sanzman dan larivyer. E koze ki mon'n gannyen avek en garson ki enterese ek lanvironnman, in koz ek mon lo konsernan bann pye Albizya.

Pye Albizya vi ki i en plan entrodwir Sesel in anvair nou kolin li. Anler Sans Soucis si ou pou al *Trois Frére*. Pye Albizya

pa pe pouse lo later. Albizya pe pous lo ros.

E dapre resers ki sa garson in fer, mon annan portre mon ava anvoy ou Minis, zot pe pous lo roz e zot rasin pe ouver sa bann ros.

I annan landrwa kot ou ti war delo pase, ou pa pe war. Delo pe pas lo bor. Eski zot aprezan la, avek sa lapli in bonte i byen. I pe donn nou en fason pou nou get keksoz dan en lot dimansyon.

Eski zot, ansanm avek Lanvironnman zot pe fer serten resers anler dan bwa - spesyalman sa bout rezyon *Trois Frére*. Nou konnen larivyer i ganny formen atraver en gro rezervwar anler. Kot ler gro lapli i tonbe apre li i desann i form la.

Eski i annan resers ki pe ganny fer pou vvar en pe ki cityasyon ou leta anler la kot sa bann delo pe desann? Mersi.

### **MR DEPUTY SPEAKER**

Ok mersi pou kestyon. En kestyon i annan Minis. Resers dan bwa.

### **MINISTER ERROL FONSEKA**

Mersi Mr Speaker. Byensir Onorab. Mersi pou ou kestyon. Sa travay, *in fact* i annan en travay ki nou pa pe war nou pe arrive. Akoz *unless* ou al dan montanny, ou pa pe war.

Me i annan en travay ki Minister Lanvironnman pe fer. I vreman byen. Dan bann *rivers*, *wet lands* ek *marshes*, konmela i annan en group dimoun ki pe travay dan tou sa bann *area*.

Ki pe vreman anmenn en zimaz tre zoli dan nou lafore. E mon felisit Minister Lanvironnman pou sa bann louvraz.

E naturelman lo kestyon pye Albizya. Mon pa pou tro konn larepons ki bann konsern i annan ek sa. Akoz i pa mon domenn sa.

Me mwan mon konnen ki ler ou pe koz lo delo ki ou pa ti war, ozordi ou pe war. I vreman, petet sa ti sa kantite delo ki ti deroule.

E delo toulstan i pou swiv larout pli vit pou desann anba. So, e konmela i annan en kantite konstriksyon. Osi en kantite sanzman semen.

Tousala i afekte nou fason ki delo i ariv anvil. So toulstan nou bezwen pe revwar sa bann danze. E possibilite okenn danze arrive.

Me selman mon le fer ou, mon le asir ou ki sa bann louvraz ek Minister Lanvironnman. Akoz dan bann bwa partou zot fer en kantite louvraz.

Si dan bann *weekend* ou al marse anler laba ou pou war

bann zoli louvraz ki bannla pe fer.

Espesyalman dan sa bann *rivers, wet lands* ek bann *marshes* osi. So mersi pou ou kestyon, me selman i en keksoz ki mon ti ava ankouraz en kantite zot pou vizite par ler.

Akoz nou pa pe war sa. E mon konplimant sa bann dimoun ki pe travay lo la. Mersi Mr Speaker.

### **MR DEPUTY SPEAKER**

Mersi Minister. Onorab Aglae.

### **HON EGBERT AGLAE**

Mersi Mr Chair. Mr Speaker. Bonn apre midi Minis. Minis mon'n ekout ou atantivman bann larepons k ou'n donnen.

Mon santi petet ou pe mank en pti gin lesansyel pou nou kapab adres serten problem.

Minis sa problem ki'n pase ti kapab ariv lo en nivo nasyonal. Ok. E i malere zis distrik dan lavil ki'n ganny plis afekte. E mon siport mon soutyen avek sa bann dimoun. E osi Port Glaud nou annan 2 zabitan ki'n ganny lenpak.

Minis baze lo sa. Sa ki mon ti ava kontan petet demann ou, an term rekour. Akoz pa bokou keksoz ki'n ganny koze lo rekour la. Pou

kapab anmenn serten soulazman.

An menm tan travay kontinyel. So ou'n sit enn, de legzanp Minis. Me selman mon santi petet ou en pti pe tro konservativ ek serten lenformasyon ki ou pe donnen.

So mon ti ava kontan petet Minis de lavan, di-si de la, petet ki bann priyorite ki zot pe mazinen atraver *DRDM*?

Mon pe koz ou lo en baz nasyonal la Minis. En mannyer ki tou bann facilite. E sa i konsern kot *Local Government* osi zot annord, kot i konsern mitigasyon, avek led *DRDM*.

E osi bann lazans ki ede pou fer bann mitigasyon. En mannyer ki kan en keksoz i arive, si i ariv minwi, 1er bomaten. Nou pare, nou pe bouze, nou pe al aport soutyen, nou pe al aport sekour. Mersi Minis.

### **MR DEPUTY SPEAKER**

Mersi pou ou kestyon. *Minister*.

### **MINISTER ERROL FONSEKA**

Mersi Mr Speaker. Mersi Onorab. *In fact*, sa en gran kestyon ou'n demann mwan. Akoz i annan sitan keksoz lo planifikasyon lo kestyon *DRDM*. Ki nou pe *set-up*. Tou sa bann Lazans. En keksoz ki ou pou war dan Gouvernman ozordi.

Nou sey pa kre nouveau antite si i annan en servis ki en Lazans i kapab *provide*.

E par egzamp lo kestyon bann Lazans parey *Land Waste, Ministry Local Government*. Taler zot in koz lo *Seychelles Defense Forces, SFRSA obviously, Lapolis, PUC*. Tou sa bann *District Administration*.

Tousala i annan en louvraz ki Direkter *DRMD* pe travay pou itiliz sa bann antite. Kordin zot fer sa louvraz pou egzakteman sa ki ou pe dir, Ppu kouver nasyonalman si en keksoz ti arive ki kouver partou.

So dan sa bann louvraz koumsa, sa kordinasyon i vreman lakle pou kapab *respond* byen ek sa bann zafer.

E petet mon ava envit *DG* pou koz en pti gin lo son louvraz. Me i pou pran en kantite letan akoz sa i konplike.

Mon pa konnen Mr Speaker si ou kapab permet sa?

### **MR DEPUTY SPEAKER**

Minis si ou pe dir pou pran en kantite letan. Nou rapel poudir i ti fek dan Bidze *not long ago*. Kot i eksplik *the new structure* ki dabor nou bezwen fer sir nou ganny son non byen - *Disaster Risk Management Division* pou nou tou. So, mon krwar i ava *ok*. Kekfwa Lasamble i merit

enterakte en pe plis avek *DRDM*.

Al rann en vizit *DRMD*. Olye ki nou les Mr Ernesta pou pran laparol ozordi apre midi. *Ok* so nou ava *proceed* avek lot kestyon. Mon ava kriy Onorab Pillay.

### **HON SEBASTIEN PILLAY**

Mersi. Bonn apre midi tou dimoun. Mon ti ava kontan demann Minis, so *that* ou kapab anmenn nou serten presizyon lo sa sityasyon ki'n pase. E retourn nou pou nou kapab reponn kestyon, pou sa 2 group zabitan ki'n ganny afekte.

Mon ti Foret Noire o moman ki sa delo ti pe desann. E ti kler ki ti annan en problem ek bann rigol. Ki pa ti pe kapab *cope* ek lakantite delo e ti annan bann lezot problem ki ti pe pase.

E delo ti'n deza pe komans antre dan bann lakaz. Mon dezapwente dayer ki Speaker pa'n *allow* dezyenm parti kestyon Onorab Cosgrow ki vin lo konpansasyon pa monneter, me lasistans ki pou vin pou bann zabitan.

I annan bokou zot ki pa bann dimoun ki annan bokou mwayen, ki zot lakour in ganny afekte.

**MR DEPUTY SPEAKER**

Onorab Pillay. Onorab Pillay *hold-on*. Si ou annan en problemm avek *ruling* ki Speaker in fer, met an ekrir met avek li.

Selman letan mon pe get *Standing Orders*, i annan tou son, *the power* pou sa ki in fer.

**HON SEBASTIEN PILLAY**

Mon dakor ek ou. Mon dakor ek ou. Mon dakor ek ou. Mon dakor ek ou.

**MR DEPUTY SPEAKER**

*So let's move on with the question please.*

**HON SEBASTIEN PILLAY**

Mon ti pe vin lo sa pwen e mon napa okenn lanmertim. Mon pwen sete ti annan en size ki ti dekoul dan 2 diferan *area*. E nou'n deza fer li dan lepase kot nou'n diskit tou lede size, akoz ti ava bon pou bann zabitan konnen ki soutyen, pou bann *MNA* konnen si soutyen bann Lazans parey *ASP* ti pou anmennen an sirkonstans bann dimoun ki'n ganny afekte.

Be nou pa pe kapab fer li apre midi. So lepep li i a note ki mannyer keksoz pe ganny fer. Annou vin... Annou vin...

**MR DEPUTY SPEAKER**

... Onorab Pillay *hold-on*.

**HON SEBASTIEN PILLAY**

Yes.

**MR DEPUTY SPEAKER**

Ou fer sa souvan. Zot touzour lib pou anmenn en lot kestyon pou sa lot Minis i kapab vin reponn, pou lepep konnen.

Konmsi pa bezwen abiz *the mic* letan nou annan. *Proceed* avek ou kestyon.

**HON SEBASTIEN PILLAY**

Mr Speaker, mon dir ou poudir mwan mon okenn ka mon annan okenn lentansyon abiz *the mic*. E mon *defer to your authority at all times* byensir.

E ou osi koman *MNA* Mont Buxton ou ti ava apresye ki si ti'n ariv Mont Buxton, ou ti a kontan konn tou bann larepons ki pe pase.

Me se parey mon pe rode pou zabitan Corgate Estate e bann dimoun dan lavil ki'n ganny afekte.

So, Onorab Larue labous pe koze lizye pe war me *the brain has gone ehh?*

**MR DEPUTY SPEAKER**

*Proceed* avek ou kestyon.

*(Interruption)*

**MR DEPUTY SPEAKER**

Onorab Pillay, Onorab Pillay.  
Be ou pa kapab zis adres en  
Manm *across the floor*.

### **HON SEBASTIEN PILLAY**

Mersi Mr Speaker. Mon pou adres mon kestyon. Mon kestyon i tre senp, *Minister*, eski ou kapab dir nou kwa ki'n lakoz sa bann delo monte dan lavil? Ki'n arive egzakteman? E ki pe ganny fer?

Si ou pa kapab eksplik nou Minis, donn Mr Ernesta loportinite pou li klarifye kwa ki pe ganny fer, pou benefis bann dimoun ki'n ganny afekte dan lavil. Bann biznesmenn pou zot konnen ki demen sa pa pou repeate. *Ok* premyerman sa i mon kestyon.

Dezyenmman, an relasyon avek bann zabitan ki reste dan distrik Mont Fleuri ki'n ganny afekte avek sa sityasyon delo monte.

I annan tout en gam keksoz ki vin avek apard ki delo ki'n monte. Me osi annan bann lezot fakter ki en delo monte i anmennen. I kapab anmenn lezot problem parey bann problem sanniter ki vin avek.

Eski ou Minister atraver *DRMD* in pran kont e ki bann mezir konkret ki ou pe pran, pou asiste bann lotorite distrik pou fer ki zot ava kapab *tackle* sa problem ki devan zot?

E mon trwazyenm pwen. Tre kler, tre *to the point* parey ou ava realize Mr Speaker, mon en dimoun ki kontan swiv byen bann prosedir.

Mon pou demann *Minister* pou klarifye avek nou, si i santi li *ok* ki bann *DA* zis en zour apre ki in annan sa dezas, zot in fer en nespes pyes teat, ki pou mwan mon santi i en pti pe *in bad taste*. E pa montre en si ou le en solidarite avek bann dimoun ki'n ganny afekte avek sa dezas?

Mr Speaker, mon konnen ou pou dir Minis *disregard* sa trwazyenm kestyon. Be si i kapab reponn sa 2 kestyon, mon ti ava vreman apresye. Mersi Mr Speaker.

### **MR DEPUTY SPEAKER**

Mersi Onorab. Minis mwan ki pou dir ou *disregard* sa enn trwazyenm. Napa naryen pou fer avek *the subject matter*. In demann 2 kestyon. Lakoz delo monte e dezyenmman kordinasyon avek lezot lotorite dan kominate. Mersi.

### **MINISTER ERROL FONSEKA**

Mr Speaker, mon krwar lo mon entrevansyon mon'n eksplike sa zafer rezon delo in monte. Mon'n eksplike ki sa fenomenn ti en fenomenn byen rar ki ariv tre vit. I apel *flash flood*.

Dan serten pei i annan *flash flood* ki arive dan montanny. Dan bann *district*, dan bann lavil anba zot pe travay, marse. En pti kou *flood* i vini i kouver lakaz i *destroy everything*. San okenn *warning*. I arive. E nou napa gran zistans sa. Selman in ariv lo menm sityasyon. I en koesyon tre vit e ki akimil telman delo bokou.

Me ler in ariv ater. Sa delo in ariv ater nou problemm Onorab i sa kantite debri ki dimoun i les partou. I zet en kantite. Sa larivyer la i annan 2 larivyer ki'n desann anvil. Mon konn zot byen. Larivyer Saint Louis apre larivyer Bel Air. E i sa bann landrwa kot larivyer i pase o bor lakaz ki zot zet en kantite keksoz ladan.

So nou annan en disiplin nou bezwen fer sir ki nou pa zet. Par ler o bor semen bann semen. Bann *pick up* i ale zis i devid keksoz o bor serten landrwa ki ganny blok sa bann desarz.

Nou problemm i sa. En kantite bann landrwa in ganny bloke. In anpes sa delo desann. Me sa kantite delo toultan i pou en *challenge* pou kantmenm ou larivyer i vid, i pou annan serten konsekans avek sa.

So rezon pou sa, rezon pou sa fenomenn mon krwar i

kler mannyer nou eksplike akoz sa lavil in ganny *flood*.

Me an menm tan osi, o moman ki ti ganny devlope, sa bann soz i ti ganny debouse ase vit. So i montre ou ki lefe sa bann zafer i annan.

Lo kestyon sa bann....

### **MR DEPUTY SPEAKER**

Kordinasyon ek lezot Lotorite dan kominate.

### **MINISTER ERROL FONSEKA**

Kordinasyon dan kominate. E parey mon'n dir *Local Government* i annan en rol pou revwar serten bezwen ki'n arive lo domaz. E parey mon'n dir lo *DRMD* i annan en fasilité ki nou kapab get bann lasistans ki nou kapab donnez lo la.

Lo sa dernyen kestyon Mr Speaker ki ou dir mwan pa pran.

### **MR DEPUTY SPEAKER**

Non pa reponn Minis. Non.

### **MINISTER ERROL FONSEKA**

*And.*

### **MR DEPUTY SPEAKER**

Se tou. I annan klarifikasiyon. Mon ava donn li en klarifikasiyon. *Minister.*

### **MINISTER ERROL FONSEKA**

*Ok mersi Mr Speaker.*

### **HON SEBASTIEN PILLAY**

Mersi Mr Speaker pou donn mwan Onorab sans fer en klarifikasyon. Minis mon'n ekout ou byen avek ou larepons ki ou'n donn nou.

Sa ki ou'n dir nou i en pti pe sa ki mon'n swiv dan bann *interview*. Me en kestyon ki mon annan, se eski bann dren dan lavil Victoria spesifikman ti annan problemm avek o moman ki nou ti annan sa kantite delo ki'n desann?

Mon'n tre enterese pou ekout Onorab Loizeau. Akoz mon pa krwar in al koz lo resers dan bwa. Be mon krwar in koz lo en keksoz ki fer sans.

Akoz dan son lanaliz pou li in war delo pe sorti dan son distrik ki en pti pe pli avanse ki ou Minis. Paret Onorab Loizeau in fer en pti e plis travay ki ou.

Me selman sa ki mon ti ava kontan konnen. Eski ti annan en problemm avek bann dren an relasyon avek lavil Victoria spesifikman?

Mont Fleuri nou kapab konpran i annan bann lakour. I annan bann debri ki'n desann. So eski ti annan problemm ek bann dren?

E eski i annan travay ki pe ganny fer pou rezourd okenn keksoz, sityasyon ki kapab koz en blokaz pou sa bann dren e

anpese ki i annan okenn *flooding* ankor dan lavil Victoria ki kapab koz en pert pou biznes?

An relasyon avek pert ki ou'n koz lo *assessment*. Mon konnen Lasamble pa'n admet sa kestyon Onorab Cosgrow, *for whatever reasons*. So nou ava anvoy en lot kestyon pou bann zabitan pou zot kapab ganny en larepons.

Sa ki mon ti ava kontan konnen, ou'n dir nou i annan en fason *access*. Eski alors dan sa sirkonstans in annan en *assessment* preliminer ki'n ganny fer, lo domaz ki sa delo monte in koze pou bann lakour bann endividé dan Corgate Estate, dan Mont Fleuri, dan bann distrik otour lavil?

E si in annan osi en *assessment* ki'n ganny fer lo pert ki'n ganny koze dan lavil? Parey nou tande dan lezot pei i ganny fer ler nou war bann sityasyon *flooding* parey, bann Lotorite konsernen i donn serten lenformasyon. Avek sa mon ava demann Minis avek ou permisyon pou reponn mon 2 kestyon. Mersi bokou.

### **MINISTER ERROL FONSEKA**

Mersi Mr Speaker pou son kestyon. Onorab mon'n eksplik ou ase kler mon krwar ki sa bann drenaz wi in ganny bloke.

E pou enstan si nou bezwen fer drenaz pli gran, pli kourt, sa en travay ki ava ganny gete lo la. Me selman napa naryen pou fer a se moman lo sa bann drenaz. Apard ki kit li prop. Se tou ki nou annan pou fer.

Lo kestyon bann lasistans parey mon'n dir, Minister *Local Government* a vvar sa. E i annan en travay ki pe ganny fer an se moman.

Me selman kondisyon pou ed dimoun i pa reste ek mwan sa, sa i reste ek *Local Government* ansanm ek ler zot ava fer zot rekomandasyon.

Mon pa konnen ki kantite plis ou le mon koz lo la. Me mon krwar tou bann kestyon ki zot in demande la, ki ou'n demande, mon krwar mon'n kouver byen. Mersi Mr Speaker.

### **MR DEPUTY SPEAKER**

Mersi Minister. Mon ava donn laparol Onorab Sandy Arissol.

### **HON SANDY ARISSOL**

Mersi Mr Speaker. Bonn apre midi. Bonn apre midi Minis avek Mr Ernesta. E tou dimoun ki a lekout. Spesyalman bann dimoun Mont Fleuri ki'n ganny afekte en pe plis an relasyon ek sa delo monte.

Mr Speaker mon ti ava kontan premyerman kontiny lo sa ki Speaker bomaten ti dir pou felisit Onorab Roucou pou sa travay ki i ti pe fer dan son distrik.

An vi li ki ti pas lo medya, be an menm tan Mr Speaker in osi anvoy en swe lankourazman pou tou bann *MNA*, ki'n fer en travay dan zot distrik menm si zot pa'n pas lo medya parey Onorab Roucou in pase letan nou'n war li.

E letan nou pe koz lo sa size sitan enportan. I annan keksoz mon pa tann lezot Manm US koz lo la, apard zot pe rod konpansasyon pou bann dimoun, ki byen.

Selman i annan en keksoz ki nou bezwen fer Mr Speaker, pou nou edik nou dimoun poudir i annan sa pye dibwa ki en menas kot ou lakour. Ou bezwen koup li ler i ankor boner.

Pa les li gran apre pou li tonm lo ou lakaz. Si i annan en ros ki menas ou lakour, ou bezwen fer provizyon pou ou tir li avan i vin en menas pou ou lakour. Letan movetan.

Annou arret zet nou bann salte dan larivyer. Parey in ganny dir lo televizyon letan ti annan sa gro dezas partou lo Mahe.

Sa i bann lenformasyon mon krwar Mr Speaker ki nou devret kapab donn nou dimoun. Be *US* zot pa fer sa zot, *US* kontrer i vini i lager avek *DA* ki pe fer teat.

Selman i ok pou en ansyen *DA* desann kot lorloz abiye koman *Tinky Winky* - sou, pou li fer en teat! Menm zafer sa napa problem sa.

Alor Mr Speaker, mon ti ava kontan demann ou 3 kestyon, premye kestyon ki mon ti ava kontan demann ou se mon'n tann Onorab Wallace Cosgrow dir poudir dimoun pe noye. Mon ti ava kontan demann Minis eski dan lensidan Vandredi ti annan okenn dimoun ki ti noye?

Parski bomaten sa menm Onorab in dir ek nou i annan pake disel R10 kot *SMB*. Mon'n al gete Mr Speaker, disel i vann R2.

Me si ou pran 5 pake R2 ou met ansanm, i vin disel R10. 5 pake R2. Mon pa konnen kot in ganny sa be selman mon pe koriz sa.

Alors Minis premye kestyon, eski i annan,

**HON WALLACE COSGROW**  
*(Off-Mic)*

**HON SANDY ARISSOL**

(Ou ki ti dir!) Eski i annan dimoun ki'n noye dan sa lensidan Mont Fleuri ki mon'n fek tann li dir la?

Parske *US* zot pe servi Lasanble Mr Speaker pou zot kontinyen *mislead* lepep Seselwa. Parey ou pe dir zot abiz mikro pou zot *mislead*. E dir "dimoun deor pe ekout nou." Dimoun deor i ekout nou tou !

Dezyenm kestyon, mon ti ava kontan demann Minis. Eski i fer premye fwa Sesel nou ganny sa kalite letan? Eski anba vye Ladministrasyon avan zanmen nou'n gannyen sa kalite letan? Oubyen premye fwa nou gannyen Minis?

Mon trwazyenm e mon dernyen kestyon, eski Minis ou kapab dir ek nou letan ou bann Minister, nou Gouvernman in vini, zot in zwenn bann *file*? Parske Gouvernman avan zot ti kontan fer *workshop*, plan stratezik. Zot ki kontan *National Action Plan*.

Parey Minis Onorab Cosgrow ti fer ler li i ti Minis. Eski Mr Speaker, Minis i kapab dir ek nou si letan ou'n vini dan bann *file*, i annan okenn rapor, okenn plan stratezik ki pou gid nou en pti pe zisteman pou nou gete ki mannyer nou anpes semen *flood*, nou anpes lapli tonbe, nou anpes larivyer

inonde, nou anpes dimoun noye, Parey Onorab Wallace Cosgrow in dir nou apre midi. Mersi bokou.

### **MR DEPUTY SPEAKER**

Mersi Onorab. 3 pti kestyon Minis.

### **MINISTER ERROL FONSEKA**

Mersi pou ou kestyon Onorab. Ou premye kestyon lo si dimoun in noye. Ti annan en kannar ti pres pou noye, mon krwar selman apre i ti avole.

(laughter)

### **MINISTER ERROL FONSEKA**

So, non, napa okenn dimoun ki'n noye. Me selman i still kantmenm i annan keksoz, i annan domaz ki'n arive ek lakaz dimoun. E sa nou konsernen avek sa.

Get sa, nou tou nou konnen *Felleng*. Diferan sirkonstans ki'n arive avan. E in reste ek nou pli lontan. Parey nou'n sanse osi dan en fason ki sa sityasyon ti arriv en pti moman byen kourt.

Now si ti annan en sityasyon prolonge, keksoz ti pou vin pli move osi. So i pa premye fwa.

Me selman parey mon'n dir boner. Lakoz nou konnen. Lapli pou tonbe. Loraz pou

kraze. Me selman nou, nou kapab ed nou lekor en kantite.

E annou *focus* lo sa ki nou kapab fer. Nou kapab zwe koze, me selman ki nou kapab fer, annou anvoy sa mesaz deor pou dir dimoun ki si nou *keep*. Nou pei konmela i en pti pei sal. Nou'n oubliye ki lakour Seselwa ti pli prop lontan.

E kantite dimoun i drop sa bann zafer o bor zot bann *pick up* parey mon'n dir. I *drop*, zot pa *care* si i annan en dimoun pe viv o bor. E tou sa bann debri i pas o bor lakaz dimoun.

So annou fer sir ki nou anvoy en mesaz pou netway sa bann landrwa. Anmas nou bann tron dibwa ler ou'n koupe. Pa zis les ater. E pa zet bann zafer o bor larivyer.

So si nou fer sa, nou pou war. Nou pe al rod keksoz kot i annan en keksoz fasil nou kapab fer. Zis kit nou landrwa prop. E pran sa responsabilite pou fer sa louvraz.

Lo kestyon *National Action Plan*, napa okenn *National Action Plan* lo delo. Ou pa kapab anpes delo. Ou bezwen zis fer ou bann prevansyon ou menm.

E nou, nou pe fer sa kordinasyon. Sa planifikasyon an totalite pou nou kapab. Nou pa pou anpes sa arive nou. Nou

pou zis fer en sityasyon ki ler nou kapab. Ler nou annan nou bann resours nou kapab servi nou bann resours byen.

Se tou ki nou kapab fer. Nou, nou pa kapab anpes sa, nou pa kapab anpes *flooding*. Nou pa kapab anpes naryen. Nou kapab servi nou resours pou fer sir ki ler dimoun i pe ganny serten sityasyon nou kapab al ed zot.

Nou kapab deploy nou bann resours byen. E *Disaster Management* i sa. I pa vedir ou pou napa en *disaster*. Ou pou *manage* sa *disaster*. E sa legzersis i enportan koumsa.

So si nou pou koz lo sa size, annou koz lo sa size byen, *Ok?* Annou koz lo sa size byen mannyer i sipoze ganny marse. *Otherwise* nou pa pe *focus* lo sa nesesite ki nou bezwen fer.

So tousala nou bezwen pran kont *Disaster Management* i en keksoz serye. E i pa en keksoz ki akoz dimoun i kapab, i perdi en kantite.

Dimoun i soufer en kantite. Zot byen i ganny andomaze. Zot keksoz ki zot servi. La eski ou pou bezwen, en lakaz i bezwen met karpet. Ganny sofa ankor. Tousala i koute. So *Disaster Management* i enportan pou nou fer nou louvraz byen. Pou nou fer nou prevansyon.

Be selman en kantite keksoz nou kapab fer. Anvoy sa bon mesaz pou dimoun kit nou bann landrwa prop. E pa zet sa bann debri partou. Mersi Mr Speaker.

### **MR DEPUTY SPEAKER**

Mersi *Minister*. Mon ava envit dernyen entervenan pou nou sesyon ozordi apre midi. Onorab Georges.

### **HON BERNARD GEORGES**

Mersi Mr Speaker. Mr Speaker mon ti ava kontan tout o komansman dir ki mon war li ase sirprenan ki sa kestyon in ganny anmennen par en Manm Onorab ozordi, ki ti en ansyen Minis Lanvironnman.

E ki devret konn larepons sa kestyon ki i pe rode pli byen ki nou tou isi dan sa Lasamble. I fer mwan war ki annefe ler nou regard tre byen sa kestyon, ki sa se pa en kestyon ki pe rod lenformasyon, set en kestyon ki pe donn en platform pou dimoun vin fer politik.

E i byen. E i byen sa se nou travay. Sa se nou travay. Me mon bezwen san ki mon lager avek ou biro Mr Speaker, dir ki mon pa war okenn irzans dan sa kestyon.

Sa ki'n arive in arive. Sa repons ti ava kapab vin dan en semenn, dan en mwan. I pa ti

pou sanz naryen. Me etandonnen ki i la devan nou ozordi. Nou bezwen dil avek.

E mwan mon krwar, si ou permet mwan. Mon anvi demann Minis si i dakor avek mwan. Ki meyer repons a sa kestyon ler nou regard son dezyenm bout.

Eski Minis i kapab enform Lasamble kwa ki pe ganny fer pou ki sa sityasyon pa repet ankor?

Mon krwar meyer repons se ki Minis i dir nou i ava koz avek Bondye pou dir li pa anvoy lapli for ankor lo nou pei, e sirtou pa fer li ler i lanmer i mont, akoz nou pou ganny en problem.

*Having said that* ki obviously i pa pou en repons, Minis eski ou kapab tonm dakor avek mwan, ki nou annan annefe 4 keksoz ki fer ki sa bann linondasyon tanzantan i repeete.

Enn se nou annan en bann *low lying areas*, kot in annan en bon pe konstriksyon.

Dezyenmman nou annan lanmer mont. E ler parey dan sa lensidan lapli i inonde anmezir ki lanmer i mont, delo pa kapab al dan lanmer. Nou annan sa problem.

Trwazyenmman, nou annan *detritus* ki ganny anvoy dan larivyer, tou sord salte.

E katriyenmman nou annan bann pti pon. Bann pti *gaps* ki annan de fwa i ganny maye avek bann tiyo delo avek bann kondwir elektrik eksatera. Telefonn. Ki fer ki zot ganny bouse.

Eski ou dakor avek mwan ki sa se sa 4 keksoz ki permet ki sa bann linondasyon i arive? E ladan etandonnen ki nou pa kapab fer naryen avek lapli tonbe, avek lanmer mont.

Sel keksoz ki nou kapab fer. Se demann avek nou piblik gard nou bann larivyer ek nou bann dren prop.

E lo kote Gouvernman ede pou amelyor en pe sa bann pti pon kot i annan bann kondwir, ek bann *pipes* ki annan de fwa ki *snarl-up* en pe bann malpropte ki desann. E ki fer linondasyon.

Eski ou dakor avek mwan ki se osi senp ki sa? E sa se en keksoz ki'n arive toulstan. Ki pou avek nou ozordi. E ki pou avek nou demen ankor. Mersi Mr Speaker.

### **MR DEPUTY SPEAKER**

Mersi Onorab. Minister.

### **MINISTER ERROL FONSEKA**

Mersi Mr Speaker. Mr Speaker parey, mon dakor. Toutafe dakor ek *Leader of Government Business*. E osi apart from sa

bann legzanz ki ou'n donnan, ki *conducive* pou fer sa bann delo reste.

Be nou delo osi. Mwan mon rapel petet mon en pti pe pli vye ki zot - me mon rapel la semen Serret par egzanp anler. Ti bwaze lontan.

Ou pa ti war sa kalite delo ki desann konmela. Ozordi ou war, akoz? I annan en kantite lakaz. I annan en lakaz. I annan en kantite *concrete* ki nou'n met o bor nou lakaz.

Lontan delo i tonbe i ganny *soak away* dan sa zarden ki ti zis *jungle* dan sa lepok.

So sa kantite lakaz ki nou'n devlope osi dan pei. E sa bann semen *concrete* ki diferan landrwa i annan, tousala i bann platform kot delo i desann. I desann ase vitman.

So pa bokou delo ki ganny abzorbe ase vit. Akoz i annan bann plas pou li desann. So i desann. I annan bann plas pou li desann.

Be parey mon'n dir annou kit sa senp parey Onorab in dir. Annou, nou, nou annan nou bann plan pou fer nou *response*, pou fer nou *prevention and all that*.

Netway landrwa. Me i annan sa rol. Mon'n repet apepre 5 a 6 fwa la. Mon pou repet li ankor dernyen fwa. I

annan sa rol nou sitwayen i bezwen kit nou pei prop.

Pa zis pou rezon dezas pou anpes larivyer. Akoz nou pa kapab annan sa kalite salte ki nou war. Dimoun i marse ozordi, i *happy* ek sa.

I gete i zis labitid pou li. Nou bezwen sanz transform sa fason nou war nou pei. E mon ti ava kontan enplor tou dimoun pou *take sa up*.

Pran zot letan. Servi li lo bann keksoz neseser pou transform sa pei. Pou fer li prop. Pou ankouraz dimoun swiv sa bon semen. Mersi Mr Speaker.

### **MR DEPUTY SPEAKER**

Mersi *Minister*. Sa ti osi nou dernyen kestyion pou sa sesyon apre midi. Donk nou pou *adjourn* la.

Nou ava remersi Minis Errol Fonseka avek osi Mr Robert Ernesta pou avek nou ozordi apre midi.

Nou pou *adjourn* sesyon la e nou pou repran travay demen bomaten. E nou pou annan *Second Reading* lo en *Bill* demen bomaten avek Minis Ledikasyon Dr Justin Valentin.

Donk nou pou rezwenn demen bomaten 9er.

### **(ADJOURNMENT)**

